

ओं नमः परमात्मने, श्री महागणपतये नमः,
श्री गुरुभ्यो नमः
हरिः ओं ॥
--

कृष्ण यजुर्वेदीय तैत्तिरीय ब्राह्मणम्

तृतीयाष्टकं - प्रपाठकः 1 - 6

Table of Contents

3. कृष्ण यजुर्वेदीय तैत्तिरीय ब्राह्मणे तृतीयाष्टकं	6
3.1 प्रथमः प्रपाठकः-नक्षत्रेष्टीनां याज्याऽनुवाक्या ब्राह्मणानि	6
3.1.1 अनुवाकं 1 – देवनक्षत्राणां याज्यानुवाक्याः	6
3.1.2 अनुवाकं 2 – यमनक्षत्राणां याज्यानुवाक्याः	11
3.1.3 अनुवाकं 3 – चान्द्रमसादीनां सप्तनामिष्टीनां याज्यानुवाक्याः	16
3.1.4 अनुवाकं 4 – देव नक्षत्रेष्टिब्राह्मणम्	17
3.1.5 अनुवाकं 5 – यमनक्षत्रेष्टिब्राह्मणम्	24
3.1.6 अनुवाकं 6 – चान्द्रमसादीष्टिब्राह्मणम्	31
Appendix (of expansions)	37
3.2 द्वितीयः प्रपाठकः – दशपूर्णमासेष्टिब्राह्मणम्	41
3.2.1 अनुवाकं 1 – वथसापाकरणम्	41
3.2.2 अनुवाकं 2 – बर्हिगहरणम्	43
3.2.3 अनुवाकं 3 – दोहनम्	47
3.2.4 अनुवाकं 4 – हविर्निर्वापः	51
3.2.5 अनुवाकं 5 – व्रीह्यवघातः	55
3.2.6 अनुवाकं 6 – तण्डुलपेषणम्	59
3.2.7 अनुवाकं 7 – कपालोपधानम्	61
3.2.8 अनुवाकं 8 – पुरोडाशानिष्पादनम्	64
3.2.9 अनुवाकं 9 – वैदिकरणम्	68

3.2.10 अनुवाकं 10 – इध्माबर्हिः सादनम्.....	74
3.3 तृतीयाष्टके तृतीय प्रपाठकः – दर्शपूर्णमासेष्टिब्राह्मणम्	78
3.3.1 अनुवाकं 1 – स्त्रुक्संमार्गः.....	78
3.3.2 अनुवाकं 2 – सम्मार्जनानामग्नौ प्रहरणम्.....	80
3.3.3 अनुवाकं 3 – पत्नीसंनहनम्.....	82
3.3.4 अनुवाकं 4 – आज्योत्पवनम्.....	84
3.3.5 अनुवाकं 5 – आज्यग्रहणम्	87
3.3.6 अनुवाकं 6 – स्त्रुक्सादनम्.....	89
3.3.7 अनुवाकं 7 – आधारः	93
3.3.8 अनुवाकं 8 – इडाभक्षणम्.....	98
3.3.9 अनुवाकं 9 – प्रस्तरप्रहारादिकम्	102
3.3.10 अनुवाकं 10 – पत्नीयोक्रविमोकः.....	107
3.3.11 अनुवाकं 11 – उपवेषोपगूहनम्.....	109
3.4 तृतीयाष्टके चतुर्थः प्रपाठकः – पुरुषमेधः	113
3.4.1 ॐ 3.4.19 –पुरुषमेधः.....	113
3.5 तृतीयाष्टके पञ्चमः प्रपाठकः – इष्टिहौत्रम्.....	122
3.5.1 अनुवाकं 1 – होतुर्जपः पुरस्तात् सामिधेनीनाम्	122
3.5.2 अनुवाकं 2 – सामिधेनीमन्वाह	122
3.5.3 अनुवाकं 3 – प्रमुक्त्वा निविदोऽनूच्य देवता आवाहयति.....	123
3.5.4 अनुवाकं 4 – सूचावादापयति.....	124

3.5.5 अनुवाकं 5 – प्रयाजाः.....	125
3.5.6 अनुवाकं 6 – अज्यभागयोः पुरोनुवाक्ये.....	125
3.5.7 अनुवाकं 7 – हविषां याज्यानुवाक्याः.....	126
3.5.8 अनुवाकं 8 – इडोपाह्वानाम्.....	129
3.5.9 अनुवाकं 9 – अनूयाजाः	130
3.5.10 अनुवाकं 10 – सूक्तावाकः.....	131
3.5.11 अनुवाकं 11 – शंयुवाकः.....	133
3.5.12 अनुवाकं 12 – पत्नीसंयाजानां याज्यानुवाक्याः.....	133
3.5.13 अनुवाकं 13 – पत्नीसंयाजे सोमाह्वानम्.....	134
Appendix (of expansions)	137
3.6 तृतीयाष्टके षष्ठः प्रपाठकः – पशुहौत्रम्.....	139
3.6.1 अनुवाकं 1 – यूपसंस्काराः	139
3.6.2 अनुवाकं 2 – प्रयाजविषया मैत्रावरुणप्रैषाः.....	140
3.6.3 अनुवाकं 3 – आप्रिय प्रयाजानां याज्याः	143
3.6.4 अनुवाकं 4 – पर्यग्निकरणीया ऋचः.....	145
3.6.5 अनुवाकं 5 – मैत्रावरुणप्रैषः.....	146
3.6.6 अनुवाकं 6 – होतुरधिगुप्रैषः	146
3.6.7 अनुवाकं 7 – स्तोकविषयं मैत्रावरुणानुवचनम्.....	147
3.6.8 अनुवाकं 8 – वपा पुरोडाशस्विष्टकृतां पुरोनुवाक्याः प्रैषाश्च.....	148
3.6.9 अनुवाकं 9 – तेषामेव याज्याः.....	149

3.6.10 अनुवाकं 10 – मनोतासूक्तम्.....	150
3.6.11 अनुवाकं 11 – हविर्वनस्पतिस्विष्टकृतां पुरोनुवाक्याः प्रैषाश्च.....	152
3.6.12 अनुवाकं 12 – तेषामेव याज्याः	154
3.6.13 अनुवाकं 13 – अनूयाजप्रैषाः	155
3.6.14 अनुवाकं 14 – अनूयाजयाज्याः	158
3.6.15 अनुवाकं 15 – सूक्तवाकप्रैषाः.....	159

=====

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

3.कृष्ण यजुर्वेदीय तैत्तिरीय ब्राह्मणे तृतीयाष्टकं

3.1 प्रथमः प्रपाठकः—नक्षत्रेष्टीनां याज्याऽनुवाक्या ब्राह्मणानि

3.1.1 अनुवाकं 1 – देवनक्षत्राणां याज्यानुवाक्याः

T.B.3.1.1.1

अ॒ग्नि॒र्नः॑ पा॒तु कृ॑त्ति॒काः । नक्ष॑त्रं दे॒वमि॑न्द्रि॒यम् । इ॒दमा॑सां वि॒चक्ष॑णम् ।
ह॒वि॒रासं॑ जु॒होत॑न । यस्य॑ भा॒न्ति रश्म॑यो यस्य॑ के॒तवः॑ ।
यस्ये॑मा वि॒श्वा भु॑वनानि सर्वा । स कृ॑त्ति॒काभि॑र॒भि सम्॑व॒सानः॑ ।
अ॒ग्नि॒र्नो दे॒वः सु॑वि॒ते द॑धातु । प्र॒जाप॑ते रोहि॒णी वे॑तु॒ पत्नी॑ ।
वि॒श्वरू॑पा बृ॒हती॑ चि॒त्रभा॑नुः । 1 (10)

T.B.3.1.1.2

सा नो॑ य॒ज्ञस्य॑ सु॑वि॒ते द॑धातु । यथा॑ जी॒वेम॑ श॒रदः॑ स॒वीराः॑ ।
रोहि॑णी दे॒व्युद॑गात् पु॒रस्ता॑त् । वि॒श्वा रू॑पाणि प्र॒तिमो॑द॒माना॑ ।
प्र॒जाप॑ति॒र्हवि॑षा वर्ध॑यन्ती । प्रि॒या दे॒वाना॑—मु॒पया॑तु य॒ज्ञम् ।

सो॒मो॒ रा॒जा मृ॒गशी॒र्षेण॑ आ॒गन् । शि॒वं नक्ष॑त्रं प्रि॒यम॑स्य धा॒म ।
आ॒प्याय॑मानो बहु॒धा जने॑षु । रे॒तः प्र॒जां य॑ज॒माने॑ दधातु । 2 (10)

T.B.3.1.1.3

यत् ते॒ नक्ष॑त्रं मृ॒गशी॒र्षम॑स्ति । प्रि॒यं रा॒जन् प्रि॒यत॑मं प्रि॒याणा॑म् ।
तस्मै॑ ते सो॒म ह॒विषा॑ वि॒धेम॑ । शन्न॑ ऐ॒धि द्वि॒पदे॑ शं चतु॑ष्पदे ।
आ॒र्द्रया॑ रु॒द्रः प्र॑थ॒मान॑ ऐति । श्रे॒ष्ठो दे॒वानां॑ पति॒रघ्नि॒याना॑म् ।
नक्ष॑त्रमस्य ह॒विषा॑ वि॒धेम॑ । मा नः॑ प्र॒जां री॑रिषन् मोत वी॒रान् ।
हे॒ती रु॒द्रस्य॑ परि॒णो वृ॑णक्तु । आ॒र्द्रा नक्ष॑त्रं जुष॒ता ह॒विर्नः॑ । 3 (10)

T.B.3.1.1.4

प्र॒मुञ्च॑मानौ दु॒रिता॑नि वि॒श्वा । अ॒पाघ॑शं सं नुद॒ताम॑रातिम् ।
पुन॑र्नो दे॒व्यदि॑तिः स्पृ॒णोतु॑ । पुन॑र्वसू नः पुन॑रेतां य॒ज्ञम् ।
पुन॑र्नो दे॒वा अभि॑यन्तु सर्वे॑ । पुनः॑ पुन॑र्वो ह॒विषा॑ यजामः ।
ऐ॒वा न दे॒व्यदि॑तिरन॒र्वा । वि॒श्वस्य॑ भ॒र्त्री ज॑गतः प्र॒तिष्ठा॑ ।
पुन॑र्वसू ह॒विषा॑ वर्ध॒यन्ती॑ । प्रि॒यं दे॒वाना॑-म॒प्येतु॑ पाथः । 4 (10)

T.B.3.1.1.5

बृ॒हस्प॑तिः प्रथ॑मं जा॒यमा॑नः । ति॒ष्यं नक्ष॑त्रम॒भि सं॒ब॒भूव॑ ।
श्रे॒ष्ठो दे॒वानां॑ पृ॒तना॑सु जि॒ष्णुः । दि॒शोऽनु॑ सर्वा॒ अभ॑यन्नो अस्तु ।
ति॒ष्यः पु॒रस्ता॑दु॒त म॒ध्यतो॑ नः । बृ॒हस्प॑ति र्नः॒ परि॑पातु प॒श्चात् ।
बा॒र्धेता॑न् द्वे॒षो अभ॑यं कृ॒णुता॑म् । सु॒वीर्य॑स्य प॒तयः॑ स्याम । इ॒दं
सर्पे॑भ्यो ह॒विर॑स्तु जु॒ष्टम् । आ॒श्रेषा॑ ये॒षा-म॑नु॒यन्ति॑ चे॒तः । 5 (10)

T.B.3.1.1.6

ये अ॒न्तरि॑क्षं पृ॒थि॒वीं क्षि॑यन्ति । ते॒नः सर्पा॑सो ह॒वमा॑गमि॒ष्ठाः ।
ये रो॑चने॒ सूर्य॑स्यापि सर्पाः । ये दि॒वं दे॒वीम॑नु सञ्च॑रन्ति ।
ये॒षामा॑श्रे॒षा अ॒नु॒यन्ति॑ का॒मम् । ते॒भ्यः सर्पे॑भ्यो म॒धुम॑ज्जुहोमि ।
उप॑हू॒ताः पि॒तरो॑ ये म॒घासु॑ । म॒नोज॑वसः सु॒कृतः॑ सु॒कृत्याः॑ ।
ते नो॑ नक्ष॒त्रे ह॒वमा॑गमि॒ष्ठाः । स्व॒धाभि॑ र्य॒ज्ञं प्र॑यतं जुष॒न्ताम् । 6 (10)

T.B.3.1.1.7

ये अ॒ग्नि॒दग्धा॑ येऽन॒ग्नि-द॑ग्धाः । येऽमुं॑ लो॒कं पि॒तरः॑ क्षि॒यन्ति॑ ।
या॒श्च वि॒द्मया॑ उ॒ च न॑ प्र॒विद्म॑ । म॒घासु॑ य॒ज्ञं सु॒कृतं॑ जुष॒न्ताम् ।
गवां॑ प॒तिः फ॒ल्गुनी॑नाम॒सि त्व॑म् । तद॑र्य॒मन् व॑रुण मि॒त्र चा॑रु ।

तं त्वा वय॑ स॒नितार॑ स॒नीनाम् । जी॒वा जी॒वन्त॑मु॒प॒ सम्॑वि॒शेम ।
ये॒ने॒मा वि॒श्वा भु॒वनानि॑ स॒ञ्जिता ।
यस्य॑ दे॒वा अनु॑ सम्॒यन्ति॑ चे॒तः । 7 (10)

T.B.3.1.1.8

अ॒र्य॒मा रा॒जाऽज॑रस्तुवि॒ष्मान् । फ॒ल्गु॒नीना॑-मृ॒षभो॑ रौर॒वीति॑ ।
श्रे॒ष्ठो दे॒वानां॑ भ॒गवो॑ भ॒गासि॑ । तत्त्वा॑ वि॒दुः फ॒ल्गु॒नीस्त॑स्य॒ वित्तात् ।
अ॒स्मभ्यं॑ क्ष॒त्रम॑ज॒र॑ सु॒वीर्य॑म् । गो॒मद॑श्च-व॒दुप॑स॒न्नुदे॑ह ।
भ॒गो ह दा॑ता भ॒ग इत् प्र॑दा॒ता । भ॒गो दे॒वीः फ॒ल्गु॒नीरा॑वि॒वेश ।
भ॒गस्ये॑त्तं प्र॒सवं॑ ग॒मेम॑ । यत्र॑ दे॒वैः स॒धमा॑दं म॒देम॑ । 8 (10)

T.B.3.1.1.9

आ॒यातु॑ दे॒वः स॒वितो॑प॒यातु॑ । हि॒र॒ण्यये॑न सु॒वृता॑ रथे॒न ।
व॒हन् ह॒स्त॑ सु॒भगं॑ वि॒द्वाना॑प॒सम् । प्र॒यच्छ॑न्तं प॒पु॒रिं पु॒ण्यम॑च्छ ।
ह॒स्तः प्र॒यच्छ॑ त्वमृ॒तं व॑सी॒यः । दक्षि॑णे॒न प्र॑तिगृ॒ष्णीम॑ ऐ॒नत् ।
दा॒ता॒रम॑द्य स॒विता॑ वि॒देय॑ । यो नो॑ ह॒स्ताय॑ प्र॒सुवा॑ति॒ यज्ञ॑म् । त्वष्टा॑
नक्ष॑त्रम॒भ्येति॑ चि॒त्राम् । सु॒भ॑ स॒सं यु॑वति॒ रोच॑मानाम् । 9 (10)

T.B.3.1.1.10

निवेशय-न्नमृतान् मर्त्याँश्च । रूपाणि पिँशन् भुवनानि विश्वा ॥
 तन्नस्त्वष्टा तदु चित्रा विचष्टाम् । तन्नक्षत्रं भूरिदा अस्तु मह्यम् ।
 तन्नः प्रजां वीरवतीँ सनोतु । गोभिर्नो अश्वैः समनक्तु यज्ञम् ।
 वायु र्नक्षत्र-मभ्येति निष्ट्याम् । तिग्मशृङ्गो वृषभो रोरुवाणः ।
 समीरयन् भुवना मातरिश्वा । अप द्वेषाँसि नुदतामरातीः । 10 (10)

T.B.3.1.1.11

तन्नो वायस्तदु निष्ट्या शृणोतु । तन्नक्षत्रं भूरिदा अस्तु मह्यम् ।
 तन्नो देवासो अनु जानन्तु कामम् । यथा तरेम दुरितानि विश्वा ॥
 दूरमस्मच्छत्रवो यन्तु भीताः । तदिन्द्राग्नी कृणुतां तद् विशाखे । तन्नो
 देवा अनुमदन्तु यज्ञम् । पश्चात् पुरस्ता-दभयन्नो अस्तु । नक्षत्राणा-
 मधिपत्नी विशाखे । श्रेष्ठाविन्द्राग्नी भुवनस्य गोपौ । 11 (10)

T.B.3.1.1.12

विषूचः शत्रू-नपबाधमानौ । अप क्षुधं नुदतामरातिम् । पूर्णा पश्चादुत
 पूर्णा पुरस्तात् । उन्मध्यतः पौर्णमासी जिगाय । तस्यां देवा अधि
 सम्वसन्तः । उत्तमे नाक इह मादयन्ताम् ।

पृ॒थ्वी सु॒वर्चा॑ यु॒वतिः॑ स॒जोषाः॑ । पौ॒र्ण॒मा॒स्यु॒दगा॑-च्छो॒भमा॑ना ।

आ॒प्या॒य॒यन्ती॑ दु॒रितानि॑ वि॒श्वा ।

उ॒रुं दु॒हांँ य॑ज॒मानाय॑ य॒ज्ञम् () । 12 (10)

(चि॒त्रभा॑नु॒र्- यज॑माने॒ दधा॑तु - ह॒विर्नः॑ - पा॒थ - श्रे॑तो - जु॒षन्तां॑
- चे॑तो - म॒देम॑ - रो॒चमा॑ना - म॒राती॑र् - गो॒पौ - य॒ज्ञं) (A1)

3.1.2 अनुवाकं 2 – यमनक्षत्राणां याज्यानुवाक्याः

T.B.3.1.2.1

ऋ॒द्ध्य॒ास्म ह॒व्यैर्-न॑म॒सोप॑ स॒द्य । मि॒त्रं दे॒वं मि॒त्रधे॑य॒न्नो अ॑स्तु ।

अ॒नू॒रा॒धान् ह॒विषा॑ व॒र्द्धय॑न्तः । श॒तं जी॒वेम॑ श॒रदः॑ स॒वीराः॑ ।

चि॒त्रं नक्ष॑त्र-मु॒दगा॑त् पु॒रस्ता॑त् । अ॒नू॒रा॒धास॑ इति॒ यद् व॑दन्ति ।

तन्मि॒त्र ऐ॑ति प॒थिभि॑ दे॒वयानैः॑ । हि॒रण्य॑यै वि॒ततै॑-रन्त॒रिक्षे॑ ।

इ॒न्द्रो ज्ये॑ष्ठाम॒नु नक्ष॑त्रमेति । यस्मिन् वृ॒त्रं वृ॒त्र तू॒र्ये त॑तार । 13 (10)

T.B.3.1.2.2

तस्मिन् व॒यम॑मृ॒तं दु॒हानाः॑ । क्षु॒धं तरे॑म॒ दुरि॑तिं॒ दुरि॑ष्टिम् ।

पु॒रन्द॑राय॒ वृष॑भाय॒ धृष्ण॑वे । अ॒षाढा॑य॒ सह॑मानाय॒ मी॒ढुषे॑ ।

इन्द्राय॑ ज्ये॒ष्ठा म॒धु॒म॒द्-दु॒हा॒ना । उ॒रुं कृ॒णो॒तु य॒ज॒मा॒नाय॑ लो॒कम् ।
मू॒लं प्र॒जां वी॒र॒वतीं॑ वि॒दे॒य । प॒रा॒च्ये॒तु नि॒र्ऋ॒तिः प॒रा॒चा । गो॒भि
न॒क्ष॒त्रं प॒शु॒भिः स॒म॒क्तम् । अ॒ह॒र्भू॒याद्-य॒ज॒मा॒नाय॑ म॒ह्यम् । 14 (10)

T.B.3.1.2.3

अ॒ह॒र्नो अ॒द्य सु॒वि॒ते द॒धा॒तु । मू॒लं न॒क्ष॒त्र॒मि॒ति यद् व॒द॒न्ति ।
प॒रा॒चीं वा॒चा नि॒र्ऋ॒तिं नु॒दा॒मि । शि॒वं प्र॒जायै॑ शि॒वम॑स्तु म॒ह्यम् ।
या दि॒व्या आ॒पः प॒य॒सा सं ब॒भू॒वुः । या अ॒न्त॒रि॒क्ष उ॒त पा॒र्थि॒वी॒र्याः ।
या॒सा॒म॒षा॒ढा अ॒नु॒य॒न्ति का॒मम् । ता न॒ आ॒पः श॒ऽस्यो॒ना भ॑वन्तु ।
याश्च॑ कू॒प्या याश्च॑ ना॒द्याः स॒मु॒द्रि॒याः ।
याश्च॑ वै॒श॒न्ती॒रुत॑ प्रा॒स॒ची॒र्याः । 15 (10)

T.B.3.1.2.4

या॒सा॒म॒षा॒ढा म॒धु भ॑क्षयन्ति । ता न॒ आ॒पः श॒ऽस्यो॒ना भ॑वन्तु ।
तन्नो॑ वि॒श्वे उ॒प शृ॑ण्वन्तु दे॒वाः । तद॑षा॒ढा अ॒भि स॒म्य॑न्तु य॒ज्ञम् ।
तन्न॑क्ष॒त्रं प्र॒थतां॑ प॒शु॒भ्यः । कृ॒षिर् वृ॒ष्टिर् य॒ज॒मा॒नाय॑ क॒ल्प॒ताम् । शु॒भ्राः
क॒न्या यु॒व॒तयः॑ सु॒पे॒श॒सः । क॒र्म॒कृतः॑ सु॒कृतो॑ वी॒र्या॑वतीः ।

॥
वि॒श्वान् दे॒वान् ह॒विषा॑ वर्धयन्तीः ।

अ॒षाढाः॑ का॒ममु॒पयान्तु॑ य॒ज्ञम् । 16 (10)

T.B.3.1.2.5

यस्मिन् ब्र॒ह्माऽभ्य॑जय॒थ् सर्व॑मे॒तत् । अ॒मुञ्च॑ लो॒क मि॒दमू॑च॒ सर्व॑म् ।
तन्नो॑ नक्ष॒त्रम॑भिजिद् विजित्य । श्रियं॑ दधा-त्वह॒णीय॑मानम् ।
उभौ॑ लो॒कौ ब्र॒ह्मणा॑ सज्जि॒तेमौ॑ । तन्नो॑ नक्ष॒त्रम॑भिजिद् विच॒ष्टाम् ।
तस्मिन् वयं॑ पृ॒तनाः॑ सं जयेम । तन्नो॑ दे॒वासो॑ अनु॒जानन्तु॑ का॒मम् ।
शृ॒ण्वन्ति॑ श्रो॒णा-म॒मृत॑स्य गो॒पाम् । पु॒ण्याम॑स्या उप॒शृणो॑मि
॥
वाचम् । 17 (10)

T.B.3.1.2.6

महीं॑ दे॒वीं वि॒ष्णुप॑त्नी-मजू॒र्याम् । प्र॒तीची॑मे॒नाꣳ ह॒विषा॑ यजामः ।
त्रे॒धा वि॒ष्णु-रु॒रुगा॑यो विच॒क्रमे॑ । महीं॑ दि॒वं पृ॒थि॒वी-म॒न्तरि॑क्षम् ।
तच्छ्रो॑णैति श्रव॒ इच्छ॑माना । पु॒ण्यꣳ इ॒लोकं॑ य॒जमा॑नाय कृ॒ण्वती॑ ।
अष्टौ॑ दे॒वा व॑सवः सो॒म्यासः॑ । च॒तस्रो॑ दे॒वी र॑जराः श्रवि॒ष्ठाः । ते य॒ज्ञं
॥ पा॒न्तु र॑जसः प॒रस्ता॑त् । स॒म्वत्स॑रीण-म॒मृतꣳ स्व॑स्ति । 18 (10)

T.B.3.1.2.7

य॒ज्ञं नः॑ पा॒न्तु व॒सवः॑ पु॒रस्ता॑त् । दक्षि॒णतो॑-ऽभि॒यन्तु॑ श्र॒विष्ठाः॑ ।
 पु॒ण्यं नक्ष॑त्रम॒भि सम्॑वि॒शाम॑ । मा नो॑ अ॒राति॑-रघ॒श॒सा ग॑न् ।
 क्ष॒त्रस्य॑ रा॒जा व॒रुणो॑ऽधि॒राजः॑ । नक्ष॑त्राणां॒ शत॑भिष॒ग् वसि॑ष्ठः ।
 तौ दे॒वैभ्यः॑ कृ॒णुतो॑ दी॒र्घमा॑युः । श॒त॒सह॑स्रा भेष॒जानि॑ ध॒त्तः ।
 य॒ज्ञन्नो॑ रा॒जा व॒रुण॑ उ॒पया॑तु । तन्नो॑ वि॒श्वे अ॒भि सम्॑य॒न्तु दे॒वाः । 19(10)

T.B.3.1.2.8

तन्नो॑ नक्ष॒त्रं श॑तभिष॒ग् जुषा॑णम् । दी॒र्घमा॑युः प्र॒तिर॑द् भेष॒जानि॑ ।
 अ॒ज ऐ॒कपा॑दुदगात् पु॒रस्ता॑त् । वि॒श्वा भू॒तानि॑ प्र॒तिमो॑द॒मानः॑ ।
 तस्य॑ दे॒वाः प्र॑स॒वं य॑न्ति स॒र्वे । प्रो॑ष्ठप॒दासो॑ अ॒मृत॑स्य गो॒पाः ।
 वि॒भ्राज॑मानः स॒मिधान॑ उ॒ग्रः । आ॒न्तरि॑क्ष-म॒रुह॑द-ग॒न्ध्याम् ।
 तं सूर्यं॑ दे॒व-म॒जमे॑कपा॒दम् । प्रो॑ष्ठप॒दासो॑ अ॒नुय॑न्ति स॒र्वे । 20 (10)

T.B.3.1.2.9

अ॒हिर् बु॒द्धि॒धन॑यः प्रथ॒मान॑ ऐति । श्रे॒ष्ठो दे॒वाना॑मु॒त मा॑नु॒षाणा॑म् ।
 तं ब्रा॒ह्मणाः॑ सो॒मपाः॑ सो॒म्यासः॑ । प्रो॑ष्ठप॒दासो॑ अ॒भि र॑क्षन्ति स॒र्वे ।
 च॒त्वार॑ ऐ॒कम॑भि क॒र्म दे॒वाः । प्रो॑ष्ठप॒दास॑ इति॒ यान् व॑दन्ति ।

ते बु॒द्ध॒नियं॑ परि॒षद्य॑ स्तु॒वन्तः॑ । अहि॑ रक्ष॒न्ति नम॑सोप॒सद्य॑ ।
पू॒षा रे॒वत्य॑न्वेति॒ पन्था॑म् । पु॒ष्टि॒पती॑ पशु॒पा वाज॑ब॒स्त्यौ । 21 (10)

T.B.3.1.2.10

इ॒मानि॑ ह॒व्या प्र॑यता जुषा॒णा । सु॒गैर्नो॑ या॒नैरु॑पयातां य॒ज्ञम् ।
क्षु॒द्रान् प॒शून् रक्ष॑तु रे॒वती॑ नः । गा॒वो नो॑ अश्वा॒न् अन्वे॑तु पू॒षा ।
अ॒न्न रक्ष॑न्तौ बहु॒धा वि॑रूपम् । वाज॑ स॒नुतां॑ य॒जमा॑नाय य॒ज्ञम् ।
तद॒श्विना॑-व॒श्वयु॑जोपयाताम् । शु॒भं ग॑मि॒ष्ठौ सु॑यमे॒भिरश्वैः॑ । स्वं
नक्ष॑त्रं ह॒विषा॑ यजन्तौ । म॒ध्वा संपृ॑क्तौ यजु॒षा स॑म॒क्तौ । 22 (10)

T.B.3.1.2.11

यौ दे॒वानां॑ भिष॒जौ ह॒व्यवा॑हौ । वि॒श्वस्य॑ दू॒ता-व॒मृत॑स्य गो॒पौ । तौ
नक्ष॑त्रं जुजुषा॒णो-प॑याताम् । नमो॑ऽश्वि॒भ्यां कृ॑णुमो-ऽश्व॒युग्भ्या॑म् ।
अप॑ पा॒प्मानं॑ भ॒रणी॑र्भरन्तु । तद् य॒मो रा॒जा भ॑गवान् वि॒चष्टा॑म् ।
लो॒कस्य॑ रा॒जा म॒हतो॑ म॒हान् हि॑ । सु॒गं नः॑ पन्था॒मभ॑यं कृ॒णोतु॑ ।
यस्मिन्॑ नक्ष॒त्रे य॑म ऐति॒ राजा॑ । यस्मि॑-न्ने॒नम॑भ्यषि॒चन्त॑ दे॒वाः () ।
तद॒स्य चि॒त्र रक्ष॑तु ह॒विषा॑ य॒जाम॑ । अप॑ पा॒प्मानं॑ भ॒रणी॑र्भरन्तु ।

"निवेशनी {1}" "यत्ते देवा अदधुः {2}" । 23 (13)

(त॒तार॑ – मह्यं॑ – प्र॒सची॑र्या – या॒न्तु य॒ज्ञं – वा॒च॒ – स्व॒स्ति –
दे॒वा-अ॒नु॑ य॒न्ति स॒र्वे-वा॒ज॒ब॒स्त्यौ-स॒म॒क्तौ-दे॒वा स्त्री॑णि॒ च) (A2)

3.1.3 अनुवाकं 3 – चान्द्रमसादीनां सप्तनामिष्टीनां याज्यानुवाक्याः

T.B.3.1.3.1

"न॒वो न॒वो भ॒वति जा॒यमा॒नो {3}" "य॒मादि॑त्या
अ॒शु॒माप्या॑य॒यन्ति॑ {4}" । ये वि॒रूपे॑ स॒मन॑सा स॒म्व्य॑य॒न्ती ।
स॒मा॒नं त॒न्तुं परि॑ ता॒तना॑ते । वि॒भू प्र॒भू अ॒नुभू॑ वि॒श्वतो॑ हुवे ।
ते नो॑ नक्ष॒त्रे ह॒वमा॑गमे॒तम् । व॒यं दे॒वी ब्र॒ह्म॒णा स॒म्वि॑दा॒नाः ।
सु॒र॒त्ना॒सो दे॒ववी॑तिं द॒धानाः॑ । अ॒हो॒रा॒त्रे ह॒विषा॑ वर्द्ध॒यन्तः॑ ।
अ॒ति पा॒प्मान॑-म॒तिमु॑क्त्या ग॒मेम॑ । प्र॒त्यु॒वदृ॑श्या॒यती॑ । 24 (10)

T.B.3.1.3.2

व्यु॒च्छन्ती॑ दु॒हिता॑ दि॒वः । अ॒पो म॒ही वृ॑णुते चक्षु॒षा ।
तमो॑ ज्योति॒ष्कृ॒णोति॑ सू॒नरी॑ । उ॒दु॒स्त्रि॒याः स॒चते॑ सू॒र्यः॑ ।
स चा॑ उ॒द्यन्नक्ष॑त्र-म॒र्चि॒मत् । तवे॑दु॒षो व्यु॑षि सू॒र्यस्य॑ च ।

सं भ॒क्तेन॑ ग॒मेम॑हि । तन्नो॑ नक्ष॒त्र-म॒र्चि॒मत् । भानु॑म॒त्तेज॑ उ॒च्चर॑त् ।

उप॑ य॒ज्ञ-मि॒हाग॑मत् । 25 (10)

T.B.3.1.3.3

प्र नक्ष॒त्राय॑ दे॒वाय॑ । इन्द्रा॑ये॒न्दु॒ ह॒वाम॑हे । स नः॑ स॒विता॑ सु॒वथ्
स॒निम् । पु॒ष्टि॒दां वी॒रव॑त्त॒मम् । "उ॒दु॒त्यं {5}" "चि॒त्रम् {6}" ।

"अ॒दि॒तिर्न॑ उ॒रुष्य॑तु {7}" "म॒हीमू॒षु मा॒तर॑म् {8} । "इ॒दं वि॒ष्णुः{9}"

"प्र॒तद्वि॒ष्णुः {10}" । "अ॒ग्नि॒मूर्धा॑ {11}" "भु॒वः {12}" ।

"अनु॑ नो॒ऽद्यानु॑म॒ति {13}" "र॒न्वि॒दनु॑म॒ते त्व॑म् {14}" ।

"ह॒व्यवा॑ह॒ {15}" "स्वि॒ष्टम् {16}" () । 26 (10)

(आ॒य॒त्य - ग॒मथ् - स्वि॒ष्टम्) (A3)

3.1.4 अनुवाकं 4 – देव नक्षत्रेष्टिब्राह्मणम्

T.B.3.1.4.1

अ॒ग्नि॒र्वा अ॒काम॑यत । अ॒न्नादो॑ दे॒वाना॑ स्या॒मिति॑ । स ए॒तम॑ग्नये
कृ॒त्तिका॑भ्यः पु॒रोडा॑श-म॒ष्टाक॑पालं नि॒रव॑पत् । ततो॑ वै सो॒ऽन्नादो॑

दे॒वाना॑म॒भव॑त् । अ॒ग्निर्वै॑ दे॒वाना॑म॒न्नादः॑ । यथा॑ ह॒ वा अ॒ग्निर् दे॒वना॑-

मन्नादः । ए॒व॒ ह॒ वा ए॒ष म॒नु॒ष्या॒णां भ॒वति॑ । य ए॒तेन॑ ह॒विषा॑
यज॑ते । य उ॑ चैनदे॒वं वे॒द । सोऽ॒त्र जु॒होति॑ । अ॒ग्नये॑ स्वाहा
कृ॒त्तिका॑भ्यः स्वाहा ॥ अ॒म्बायै॑ स्वाहा दु॒लायै॑ स्वाहा ॥
नि॒तल्यै॑ स्वाहा ऽभ्र॒यन्त्यै॑ स्वाहा ॥ मे॒घय॑न्त्यै स्वाहा व॒र्ष॒यन्त्यै॑
स्वाहा ॥ चु॒पु॒णीका॑यै स्वाहेति॑ । 27 (15)

T.B.3.1.4.2

प्र॒जाप॑तिः प्र॒जा अ॑सृजत । ता अ॑स्मात् सृ॒ष्टाः प॑रा॒चीरा॑यन् ।
तासां॑ रो॒हिणी॑-म॒भ्य॒ध्याय॑त् । सोऽ॒काम॑यत । उप॒ माऽऽव॑र्तेत ।
समे॑नया गच्छेयेति॑ । स ए॒तं प्र॒जाप॑तये रो॒हिण्यै॑ च॒रुं नि॑रवपत् । ततो॑
वै सा तमु॑पावर्तत । समे॑नया ऽगच्छ॑त । उप॒ ह॒ वा ए॒नं प्रि॑यमावर्तते ।
सं प्रि॑येण गच्छ॑ते । य ए॒तेन॑ ह॒विषा॑ यज॑ते । य उ॑ चैनदे॒वं वे॒द ।
सोऽ॒त्र जु॒होति॑ । प्र॒जाप॑तये स्वाहा रो॒हिण्यै॑ स्वाहा ॥
रो॒च॒मा॒नायै॑ स्वाहा प्र॒जाभ्यः॑ स्वाहेति॑ । 28 (16)

T.B.3.1.4.3

सो॒मो वा अ॒काम॑यत । ओष॑धीनाञ् राज्य-म॒भिज॑येयमि॒ति । स ए॒तञ्
 सो॒माय॑ मृ॒गशी॑र्षाय॒ श्यामा॑कं चरुं पय॑सि निरवपत् । ततो॑ वै स
 ओष॑धीनाञ् राज्यम॒भ्यज॑यत् । समा॑नानाञ् ह वै राज्यम॒भिज॑यति ।
 य ए॒तेन॑ ह॒विषा॑ यजते । य उ॑ चैनदे॒वं वे॑द । सोऽत्र॑ जुहोति ।
 सो॒माय॑ स्वाहा मृ॒गशी॑र्षाय॒ स्वाहा॑ । इ॒न्वका॑भ्यः स्वा॒हौष॑धीभ्यः
 स्वाहा॑ । रा॒ज्याय॑ स्वाहा॒ ऽभिज॑ित्यै स्वाहे॒ति । 29 (11)

T.B.3.1.4.4

रु॒द्रो वा अ॒काम॑यत । प॒शुमा॑न्त् स्यामि॒ति । स ए॒तञ् रु॒द्राया॑र्द्रायै
 प्रैय॑ङ्ग॒वं चरुं॑ पय॑सि निरवपत् । ततो॑ वै स प॒शुमा॑नभवत् । प॒शुमा॑न्
 ह वै भ॑वति । य ए॒तेन॑ ह॒विषा॑ यजते । य उ॑ चैनदे॒वं वे॑द ।
 सोऽत्र॑ जुहोति । रु॒द्राय॑ स्वाहा॒ ऽर्द्रा॑यै स्वाहा॑ ।
 पि॒न्वमा॑नायै स्वाहा प॒शुभ्यः॑ स्वाहे॒ति । 30 (10)

T.B.3.1.4.5

ऋ॒क्षा वा इ॒यम॑लोमकाऽऽसीत् । साऽका॑मयत । ओष॑धीभिर्-
 वन॑स्पतिभिः प्रजाये॒येति॑ । सै॒तम॑दित्यै पुन॑र्वसुभ्यां चरुं निरवपत् ।

ततो॑ वा इ॒यमो॑षधीभिर्-वनस्पतिभिः प्राजायत । प्रजायते ह वै
प्रजया॑ पशुभिः । य ए॒तेन॑ ह॒विषा॑ यजते । य उ॑ चैनदेवं वे॒द ।
सोऽत्र॑ जुहोति । अदित्यै॑ स्वाहा पुनर्वसुभ्याम् ।

स्वाहाऽऽभूत्यै॑ स्वाहा प्रजात्यै॑ स्वाहेति । 31 (11)

T.B.3.1.4.6

बृहस्पतिर्वा॑ अकामयत । ब्रह्मवर्चसी॑ स्यामिति । स ए॒तं बृहस्प॑तये
ति॒ष्याय॑ नैवारं चरुं पयसि॑ निरवपत् । ततो॑ वै स ब्रह्मवर्चस्य॑भवत् ।
ब्रह्मवर्चसी॑ ह वै भवति । य ए॒तेन॑ ह॒विषा॑ यजते ।

य उ॑ चैनदेवं वे॒द । सोऽत्र॑ जुहोति । बृहस्प॑तये स्वाहा ति॒ष्याय॑
स्वहा॑ । ब्रह्मवर्चसाय॑ स्वाहेति । 32 (10)

T.B.3.1.4.7

दे॒वासुराः॑ सम्प॑य॒न्ता आ॑सन् । ते दे॒वाः सर्पे॑भ्य आश्रेषाभ्य आज्ये॑
कर॑म्भं निरवपन् । तने॑ताभिरेव दे॒वता-भि॑रुपानयन् । ए॒ताभिर्ह॑ वै
दे॒वताभि॑र्-द्विष॑न्तं भ्रातृव्य-मुप॑नयति । य ए॒तेन॑ ह॒विषा॑ यजते ।
य उ॑ चैनदेवं वे॒द । सोऽत्र॑ जुहोति ।

स॒र्पेभ्यः॑ स्वा॒हाऽऽश्रे॒षाभ्यः॑ स्वा॒हा । द॒न्द॒शू॒केभ्यः॑ स्वा॒हेति॑ । 33 (9)

T.B.3.1.4.8

पि॒तरो॑ वा अ॒काम॑यन्त । पि॒तृ॒लो॒क ऋ॑ध॒नु॒या॒मेति॑ । त ए॒तं पि॒तृ॒भ्यो॑
म॒घाभ्यः॑ पु॒रो॒डा॒श ष॑ट्क॒पालं॑ नि॒रव॑पन् । ततो॑ वै ते पि॒तृ॒लो॒क
आ॒ध॒र्नु॒वन् । पि॒तृ॒लो॒के ह॒ वा ऋ॑ध्नोति । य ए॒तेन॑ ह॒विषा॑ यज॒ते । य
उ॒ चैन॑दे॒वं वै॒द । सोऽत्र॑ जुहोति । पि॒तृ॒भ्यः स्वा॒हा म॒घाभ्यः॑ । स्वा॒हा
ऽन॒घाभ्यः॑ स्वा॒हा ऽग॒दाभ्यः॑ । स्वा॒हा ऽरु॑न्ध॒तीभ्यः॑ स्वा॒हेति॑ । 34 (11)

T.B.3.1.4.9

अ॒र्य॒मा वा अ॒काम॑यत । प॒शु॒मा॒न्त् स्या॒मिति॑ ।
स ए॒तम॑र्य॒म्णे फ॑ल्गु॒नीभ्यां॑ च॒रुं नि॒रव॑पत् । ततो॑ वै स प॒शु॒मा॒न॒भव॑त् ।
प॒शु॒मा॒न् ह॒ वै भ॑वति । य ए॒तेन॑ ह॒विषा॑ यज॒ते । य उ॒ चैन॑दे॒वं वै॒द ।
सोऽत्र॑ जुहोति । अ॒र्य॒म्णे स्वा॒हा फ॑ल्गु॒नीभ्या॑ स्वा॒हा ।

प॒शु॒भ्यः स्वा॒हेति॑ । 35 (10)

T.B.3.1.4.10

भ॒गो वा अ॒काम॑यत । भ॒गी श्रे॒ष्ठी दे॒वाना॑ स्या॒मिति॑ । स ए॒तं भ॒गाय॑
फ॑ल्गु॒नीभ्यां॑ च॒रुं नि॒रव॑पत् । ततो॑ वै स भ॒गी श्रे॒ष्ठी दे॒वाना॑म॒भव॑त् ।

भगी॑ ह॒ वै श्रे॒ष्ठी॑ स॒मा॒ना॒नां॑ भ॒वति॑ । य ए॒तेन॑ ह॒विषा॑ यज॒ते ।
य उ॑ चैन॒दे॒वं वे॒द । सोऽ॒त्र जु॒होति॑ । भगा॑य॒ स्वाहा॑ फ॒ल्गु॒नी॒भ्या॑ ७
स्वाहा॑ ॥ श्रे॒ष्ठ्या॑य॒ स्वाहे॑ति । 36 (10)

T.B.3.1.4.11

स॒वि॒ता वा॑ अ॒का॒म॒यत॑ । श्र॒न्मे॑ दे॒वा द॒धी॒रन् । स॒वि॒ता स्या॑मि॒ति ।
स ए॒त॑ स॒वि॒त्रे ह॒स्ता॑य पु॒रो॒डा॒शं द्वा॒द॒श॒क॒पा॒लं नि॒र॒व॒प॒दा॒शू॒नां
व्री॑ही॒णाम् । ततो॑ वै तस्मै॑ श्र॒द्दे॒वा अ॒द॒धत॑ । स॒वि॒ताऽभ॑वत् ।
श्र॒द्ध॒ वा अ॒स्मै म॒नु॒ष्या॑ द॒धते॑ । स॒वि॒ता स॒मा॒ना॒नां॑ भ॒वति॑ ।
य ए॒तेन॑ ह॒विषा॑ यज॒ते । य उ॑ चैन॒दे॒वं वे॒द । सोऽ॒त्र जु॒होति॑ ।
स॒वि॒त्रे स्वा॑हा ह॒स्ता॑य । स्वा॒हा द॒दते॑ स्वा॒हा पृ॑ण॒ते ।
स्वाहा॑ प्र॒यच्छ॑ते स्वाहा॑ प्र॒तिगृ॑भ्ण॒ते स्वाहे॑ति । 37 (14)

T.B.3.1.4.12

त्व॒ष्टा वा॑ अ॒का॒म॒यत॑ । चि॒त्रं प्र॒जां वि॒न्दे॒येति॑ । स ए॒तं त्व॑ष्ट्रे चि॒त्रायै॑
पु॒रो॒डा॒शम॑ष्टाक॒पालं॑ नि॒र॒व॒पत् । ततो॑ वै स चि॒त्रं प्र॒जाम॑वि॒न्दत॑ ।
चि॒त्र॑ ह॒ वै प्र॒जां वि॒न्दते॑ । य ए॒तेन॑ ह॒विषा॑ यज॒ते ।

य उ चैनदेवं वेद । सोऽत्र जुहोति । त्वष्ट्रे स्वाहा चित्रायै स्वाहा ।

चैत्राय स्वाहा प्रजायै स्वाहेति । 38 (10)

T.B.3.1.4.13

वायुर्वा अकामयत् । कामचारमेषु लोकेष्वभिजयेयमिति ।

स एतद्-वायवे निष्ट्यायै गृष्ट्यै दुग्धं पयो निरवपत् । ततो वै स

कामचारमेषु लोकेष्वभ्यजयत् । कामचारं ह वा एषु

लोकेष्वभिजयति । य एतेन हविषा यजते । य उ चैनदेवं वेद ।

सोऽत्र जुहोति । वायवे स्वाहा निष्ट्यायै स्वाहा ।

कामचाराय स्वाहाऽभिजित्यै स्वाहेति । 39 (10)

T.B.3.1.4.14

इन्द्राग्नी वा अकामयेताम् । श्रैष्ठ्यं देवाना-मभिजयेवेति ।

तावेतमिन्द्राग्निभ्यां विशाखाभ्यां पुरोडाश-मेकादशकपालं

निरवपताम् । ततो वै तौ श्रैष्ठ्यं देवाना-मभ्यजयताम् । श्रैष्ठ्यं ह वै

समानानामभिजयति । य एतेन हविषा यजते । य उ चैनदेवं वेद ।

सोऽत्र जुहोति । इन्द्राग्निभ्यां स्वाहा विशाखाभ्यां स्वाहा ।

श्रैष्ठ्याय॑ स्वाहा॒ ऽभिजित्यै॑ स्वाहेति । 40 (10)

T.B.3.1.4.15

अथै॑तत्-पौ॒र्णमा॒स्या आज्यं॑ निर्व॑पति । कामो॑ वै पौ॒र्णमा॒सी ।
काम॑ आज्यम् । कामे॑नैव काम॑ सम॑र्धयति ।
क्षप्र॑मेन॑ स काम॑ उप॑नमति । येन॑ कामे॑न यज॑ते । सोऽत्र॑ जुहोति ।
पौ॒र्णमा॒स्यै स्वाहा॒ कामाय॑ स्वाहाऽऽगत्यै॑ स्वाहेति । 41 (8)

Special Korvai indicating the number of "vaakyams" in each Dasani of 4th Anuvakam

(अ॒ग्निः पञ्च॑दश – प्र॒जाप॑तिः षोड॑श – सोम॑ एका॑दश – रु॒द्रो
दश॑ – र॒क्षैका॑दश – बृ॒हस्प॑तिर् दश॑ – दे॒वासुरा॑ नव॑ – पि॒तर
एका॑दशा-र्य॒मा-भ॑गो दश॑ दश॑-सवि॒ता चतु॑र्दश-त्व॒ष्टा-वा॒यु-
रिन्द्रा॑ग्नी दश॑ दशा॑-थै॑तत् पौ॒र्णमा॒स्या अष्टौ॑ पञ्च॑दश) (A4)

3.1.5 अनुवाकं 5 – यमनक्षत्रेष्टिब्राह्मणम्

T.B.3.1.5.1

मित्रो॑ वा अ॒काम॑यत । मि॒त्रधे॑य॒मेषु॑ लो॒केष्व॑भि ज॒येय॑मिति ।
स ए॒तं मि॒त्राया॑नू॒राधे॑भ्यश्चरुं॑ निर॑वपत् । ततो॑ वै स मि॒त्रधे॑य॒मेषु॑

लो॒केष्व॒भ्यज॑यत् । मि॒त्र॒धे॒यꣳ ह॒ वा ए॒षु लो॒केष्व॒भिज॑यति । य ए॒तेन॑
ह॒विषा॑ यज॑ते । य उ॑ चैन॒दे॒वं वे॑द । सोऽ॒त्र जु॑होति । मि॒त्राय॑ स्वाहा
ऽनू॒र॒धे॒भ्यः स्वाहा॑ ॥ मि॒त्र॒धे॒याय॑ स्वाहा ऽभिजित्यै॑ स्वाहेति । 42 (10)

T.B.3.1.5.2

इन्द्रो॑ वा अ॒काम॑यत । ज्यैष्ठ्यं॑ दे॒वाना॑-म॒भिज॑येयमिति । स
ए॒तमिन्द्रा॑य ज्येष्ठायै॑ पु॒रोडा॑श-मे॒काद॑शकपालं॑ नि॒रव॑पन्महा॒व्रीही॑णाम् ।
ततो॑ वै स ज्यैष्ठ्यं॑ दे॒वानाम॑भ्यजयत् । ज्यैष्ठ्यꣳ ह॒ वै स॒माना॑ना-
म॒भिज॑यति । य ए॒तेन॑ ह॒विषा॑ यज॑ते । य उ॑ चैन॒दे॒वं वे॑द ।
सोऽ॒त्र जु॑होति । इन्द्रा॑य स्वाहा ज्येष्ठायै॑ स्वाहा ॥
ज्यैष्ठ्या॑य स्वाहा ऽभिजित्यै॑ स्वाहेति । 43 (10)

T.B.3.1.5.3

प्र॒जाप॑तिर्वा अ॒काम॑यत । मूलं॑ प्र॒जां वि॑न्देयेति । स ए॒तं प्र॒जाप॑तये
मू॒लाय॑ चरुं नि॒रव॑पत् । ततो॑ वै स मूलं॑ प्र॒जाम॑विन्दत ।
मूलꣳ ह॒ वै प्र॒जां वि॑न्दते । य ए॒तेन॑ ह॒विषा॑ यज॑ते । य उ॑ चैन॒दे॒वं
वे॑द । सोऽ॒त्र जु॑होति । प्र॒जाप॑तये स्वाहा मू॒लाय॑ स्वाहा ॥

प्रजायै स्वाहेति । 44 (10)

T.B.3.1.5.4

आपो वा अकामयन्त । समुद्रं काममभिजयेमेति ।

ता एतमद्भ्योऽषाढाभ्यश्चरुं निरवपन् ।

ततो वै ताः समुद्रं काममभ्यजयन् । समुद्रं ह वै काममभिजयति ।

य एतेन हविषा यजते । य उ चैनदेवं वेद । सोऽन्न जुहोति ।

अद्भ्यः स्वाहा ऽषाढाभ्यः स्वाहा । समुद्राय स्वाहा कामाय स्वाहा ।

अभिजित्यै स्वाहेति । 45 (11)

T.B.3.1.5.5

विश्वे वै देवा अकामयन्त । अनपजय्यं जयेमेति । त एतं विश्वेभ्यो

देवेभ्योऽषाढाभ्यश्चरुं निरवपन् । ततो वै तेऽनपजय्यमजयन् ।

अनपजय्यं ह वै जयति । य एतेन हविषा यजते । य उ चैनदेवं

वेद । सोऽन्न जुहोति । विश्वेभ्यो देवेभ्यः स्वाहा ऽषाढाभ्यः स्वाहा ।

अनपजय्याय स्वाहा जित्यै स्वाहेति । 46 (10)

T.B.3.1.5.6

ब्रह्म वा अकामयत् । ब्रह्मलोकमभिजयेयमिति । तदेतं ब्रह्मणेऽभिजिते
चरुं निरवपत् । ततो वै तद्ब्रह्मलोकमभ्यजयत् । ब्रह्मलोकं ह वा
अभिजयति । य एतेन हविषा यजते । य उ चैनदेवं वेद ।
सोऽत्र जुहोति । ब्रह्मणे स्वाहा ऽभिजिते स्वाहा ॥

ब्रह्मलोकाय स्वाहा ऽभिजित्यै स्वाहेति । 47 (10)

T.B.3.1.5.7

विष्णुर्वा अकामयत् । पुण्यं श्लोकं शृण्वीय । न मा पापी
कीर्तिरागच्छेदिति । स एतं विष्णवे श्रोणायै पुरोडाशं त्रिकपालं
निरवपत् । ततो वै स पुण्यं श्लोकं शृणुत । नैनं पापी कीर्तिरा-
गच्छत् । पुण्यं ह वै श्लोकं शृणुते । नैनं पापी कीर्तिरागच्छति ।
य एतेन हविषा यजते । य उ चैनदेवं वेद । सोऽत्र जुहोति । विष्णवे
स्वाहा श्रोणायै स्वाहा ॥ श्लोकाय स्वाहा श्रुताय स्वाहेति । 48 (13)

T.B.3.1.5.8

वसवो वा अकामयन्त । अग्रं देवतानां परीयामेति । त एतं वसुभ्यः
श्रविष्ठाभ्यः पुरोडाशमष्टाकपालं निरवपन् । ततो वै तेऽग्रं देवतानां

पर्यायन् । अग्रं ह वै समानानां पर्येति । य एतेन हविषा यजते ।
य उ चैनदेवं वेद । सोऽत्र जुहोति । वसुभ्यः स्वाहा श्रविष्ठाभ्यः
स्वाहा ॥ अग्राय स्वाहा परीत्यै स्वाहेति । 49 (10)

T.B.3.1.5.9

इन्द्रो वा अकामयत । दृढो ऽशिथिलः स्यामिति । स एतं वरुणाय
शतभिषजे भेषजेभ्यः पुरोडाशं दशकपालं निरवपत्-कृष्णानां
व्रीहीणाम् । ततो वै स दृढोऽशिथिलोऽभवत् । दृढो ह वा
अशिथिलो भवति । य एतेन हविषा यजते । य उ चैनदेवं वेद ।
सोऽत्र जुहोति । वरुणाय स्वाहा शतभिषजे स्वाहा ।

भेषजेभ्यः स्वाहेति । 50 (10)

T.B.3.1.5.10

अजो वा एकपादकामयत । तेजस्वी ब्रह्मवर्चसी स्यामिति ।
स एतमजायैकपदे प्रोष्ठपदेभ्यश्चरुं निरवपत् । ततो वै स तेजस्वी
ब्रह्मवर्चस्यभवत् । तेजस्वी ह वै ब्रह्मवर्चसी भवति ।
य एतेन हविषा यजते । य उ चैनदेवं वेद । सोऽत्र जुहोति ।

अजायैकपदे स्वाहा प्रोष्ठपदेभ्यः स्वाहा । तेजसे स्वाहा

ब्रह्मवर्चसाय स्वाहेति । 51 (10)

T.B.3.1.5.11

अहिर्वै बु॒ध्नियोऽकामय॑त । इ॒मां प्र॑तिष्ठां वि॒न्देये॑ति । स ए॒तम॑हये
बु॒ध्निया॑य प्रोष्ठपदेभ्यः पुरोडाशं भूमिकपालं निरवपत् । ततो वै स
इ॒मां प्र॑तिष्ठा-मविन्दत । इ॒मां ह॑ वै प्र॑तिष्ठां वि॒न्दते॑ । य ए॒तेन॑
हवि॑षा यजते । य उ॑ चैनदेवं वे॒द । सोऽत्र॑ जुहोति । अ॒हये
बु॒ध्निया॑य स्वाहा प्रोष्ठपदेभ्यः स्वाहा । प्र॑तिष्ठायै स्वाहेति । 52 (10)

T.B.3.1.5.12

पू॒षा वा अ॑कामयत । प॒शुमा॑न्त् स्यामि॒ति । स ए॒तं पू॒ष्णे रे॒वत्यै॑ च॒रुं
नि॒रव॑पत् । ततो वै स प॒शुमा॑नभवत् । प॒शुमा॑न् ह॑ वै भवति ।
य ए॒तेन॑ हवि॑षा यजते । य उ॑ चैनदेवं वे॒द । सोऽत्र॑ जुहोति ।
पू॒ष्णे स्वाहा॑ रे॒वत्यै॑ स्वाहा । प॒शुभ्यः॑ स्वाहेति । 53 (10)

T.B.3.1.5.13

अ॒श्विनौ वा अ॑कामयेताम् । श्रो॒त्रस्वि॑नाव॒बधि॑रौ स्यावे॒ति ।
तावे॒तम॑श्विभ्या-मश्वयुग्भ्यां पुरोडाशं द्विकपालं निरवपताम् । ततो वै

तौ श्रो॒त्रस्वि॒नाव॒ब॒धि॒रा-व॒भ॒व॒ताम् । श्रो॒त्रस्वी॒ ह वा॒ अब॒धि॒रो भ॒व॒ति ।
य ए॒तेन॑ ह॒विषा॑ य॒ज॒ते । य उ॑ चैन॒दे॒वं वे॒द । सोऽ॒त्र जु॒होति॑ ।
अ॒श्विभ्या॑ स्वा॒हाऽश्व॒युग्भ्या॑ स्वा॒हा ।
श्रो॒त्राय॑ स्वा॒हा श्रु॒त्यै स्वा॒हेति॑ । 54 (10)

T.B.3.1.5.14

य॒मो वा॑ अ॒काम॑य॒त । पि॒त॒ृणां॑ रा॒ज्य-म॒भिज॑ये॒यमि॒ति ।
स ए॒तं य॑मा॒याप॑भ॒रणी॑भ्यश्चरुं नि॒रव॑पत् । ततो॑ वै स पि॒त॒ृणां॑
रा॒ज्यम॑भ्यज॒यत् । स॒मा॒ना॒नां॑ ह॒ वै रा॒ज्यम॑भिज॒यति॑ । य ए॒तेन॑
ह॒विषा॑ य॒ज॒ते । य उ॑ चैन॒दे॒वं वे॒द । सोऽ॒त्र जु॒होति॑ । य॒माय॑ स्वा॒हा
ऽप॒भ॒रणी॑भ्यः स्वा॒हा । रा॒ज्याय॑ स्वा॒हा ऽभि॒जि॒त्यै स्वा॒हेति॑ । 55 (10)

T.B.3.1.5.15

अथै॒तद॑-मा॒वास्या॑या आ॒ज्यं नि॒र्वप॑ति । का॒मो वा॑ अ॒मावा॑स्या ।
का॒म आ॒ज्यम् । का॒मेनै॒व का॒मं॑ स॒मर्ध॑यति । क्षि॒प्रमे॑न॒ स का॒म
उ॒प॒न॒म॒ति । येन॑ का॒मेन॑ य॒ज॒ते । सोऽ॒त्र जु॒होति॑ । अ॒मावा॑स्यायै स्वा॒हा
का॒माय॑ स्वा॒हा ऽग॒त्यै स्वा॒हेति॑ । 56 (8)

Special Korvai indicating the number of "vaakyams" in each Dasani of 5th Anuvakam

(मि॒त्र – इन्द्रः॑ – प्र॒जाप॑तिर् द॒श द॒शा – प॒ ऐ॒काद॑श – वि॒श्वे ब्र॒ह्म
द॒शद॑श – वि॒ष्णु स्त्र॑योद॒श – व॒सव॑ – इन्द्रो॑ऽ – जोऽहि॑र्वै –
बु॒ध्नियः॑ – पु॒षा – ऽश्वि॑नै – य॒मो द॒शद॑शा – थै॒तद॑ – मा॒वास्या॑या
अ॒ष्टौ पञ्च॑द॒श) (A5)

3.1.6 अनुवाकं 6 – चान्द्रमसादीष्टिब्राह्मणम्

T.B.3.1.6.1

च॒न्द्रमा॑ वा अ॒काम॑यत । अ॒होरा॑त्रा-न॒र्धमा॑सान्-मा॒सा-नृ॑तून्थ्-
स॒म्व॑त्सर-मा॒प्त्वा । च॒न्द्रम॑सः सा॒युज्य॑ꣳ स॒लो॒कता॑-मा॒प्नुयामि॑ति ।
स ए॒तं च॒न्द्रम॑से प्र॒तीदृ॑श्यायै पु॒रोडा॑शं पञ्च॑द॒शक॑पालं नि॒रव॑पत् ।
ततो॑ वै सोऽहो॑रात्रा-न॒र्धमा॑सान्-मा॒सा-नृ॑तून्थ्-स॒म्व॑त्सर-मा॒प्त्वा ।
च॒न्द्रम॑सः सा॒युज्य॑ꣳ स॒लो॒कता॑मा॒प्नोत् । अ॒होरा॑त्रान्. ह॒ वा
अ॒र्धमा॑सान् मा॒सा-ऋ॑तून्थ्-स॒म्व॑त्सर-मा॒प्त्वा । च॒न्द्रम॑सः
सा॒युज्य॑ꣳ स॒लो॒कता॑मा॒प्नोति॑ । य ए॒तेन॑ ह॒विषा॑ य॒जते॑ । य उ॒ चैन॑दे॒वं
वै॒द । सोऽत्र॑ जुहोति । च॒न्द्रम॑से स्वा॒हा प्र॒तीदृ॑श्यायै स्वा॒हा ॥

अ॒हो॒रा॒त्रेभ्यः॑ स्वा॒हा ऽर्ध॑मा॒सेभ्यः॑ स्वा॒हा । मा॒सेभ्यः॑ स्वा॒हर्तु॑भ्यः
स्वा॒हा । स॒म्व॑त्स॒राय॑ स्वा॒हेति॑ । 57 (15)

T.B.3.1.6.2

अ॒हो॒रा॒त्रे वा॑ अ॒काम॑येताम् । अ॒त्यहो॑रा॒त्रे मु॑च्येव॒हि । न ना॑वहो॒रात्रे॑
आ॒प्नु॒याता॑मि॒ति । ते ए॒तम॑हो॒रात्रा॑भ्यां च॒रुं नि॑रव॒पता॑म् । द्वा॒नानां॑
व्री॒हीणा॑म् । शु॒क्लानां॑ च कृ॒ष्णानां॑ च । स॒वा॒त्योर्दु॑ग्धे । श्वे॒तायै॑ च
कृ॒ष्णायै॑ च । ततो॑ वै ते अ॒त्यहो॑रा॒त्रे अ॑मुच्येते । नै॒ने अ॑हो॒रात्रे॑
आ॒प्नु॒ताम् । अ॒ति ह॒ वा अ॑हो॒रात्रे॑ मुच्यते । नै॒नम॑हो॒रात्रे॑ आ॒प्नु॒तः ।
य ए॒तेन॑ ह॒विषा॑ यज॒ते । य उ॑ चै॒नदे॒वँ वे॑द । सोऽ॒त्र जु॑होति ।
अ॒हे स्वा॒हा रा॒त्रियै॑ स्वा॒हा । अ॒तिमु॑क्त्यै॒ स्वा॒हेति॑ । 58 (17)

T.B.3.1.6.3

उ॒षा वा॑ अ॒काम॑यत । प्रि॒या ऽऽदि॒त्यस्य॑ सु॒भगा॑ स्यामि॒ति । सै॒तमु॑ष॒से
च॒रुं नि॑रव॒पत् । ततो॑ वै सा प्रि॒या ऽऽदि॒त्यस्य॑ सु॒भगा॑ ऽभ॒वत् ।
प्रि॒यो ह॒ वै स॒माना॑नां सु॒भगो॑ भ॒वति॑ । य ए॒तेन॑ ह॒विषा॑ यज॒ते ।
य उ॑ चै॒नदे॒वँ वे॑द । सोऽ॒त्र जु॑होति । उ॒षसे॑ स्वा॒हा व्यु॑ष्ट्यै॒ स्वा॒हा ।

व्यूषुष्यै॑ स्वाहा॑ व्युच्छन्त्यै॑ स्वाहा॑ । व्युष्टायै॑ स्वाहेति॑ । 59 (11)

T.B.3.1.6.4

अथै॑तस्मै॑ नक्ष॑त्राय॑ चरुं॑ निर्व॑पति । यथा॑ त्वं दे॒वाना॑मसि॑ । ए॒वम॑हं
मनु॑ष्याणां॑ भूया॑समिति॑ । यथा॑ ह वा ए॒तद्-दे॒वाना॑म् । ए॒व ह वा
एष॑ मनु॑ष्याणां॑ भवति॑ । य ए॒तेन॑ ह॒विषा॑ यज॑ते । य उ॑ चैन॒देवं॑ वै॒द ।
सोऽ॒त्र जु॑होति॑ । नक्ष॑त्राय॑ स्वा॒होदे॒ष्यते॑ स्वाहा॑ । उ॒द्यते॑ स्वा॒होदि॑ताय॑
स्वाहा॑ । हर॑से॒ स्वाहा॑ भर॑से॒ स्वाहा॑ । भ्राज॑से॒ स्वाहा॑ तेज॑से
स्वाहा॑ । तप॑से॒ स्वाहा॑ ब्र॒ह्मव॑र्चसाय॑ स्वाहेति॑ । 60 (13)

T.B.3.1.6.5

सूर्यो॑ वा अ॒काम॑यत । नक्ष॑त्राणां॑ प्र॒तिष्ठा॑ स्यामिति॑ । स ए॒तस् सूर्या॑य॑
नक्ष॑त्रेभ्यश्चरुं॑ निर॑वपत् । ततो॑ वै स नक्ष॑त्राणां॑ प्र॒तिष्ठा॑ ऽभवत् ।
प्र॒तिष्ठा॑ ह वै स॒माना॑नां॑ भवति॑ । य ए॒तेन॑ ह॒विषा॑ यज॑ते ।
य उ॑ चैन॒देवं॑ वै॒द । सोऽ॒त्र जु॑होति॑ । सूर्या॑य॑ स्वाहा॑ नक्ष॑त्रेभ्यः॑ स्वाहा॑ ।
प्र॒तिष्ठा॑यै॑ स्वाहेति॑ । 61 (10)

T.B.3.1.6.6

अथै॑तमदि॒त्यै चरुं॑ निर्व॑पति । इयं॑ वा अदि॒तिः । अस्यामे॑व प्रति॑
तिष्ठ॑ति । सोऽ॒त्र जुहो॑ति । अदि॒त्यै स्वाहा॑ प्रति॒ष्ठायै॑ स्वाहे॑ति । 62 (5)

T.B.3.1.6.7

अथै॑तं वि॒ष्णवे॑ चरुं॑ निर्व॑पति । यज्ञो॑ वै वि॒ष्णुः । यज्ञ॑ ए॒वान्त॑तः प्रति॑
तिष्ठ॑ति । सोऽ॒त्र जुहो॑ति । वि॒ष्णवे॑ स्वाहा॑ य॒ज्ञाय॑ स्वाहा॑ ।

प्रति॒ष्ठायै॑ स्वाहे॑ति । 63 (6)

(च॒न्द्रमाः॑ पञ्च॑द॒शा – हो॒रात्रे॑ स॒प्तद॑ – शो॒षा एका॑द॒शा –
थै॒तस्मै॑ नक्ष॑त्ताय त्रयो॑द॒श – सूर्यो॑ द॒शा – थै॒तमदि॒त्यै पञ्चा॑ –
थै॒तं वि॒ष्णवे॑ षट्॑ स॒प्त) (A6)

Special Korvai

[स॒विताऽऽशू॑नां व्री॑हीणामिन्द्रो॑ म॒हाव्री॑हीणामिन्द्रः॑ कृ॒ष्णानो॑
व्री॑हीणामहो॒रात्रे॑ द्वा॒यानां॑ व्री॑हीणाम् । पि॒तरः॑ षट्क॑पालꣳ स॒विता
द्वा॒दश॑कपालमिन्द्रा॒ग्नी एका॑द॒शक॑पालमिन्द्र ए॒काद॑शकपालमिन्द्रो
द॒शक॑पालं वि॒ष्णुस्त्रि॑कपालमहिर् भू॒मिक॑पालमश्विनौ॑ द्वि॒कपालं॑
च॒न्द्रमाः॑ पञ्च॑द॒शक॑पालम॒ग्निर॑त्वष्टा वस॒वोऽष्टा॑कपालमन्यत्र चरुम् ।

रु॒द्रोऽ॒र्य॒मा पू॒षा प॒शु॒मा॒न्त् स्या॒ञ् सो॒मो रु॒द्रो बृ॒ह॒स्प॒तिः प॒य॒सि वा॒युः
 प॒यः सो॒मो वा॒यु॒रिन्द्रा॒ग्नी मि॒त्र इन्द्र॒ आपो॒ ब्र॒ह्म य॒मोऽभि॒जित्यै॑ त्व॒ष्टा
 प्र॒जा॒प॒तिः प्र॒जायै॑ पौ॒र्ण॒मा॒स्या अ॒मा॒वा॒स्याया॒ आ॒ग॒त्यै वि॒श्वे जि॒त्या
 अ॒श्विनौ॑ श्रु॒त्यै । ब्र॒ह्म तदे॒तं वि॒ष्णुः स ए॒तं वा॒युः स ऐ॒तदा॒प॒स्ताः ।
 पि॒त॒रो वि॒श्वे व॒स॒वोऽका॒म॒य॒न्तमे॒ति त ए॒तं नि॒र॒व॒प॒न् । आ॒पोऽका॒म॒य॒न्त
 मे॒ति ता ए॒तं नि॒र॒व॒प॒न् । इन्द्रा॒ग्नी अ॒श्वि॒ना॒व॒का॒म॒ये॒तां वे॒ति तावे॒तं
 नि॒र॒व॒प॒दाम् । अ॒हो॒रा॒त्रे वा अ॒का॒म॒ये॒तामि॒ति ते ए॒तं नि॒र॒व॒प॒ताम् ।
 अ॒न्य॒त्रा॒का॒म॒य॒तमि॒ति स ए॒तं नि॒र॒व॒प॒त् । इन्द्रा॒ग्नी श्रै॒ष्ठ्य॒मिन्द्रो॑
 ज्यै॒ष्ठ्य॒मिन्द्रो॑ दृ॒ढः । आ॒हिः सूर्यो॑ऽदि॒त्यै वि॒ष्णवे॑ प्र॒ति॒ष्ठा॒यै ।
 सो॒मो य॒मः स॒मा॒ना॒नाम् । अ॒ग्नि॒र्नो री॒रि॒षद॒न्यत्र॑ री॒रि॒षः]
 [वि॒दु॒षो ह॒वि॒षा य उ॑ चै॒नदे॒वं वे॒द । इ॒ष्टि॒भिर्य॑ उ॑ चै॒ना ऐ॒वं वे॒द ।
 अ॒न्यत्र॑ ब्रा॒ह्म॒णे उ॑ चै॒नमे॒वं वे॒द]

तृतीयाष्टके प्रथमः प्रपाठकः – (TB 3.1)

Prapaataka Korvai with starting Padams of 1 to 6 Anuvaakams :-

(अ॒ग्नि॒र्न॑ – ऋ॒ध्या॒स्म॒ – न॒वो॑ न॒वो॑ – ऽग्नि॒र् – मि॒त्र॒ – श्र॒न्द्र॒माः॑ षट्)

Korvai with starting Padams of 1, 11, 21 Series of Dasanis :-

(अ॒ग्नि॒र्न॑ – स्त॒न्नो॑ वा॒यु॒ – र॒हि॒र्बू॒ध्न्य॑ – ऋ॒क्षा॒ वा॒ इ॒य॒ – म॒थै॒तत्
पौ॒र्ण॒मा॒स्या॒ – अ॒जो॑ वा॒ ए॒क॒पा॒थ् – सू॒र्य॑ स्त्रि॒षष्टिः॑)

First and Last Padam 3rd Ashtakam 1st Prapaatakam :-

(अ॒ग्नि॒र्नः॑ – पा॒तु॒ प्र॒ति॒ष्ठा॒यै॒ स्वा॒हे॒ति॑)

हरिः॑ ओं ।

। कृष्ण यजुर्वेदीय तैत्तिरीय ब्राह्मणे तृतीयाष्टके प्रथमः प्रपाठकः समाप्तः ।

=====

3.1 Details of Dasani & Vaakyams for Ashtakam 3 – Prapaatakam 1 – TB 3.1

	Dasani	Vaakyams
Anuvakam 1	12	120
Anuvakam 2	11	113
Anuvakam 3	3	30
Anuvakam 4	15	165
Anuvakam 5	15	152
Anuvakam 6	7	77
Total →	63	657

Appendix (of expansions)

T.B.3.1.2.11 – "निवेशनी {1}" "यत्ते देवा अदधुः {2}"

निवेशनी सङ्गमनी वसूनां विश्वा रूपाणि वसून्यावेशयन्ती ।

सहस्रपोषः सुभगा रराणा सा न आगन् वर्चसा सम्विदाना ॥ {1}

यत्ते देवा अदधुर् भागधेयममावास्ये सम्वसन्तो महित्वा ।

सानो यज्ञं पिपृहि विश्ववारे रयिं नो धेहि सुभगे सुवीरं ॥ {2}

(Both {1} and {2} appearing in T.S.3.5.1.1)

T.B.3.1.3.1 – "नवो नवो भवति जायमानो {3}"

"यमादित्या अशुमाप्याययन्ति {4}"

नवोनवो भवति जायमानोऽहां केतुरुषसा मेत्यग्रे ।

भागं देवेभ्यो विदधात्यायन् प्रचन्द्रमास्तिरति दीर्घमायुः ॥ {3}

यमादित्या अशुमाप्याययन्ति यमक्षित-मक्षितयः पिबन्ति ।

तेन नो राजा वरुणो बृहस्पतिरा प्याययन्तु भुवनस्य गोपाः ॥ {4}

(Both {3} and {4} appearing in T.S.2.4.14.1)

T.B.3.1.3.3 – "उदु॒त्यं {5}" "चि॒त्रम् {6}"

उदु॒ त्यं जा॒तवे॑दसं दे॒वं व॑हन्ति के॒तवः॑ । दृ॒शे वि॒श्वाय॑ सूर्य॑ ॥ {5}

चि॒त्रं दे॒वाना॑-मु॒दगा॑दनी॒कं चक्षु॑र् मि॒त्रस्य॑ वरु॒णस्या॑ग्नेः ।

आ॒ऽप्रा द्या॑वापृथि॒वी अ॒न्तरि॑क्ष॒ञ् सूर्य॑ आ॒त्मा जग॑तस्त॒स्थुष॑श्च ॥ {6}

(Both {5} and {6} appearing in T.S.1.4.43.1

T.B.3.1.3.3 – "अदि॒तिर्न उरु॑ष्यतु {7}" "मही॒मूषु॑ मा॒तरम् {8}"

अदि॒तिर्न उरु॑ष्यत्वदि॒तिः शर्म॑ यच्छतु । अदि॒तिः पा॒त्वञ् ह॑सः ॥ {7}

मही॒मूषु॑ मा॒तरञ् सु॒व्रता॑नामृ॒तस्य॑ पत्नी॒मव॑से हुवे॒म ।

तुवि॒क्षत्रा॑म॒जर॑न्तीमु॒रूची॑ञ् सु॒शर्मा॑णमदि॒तिञ् सु॒प्रणी॑तिं ॥ {8}

(Both {7} and {8} appearing in T.S.1.5.11.5)

T.B.3.1.3.3 – "इ॒दं वि॑ष्णुः {9}" "प्र॒तद्वि॑ष्णुः {10}"

इ॒दं वि॑ष्णुर् वि॒चक्र॑मे त्रे॒धा नि द॑धे प॒दं ।

स मू॒ढम॑स्य पा॒ञ् सुरे॑ ॥ {9} (Appearing in T.S.1.2.13.1)

प्र॒तद्-वि॒ष्णुः॑ स्त॒वते॑ वी॒र्या॑य । मृ॒गो न॑ भी॒मः कु॒चरो॑ गि॒रिष्ठाः॑ ।
यस्यो॑रु॒षु त्रि॒षु वि॒क्रम॑णेषु । अधि॑क्षि॒यन्ति॑ भुव॒नानि॑ वि॒श्वा ॥ {10}
(Appearing in T.B.2.4.3.4)

T.B.3.1.3.3 – "अ॒ग्नि॒र्मूर्धा॑ {11}" "भुवः॑ {12}"

अ॒ग्नि॒र्मूर्धा॑ दि॒वः क॒कुत् प॑तिः पृ॒थि॒व्या अ॒यं ।
अपा॑ꣳ रेता॑ꣳसि जि॒न्वति॑ ॥ {11}

भुवो॑ य॒ज्ञस्य॑ रज॒सश्च॑ ने॒ता यत्रा॑ नि॒युद्धिः॑ सच॒से शि॒वाभिः॑ ।
दि॒वि मूर्धा॑नं दधि॒षे सुव॑र्षां जिह्वा॒मग्ने॑ च॒कृषे॑ ह॒व्यवा॑हं ॥ {12}
(Both {11} and {12} appearing in T.S.4.4.4.1

T.B.3.1.3.3 – "अनु॑ नोऽद्या॑नुमति॑ {13}" "रन्वि॑दनुमते॑ त्वम् {14}"

अनु॑ नोऽद्या॑नुमति॑र् य॒ज्ञं दे॒वेषु॑ म॒न्यतां॑ ।
अ॒ग्निश्च॑ ह॒व्यवा॑हनो॒ भव॑तां दा॒शुषे॑ म॒यः ॥ {13}

अन्वि॑दनुमते॑ त्वं म॒न्यासै॑ श॒ञ्चनः॑ कृ॒धि ।
क्र॒त्वे द॑क्षाय नो हि॒नु प्र॑ण॒ आयू॑ꣳषि ता॒रिषः॑ ॥ {14}

(Both {13} and {14} appearing in T.S.3.3.11.3)

T.B.3.1.3.3 – "हव्यवाह॑ {15}" "स्विष्टम् {16}"

हव्यवाह॑-मभिमातिषाऽहम् । रक्षो॑हणं पृतना॑सु जिष्णुम् ।

ज्योतिष्मन्तं दी॒द्यतं॑ पु॒रन्धि॑म् । अ॒ग्नि॑ स्विष्ट॑कृत॒मा हु॑वेम ॥ {15}

स्विष्ट॑मग्ने॒ अभि॑ तत् पृ॒णाहि॑ । वि॒श्वा दे॒व पृत॑ना॒ अभि॑ष्य ।

उरुं नः पन्थां॑ प्रदि॒शन्वि॑ भाहि । ज्योतिष्म॑द्धे॒ह्यजरं॑ न आयुः॑ ॥ {16}

(Both {15} and {16} appearing in T.B.2.4.1.4)

3.2 द्वितीयः प्रपाठकः – दशपूर्णमासेष्टिब्राह्मणम्

3.2.1 अनुवाकं 1 – वथसापाकरणम्

T.B.3.2.1.1

तृतीयस्यामितो दिवि सोम आसीत् । तं गायत्र्याहरत् ।
तस्य पर्णमच्छिद्यत । तत् पर्णोऽभवत् । तत् पर्णस्य पर्णत्वम् ।
ब्रह्म वै पर्णः । यत् पर्णशखया वथसानपाकरोति ।
ब्रह्मणैवैनानपाकरोति । गायत्रो वै पर्णः । गायत्राः पशवः । 1 (10)

T.B.3.2.1.2

तस्मात् त्रीणित्रीणि पर्णस्य पलाशानि । त्रिपदा गायत्री ।
यत् पर्णशखया गाः प्रार्पयति । स्वयैवैना देवतया प्रार्पयति ।
यं कामयेता पशुः स्यादिति । अपर्णा तस्मै शुष्काग्रामाहरेत् ।
अपशुरेव भवति । यं कामयेत पशुमान्थ् स्यादिति ।
बहुपर्णा तस्मै बहुशाखामाहरेत् । पशुमन्त-मेवैनं करोति । 2 (10)

T.B.3.2.1.3

यत् प्राचीमाहरेत् । देवलोक-मभिजयेत् । यदुदीचीं मनुष्यलोकम् ।
प्राचीमुदीचीमाहरति । उभयोर् लोकयो-रभिजित्यै । इषे त्वोर्जे

त्वेत्याह । इषमेवोर्जं यजमाने दधाति । वायवः स्थेत्याह । वायुर्वा
अन्तरिक्षस्याध्यक्षाः । अन्तरिक्षदेवत्याः खलु वै पशवः । 3 (10)

T.B.3.2.1.4

वायव एवैनान् परि ददाति । प्र वा एनानेतदा-करोति । यदाह ।
वायवः स्थेत्युपायवः स्थेत्याह । यजमानायैव पशूनुपह्वयते ।
देवो वः सविता प्रार्पयत्वित्याह प्रसूत्यै । श्रेष्ठतमाय कर्मण इत्याह ।
यज्ञो हि श्रेष्ठतमं कर्म । तस्मादेवमाह । आप्यायध्वमघ्निया
देवभागमित्याह । 4 (10)

T.B.3.2.1.5

वथसेभ्यश्च वा एताः पुरा मनुष्येभ्य-श्चाप्यायन्त । देवेभ्य एवैना
इन्द्रायाप्यायति । ऊर्जस्वतीः पयस्वतीरित्याह । ऊर्जं हि पयः
सम्भरन्ति । प्रजावती-रनमीवा अयक्ष्मा इत्याह प्रजात्यै ।
मावः स्तेन ईशत माऽघशंस इत्याह गुप्त्यै । रुद्रस्य हेतिः
परि वो वृणक्त्वित्याह । रुद्रा देवैना-स्त्रायते । ध्रुवा अस्मिन् गोपतौ
स्यात बह्वीरित्याह । ध्रुवा एवास्मिन् बह्वीः करोति () । 5 (10)

T.B.3.2.1.6

यज॑मानस्य॑ प॒शून् पा॒हीत्या॑ह । प॒शुनां॑ गो॒पीथाय॑ । तस्मा॑त्स्मायं॑ प॒शव॑
उप॑ समाव॑र्तन्ते । अन॑धः साद॑यति । गर्भा॑णां धृ॒त्या अप्र॑पादाय ।
तस्मा॑द्गर्भाः॑ प्र॒जानाम॑प्र॒पादु॑काः । उप॑रीव निद॑धाति । उप॑रीव हि
सुव॑र्गो लो॒कः । सुव॑र्गस्य॑ लो॒कस्य॑ सम॑ष्ट्यै । 6 (9) (प॒शवः॑ –
करो॑ति – प॒शवो॑ – दे॒वभा॑गमि॒त्याह॑ – करो॑ति – +न॒व च॑) (A1)

3.2.2 अनुवाकं 2 – बर्हि॑राहरणम्

T.B.3.2.2.1

दे॒वस्य॑ त्वा स॒वितुः॑ प्र॒सव॑ इत्य॑श्चप॒र्शुमा॑दन्ते प्र॒सूत्यै॑ ।
अ॒श्विनो॑र्-बाहु॒भ्यामि॑त्याह । अ॒श्विनौ॑ हि दे॒वाना॑मध्व॒र्यू आ॑स्ताम् ।
पू॒ष्णो ह॑स्ता॒भ्यामि॑त्याह य॒त्यै । यो॑ वा ओ॒षधीः॑ प॒र्वशो॑ वेद ।
नैनाः॑ स हि॒नस्ति॑ । प्र॒जाप॑तिर्वा ओ॒षधीः॑ प॒र्वशो॑ वेद ।
स ए॒ना न॑ हि॒नस्ति॑ । अ॒श्वप॑र्श्वा ब॒र्हिर॑च्छैति ।
प्रा॒जाप॑त्यो वा अ॒श्वः स॑यो॒नित्वा॑य । 7 (10)

T.B.3.2.2.2

ओष॑धीनामहि॑सायै । य॒ज्ञस्य॑ घोष॑दसीत्याह । य॒ज॒मान॑ ए॒व रयिं॑
दधा॑ति । प्र॒त्युष्ट॑ रक्षः॑ प्र॒त्युष्टा॑ अ॒रातय॑ इत्याह । रक्ष॑सा-म॒प॒ह॒त्यै ।
प्रै॒यम॑गाद्धिष॑णा ब॒र्हि॒र॒च्छे॒त्याह॑ । वि॒द्या वै धि॒षणा॑ ॥
वि॒द्ययै॑वैनद॑च्छैति । म॒नु॒ना कृ॒ता स्व॒धया॑ वि॒त॒ष्टे॒त्याह॑ ।
मा॒न॒वी हि प॒र्शुः स्व॒धाकृ॑ता । 8 (10)

T.B.3.2.2.3

त आ॒व॒ह॒न्ति क॒वयः॑ पु॒रस्ता॑दि॒त्याह॑ । शु॒श्रु॒वा॒सो वै क॒वयः॑ ।
य॒ज्ञः पु॒रस्ता॑त् । मु॒ख॒त ए॒व य॒ज्ञमा॑र॒भते॑ । अथो॑ यदे॒तदु॒क्त्वा यतः॑
कु॒तश्चा॑हरति । तत् प्रा॒च्या ए॒व दि॒शो भ॑वति । दे॒वेभ्यो॑ जुष्ट॑मिह
ब॒र्हि॒रास॑द इत्याह । ब॒र्हि॒षः स॒मृ॒द्ध्यै॑ । क॒र्म॒णोऽन॑परा॒धाय॑ ।
दे॒वानां॑ परि॒षू॒त॒मसी॑त्याह । 9 (10)

T.B.3.2.2.4

यद्वा इ॒दं किं॑ च । तद्-दे॒वानां॑ परि॒षू॒त॒म् । अथो॑ यथा॒ वस्य॑से॒ प्रति॑
प्रो॒च्याहे॒दं क॑रिष्यामीति । ए॒वमे॒व तद॑ध्व॒र्युर्-दे॒वेभ्यः॑ प्रति॑ प्रोच्य
ब॒र्हि॒र्दा॑ति । आ॒त्म॒नोऽहि॑सायै । या॒वतः॑ स्त॒म्बान् परि॑ दि॒शेत् ।

यत्तेषा-मुच्छि॑ष्यात् । अति॑ तद्-यज्ञस्य॑ रेचयेत् ।

एक॑ स्तम्बं॑ परिदिशेत् । त॑ सर्वं॑ दायात् । 10 (10)

T.B.3.2.2.5

यज्ञस्यानतिरेकाय॑ । वर्ष॑वृद्ध-मसीत्याह॑ । वर्ष॑ वृद्धा॑ वा औषधयः॑ ।
देव॑ बर्हि॑रित्याह॑ । देवेभ्य॑ एवैनत्॑ करोति । मा त्वाऽन्वङ्मा॑
तिर्यगित्याहा॑ हि॒सायै॑ । पर्व॑ ते राध्यासमित्या-हर्ध्यै॑ । आच्छेत्ता॑ ते
मा रिषमित्याह॑ । नास्यात्मनो॑ मीयते । य एवं॑ वेद॑ । 11 (10)

T.B.3.2.2.6

देवबर्हिः॑ शतवल्॑शं विरोहेत्याह॑ । प्रजा॑ वै बर्हिः॑ ।
प्रजानां॑ प्रजननाय॑ । सहस्रवल्॑शा वि वय॑ रुहेमेत्याह॑ ।
आशिषमेवैतामाशास्ते॑ । पृथिव्याः॑ संपृचः॑ पाहीत्याह॑ प्रतिष्ठित्यै॑ ।
अयुङ्गायुङ्गान्-मुष्टीन्॑ लुनोति॑ । मिथुन॑त्वाय प्रजात्यै॑ ।
सुसंभृता॑ त्वा संभरामीत्याह॑ । ब्रह्मणैवैनथ्- संभरति॑ । 12 (10)

T.B.3.2.2.7

अदित्यै॑ रास्नाऽसीत्याह॑ । इयं॑ वा अदितिः॑ । अस्या॑ एवैनद्-रास्नां॑
करोति॑ । इन्द्राण्यै॑ संनहनमित्याह॑ । इन्द्राणी॑ वा अग्रे॑ देवताना॑

स॒मन॒ह्यत॑ । सा ऽऽ॒ध्नो॒त् । ऋ॒द्ध्यै॒ सं॒नह्य॑ति । प्र॒जा वै ब॒र्हिः॑ ।

प्र॒जा॒नाम॑प॒रावा॑पाय । तस्मा॒त्-स्ना॑वसंतताः प्र॒जा जा॑यन्ते । 13 (10)

T.B.3.2.2.8

पू॒षा ते॑ ग्र॒न्थिं॑ ग्र॒थ्ना॒त्वित्या॑ह । पु॒ष्टि॒मे॒व य॑ज॒माने॑ दधाति । स ते॑

माऽऽ स्था॒दित्या॑हाहि॒सायै॑ । प॒श्चात् प्रा॒ञ्चमु॑पगूहति । प॒श्चाद् वै

प्रा॒चीन॑रे॒तो॑ धीयते । प॒श्चादे॒वास्मै॑ प्रा॒चीन॑रे॒तो॑ दधाति ।

इ॒न्द्रस्य॑ त्वा बा॒हुभ्या॑-मु॒द्यच्छ॑ इत्याह । इ॒न्द्रि॒यमे॒व य॑ज॒माने॑ दधाति ।

बृ॒हस्प॑ते॒र्मूर्ध्ना॑ ह॒रामी॑त्याह । ब्र॒ह्म वै दे॒वानां॑ बृ॒हस्प॑तिः । 14 (10)

T.B.3.2.2.9

ब्र॒ह्मणै॑वैन॒द्धर॑ति । उ॒र्वन्त॑रि॒क्ष-म॒न्विही॑त्याह गत्यै । दे॒वंग॑ममसीत्याह ।

दे॒वाने॑वैन॒द्रम॑यति । अ॒नधः॑ सा॒दय॑ति । ग॒र्भाणां॑ धृ॒त्या अ॒प्रपा॑दाय ।

तस्मा॒द्-ग॒र्भाः प्र॒जा॒नाम॑प्र॒पादु॑काः । उ॒परी॑व नि॒दधा॑ति । उ॒परी॑व हि

सु॒वर्गो॑ लो॒कः । सु॒वर्ग॑स्य लो॒कस्य॑ स॒मष्ट्यै॑ () । 15 (10)

(स॒यो॒नि॒त्वाय॑ - स्व॒धाकृ॑ता - ऽसी॒त्याह॑ - दा॒याद् - वे॒द - भ॑रति

- जा॒यन्ते॑ - बृ॒हस्प॑तिः - स॒मष्ट्यै॑) (A2)

3.2.3 अनुवाकं 3 – दोहनम्

T.B.3.2.3.1

पूर्वेद्युरिध्मा बर्हिः करोति । यज्ञमेवारभ्य गृहीत्वोपवसति ।
 प्रजापतिर् यज्ञमसृजत । तस्योखे अस्रसेताम् । यज्ञो वै प्रजापतिः ।
 यत् सान्नाय्योखे भवतः । यज्ञस्यैव तदुखे उपदधात्य-प्रस्रसाय ।
 शुन्धध्वं दैव्याय कर्मणे देवयज्याया इत्याह । देवयज्याया एवैनानि
 शुन्धति । मातरिश्वनो घर्मोऽसीत्याह । 16 (10)

T.B.3.2.3.2

अन्तरिक्षं वै मातरिश्वनो घर्मः । एषां लोकानां विधृत्यै । द्यौरसि
 पृथिव्यसीत्याह । दिवश्च ह्येषा पृथिव्याश्च संभृता । यदुखा ।
 तस्मादेवमाह । विश्वधाया असि परमेण धाम्नेत्याह । वृष्टिर्वै
 विश्वधायाः । वृष्टिमेवावरुन्धे । दृहस्व मा ह्वारित्याह धृत्यै । 17 (10)

T.B.3.2.3.3

वसूनां पवित्रमसीत्याह । प्राणा वै वसवः ।
 तेषां वा एतद्-भागधेयम् । यत् पवित्रम् । तेभ्य एवैनत् करोति ।
 शतधारं सहस्रधारमित्याह । प्राणेष्वेवायुर्-दधाति सर्वत्वाय ।

त्रिवृत् पलाशशाखायां दर्भमयं भवति । त्रिवृद्वै प्राणः ।

त्रिवृतमेव प्राणं मध्यतो यजमाने दधाति । 18 (10)

T.B.3.2.3.4

सौम्यः पर्णः सयोनित्वाय । साक्षात् पवित्रं दर्भाः । प्राख्सायमधि
निदधाति । तत् प्राणापानयो रूपम् । तिर्यक्प्रातः । तद्-दर्शस्य
रूपम् । दार्श्यं ह्येतदहः । अन्नं वै चन्द्रमाः । अन्नं प्राणाः ।

उभयमेवोपैत्यजामित्वाय । 19 (10)

T.B.3.2.3.5

तस्मादयं सर्वतः पवते । हुतः स्तोको हुतो द्रप्स इत्याह प्रतिष्ठित्यै ।
हविषोऽस्कन्दाय । न हि हुतं स्वाहाकृतं स्कन्दति । दिवि नाको
नामाग्निः । तस्य विप्रुषो भागधेयम् । अग्नये बृहते नाकायेत्याह ।
नाकमेवाग्निं भागधेयेन समर्धयति । स्वाहा द्यावापृथिवीभ्यामित्याह ।
द्यावापृथिव्योरेवैनत्-प्रतिष्ठापयति । 20 (10)

T.B.3.2.3.6

पवित्रवत्यानयति । अपां चैवौषधीनां च रसं सृजति ।

अथो ओषधीष्वेव पशून् प्रतिष्ठापयति । अन्वारभ्य वाचं यच्छति ।

य॒ज्ञस्य॑ धृ॒त्यै । धा॒रय॑न्नास्ते । धा॒रय॑न्त इ॒व हि दु॒हन्ति॑ ।
 का॒मधु॑क्ष इ॒त्याहा॑तृ॒तीयस्यै॑ । त्रय॑ इ॒मे लो॒काः । इ॒माने॒व लो॒कान् ।
 यज॑मानो दुहे । 21 (10)

T.B.3.2.3.7

अ॒मू॒मि॒ति॒ नाम॑ गृ॒ह्णाति॑ । भ॒द्रमे॒वासां॑ क॒र्मावि॑ष्करोति । सा वि॒श्वायुः॑
 सा वि॒श्वव्य॑चाः सा वि॒श्वक॑र्मेत्याह । इ॒यं वै वि॒श्वायुः॑ । अ॒न्तरि॑क्षं
 वि॒श्वव्य॑चाः । अ॒सौ वि॒श्वक॑र्मा । इ॒माने॒वैता॑भिर्लो॒कान् । यथा॑पूर्वं दुहे ।
 अथो॑ यथा॑ प्र॒दात्रे॑ पु॒ण्यमा॑शास्ते । ए॒वमे॒वैना॑ ए॒तदु॑पस्तौति । तस्मा॑त्-
 प्रा॒दादि॒त्युन्नी॑य व॒न्दमा॑ना उ॒पस्तु॑वन्तः प॒शून् दु॒हन्ति॑ । 22 (10)

T.B.3.2.3.8

ब॒हु दु॒ग्धीन्द्रा॑य दे॒वेभ्यो॑ ह॒विरि॑ति वाचं वि॒सृज॑ते । यथा॑ दे॒वतमे॑व
 प्र॒सौति॑ । दै॒व्यस्य॑ च मा॒नुष॑स्य च व्यावृ॒त्यै । त्रि॒राह॑ । त्रि॒षत्या॑ हि
 दे॒वाः । अ॒वाचं॑ य॒मोऽन॑न्वा-र॒भ्योत्तराः॑ । अ॒परि॑मितमे॒वाव॑रुन्धे ।
 न दा॒रुपा॑त्रेण दु॒ह्यात् । अ॒ग्नि॒वद्वै दा॒रुपा॑त्रम् ।
 यद्-दा॒रुपा॑त्रेण दु॒ह्यात् । 23 (10)

T.B.3.2.3.9

या॒तया॒म्ना॒ ह॒वि॒षा॑ य॒जे॒त । अ॒थो॒ ख॒ल्वा॒हुः॑ । पु॒रो॒डा॒श॒मु॒खा॒नि॒ वै
ह॒वी॒ष्णि॑ । ने॒त इ॒तः पु॒रो॒डा॒श॒ ह॒वि॒षो॒ या॒मो॒ऽस्ती॒ति॑ । का॒ममे॒व
दा॒रु॒पा॒त्रेण॑ दु॒ह्यात् । शू॒द्र ए॒व न॑ दु॒ह्यात् । अ॒स॒तो॒ वा ए॒ष सं॒भू॒तः ।
य॒च्छू॒द्रः । अ॒ह॒वि॒रे॒व त॒दि॒त्या॒हुः । य॒च्छू॒द्रो दोग्धी॑ति । 24 (10)

T.B.3.2.3.10

अ॒ग्नि॒हो॒त्रमे॒व न॑ दु॒ह्या॒च्छू॒द्रः । तद्धि॑ नो॒त्-पु॒न॒न्ति॑ । य॒दा ख॒लु वै
प॒वि॒त्रम॒त्ये॒ति॑ । अ॒थ तद्धि॑ वि॒रि॒ति॑ । संपृ॑च्यध्व-मृ॒ता॒वरी॑रि॒त्याह॑ । अ॒पां
चै॒वौष॑धी॒नां च॑ र॒स॒ स॒सृ॑जति । तस्मा॑द॒पां चो॑ष॒धी॒नां च॑ र॒समु॑प
जी॒वामः॑ । म॒न्द्रा ध॒नस्य॑ सा॒तय॑ इ॒त्याह॑ । पु॒ष्टिमे॒व य॒ज॒मा॒ने द॒धा॒ति॑ ।
सो॒मे॒न त्वाऽऽत॑न॒च्मी॒न्द्राय॑ द॒धी॒त्याह॑ । 25 (10)

T.B.3.2.3.11

सो॒ममे॒वैन॑त् करो॒ति॑ । यो॒ वै सो॒मं भ॑क्षयि॒त्वा । सँ॒व॒त्स॒र॒ सो॒मं न॑
पि॒ब॒ति॑ । पु॒नर्भ॑क्ष्यो॒ऽस्य॑ सो॒मपी॒थो भ॑वति । सो॒मः ख॒लु वै सा॑नाय्यम् ।
य ए॒वं वि॒द्वान्थ् सा॑नाय्यं पि॒ब॒ति॑ । अ॒पुन॑र्भ॒क्ष्यो॒ऽस्य॑ सो॒मपी॒थो
भ॑वति । न मृ॒न्मये॑नापि॒दध्या॑त् । यन् मृ॒न्मये॑नापि॒दध्या॑त् ।

पितृदेवत्यञ् स्यात् । 26 (10)

T.B.3.2.3.12

अयस्पात्रेण वा दारुपात्रेण वाऽपि दधाति । तद्धि सदेवम् । उदन्वद्-
भवति । आपो वै रक्षोघ्नीः । रक्षसा-मपहत्यै । अदस्तमसि विष्णवे
त्वेत्याह । यज्ञो वै विष्णुः । यज्ञायैवैनददस्तं करोति । विष्णो हव्यं
रक्षस्वेत्याह गुप्त्यै । अनधः सादयति () । गर्भाणां धृत्या अप्रपादाय ।
तस्माद्-गर्भाः प्रजानाम प्रपादुकाः । उपरीव निदधाति । उपरीव हि
सुवर्गो लोकः । सुवर्गस्य लोकस्य समष्ट्यै । 27 (15)

(असीत्याह – धृत्यै – यजमाने दधा – त्यजामित्वाय – स्थापयति
– दुहे – दुहन्ति – दुह्याद् – दोग्धीति – दधीत्याह – स्यात् –
सादयति पञ्च च) (A3)

3.2.4 अनुवाकं 4 – हविर्निर्वापः

T.B.3.2.4.1

कर्मणो वां देवेभ्यः शक्यमित्याह शक्त्यै । यज्ञस्य वै सन्ततिमनु
प्रजाः पशवो यजमानस्य सन्तायन्ते । यज्ञस्य विच्छित्तिमनु प्रजाः

प॒शवो॑ यज॒मानस्य॑ वि॒च्छिद्यन्ते॑ । य॒ज्ञस्य॑ सन्ततिरसि य॒ज्ञस्य॑ त्वा
सन्त॑त्यै स्तृणामि सन्त॑त्यै त्वा य॒ज्ञस्येत्या॑हवनीयाथ् सन्त॑नोति ।
यज॒मानस्य॑ प्रजायै॑ प॒शूनाञ् सन्त॑त्यै । अपः॑ प्रणयति ।
श्रद्धा॑ वा आपः॑ । श्रद्धामे॒वारभ्य॑ प्रणीय प्रचरति । अपः॑ प्रणयति ।
य॒ज्ञो वा आपः॑ । 28 (10)

T.B.3.2.4.2

य॒ज्ञमे॒वारभ्य॑ प्रणीय प्रचरति । अपः॑ प्रणयति । व॒ज्रो वा आपः॑ ।
व॒ज्रमे॒व भ्रातृ॑व्येभ्यः प्रहृत्य प्रणीय प्रचरति । अपः॑ प्रणयति । आपो॑
वै रक्षो॑घ्नीः । रक्षसा॑-मपहत्यै । अपः॑ प्रणयति । आपो॑ वै दे॒वानां॑
प्रियं॑ धाम । दे॒वानामे॒व प्रियं॑ धाम प्रणीय प्रचरति । 29 (10)

T.B.3.2.4.3

अपः॑ प्रणयति । आपो॑ वै सर्वा॑ दे॒वताः॑ । दे॒वता॑ ए॒वारभ्य॑ प्रणीय
प्रचरति । वेषा॑य त्वेत्याह । वेषा॑य ह्ये॒नदा॑दत्ते । प्रत्युष्ट॑ रक्षः प्रत्युष्टा
अरा॑तय इत्याह । रक्षसा॑-मपहत्यै । धूर॑सीत्याह । ए॒ष वै धुर्यो॑ऽग्निः ।
तं य॑दनुपस्पृश्यातीयात् । 30 (10)

T.B.3.2.4.4

अ॒ध्व॒र्युं च॒ यज॑मा॒नं च॒ प्र॒द॒हेत् । उ॒प॒स्पृ॒श्या॒त्येति॑ । अ॒ध्व॒र्योश्च॒
यज॑मा॒नस्य॑ चा॒प्र॒दा॒हाय॑ । धूर्व॑ त॒म्यो॑ऽस्मा॒न् धूर्व॑ति॒ तं धूर्व॑ यं व॒यं
धूर्वा॑म॒ इत्या॑ह । द्वौ वा॒व पु॑रुषौ । यं चै॒व धूर्व॑ति । यश्चै॒नं धूर्व॑ति ।
तावु॑भौ शु॒चाऽर्प॑यति । त्वं दे॒वाना॑म॒सि स॒स्नि॒त॒मं प॒प्रि॒त॒मं जु॑ष्ट॒त॒मं
व॒ह्नि॒त॒मं दे॒वहू॑त॒ममि॒त्याह॑ । य॒था य॒जु॒रे॒वै तत् । 31 (10)

T.B.3.2.4.5

अ॒हु॒त॒म॒सि ह॒वि॒र्धा॒न॒-मि॒त्या॒हा॒ना॒त्यै॑ । दृ॒ह॒स्व मा॒ ह्वा॒रि॒त्या॒ह धृ॒त्यै॑ ।
मि॒त्र॒स्य॑ त्वा चक्षु॒षा प्रेक्ष॑ इत्या॒ह मि॒त्र॒त्वाय॑ । मा भे॒र्मा स॒म्वि॑क्त्वा
मा त्वा हि॒सि॒ष-मि॒त्या॒हा॒हि॒सा॒यै॑ । यद्वै किं च वा॒तो ना॒भि॒वा॒ति ।
तथ् सर्वं व॑रु॒णदे॒वत्य॑म् । उ॒रु वा॒ताये॑त्या॒ह । अ॒वा॒रु॒णमे॒वैन॑त् करो॒ति ।
दे॒वस्य॑ त्वा स॒वि॒तुः प्र॑स॒व इत्या॑ह प्र॒सू॒त्यै॑ ।
अ॒श्वि॒नोर्-बा॒हु॒भ्यामि॒त्याह॑ । 32 (10)

T.B.3.2.4.6

अ॒श्वि॒नौ हि दे॒वाना॑म॒ध्व॒र्यू आ॒स्ताम्॑ । पू॒ष्णो ह॒स्ता॑भ्यामि॒त्याह॑ य॒त्यै॑ ।
अ॒ग्नये॑ जु॒ष्टं नि॒र्व॒पा॒मी॒त्याह॑ । अ॒ग्नय॑ ए॒वैना॑ञ्जु॒ष्टं नि॒र्व॒पति॑ । त्रि॒र्य॒जु॒षा ।

त्रय॑ इ॒मे लो॒काः । ए॒षां लो॒काना॒माप्त्यै॑ । तू॒ष्णीं चतु॑र्थम् ।

अ॒परि॒मित॒मेवा॒वरु॑न्धे । स ए॒वमे॒वानु॑पूर्व॒ं ह॒वीं॒षि निर्व॑पति । 33 (10)

T.B.3.2.4.7

इ॒दं दे॒वाना॒मिद॑मु॒ नः स॒हेत्या॑ह॒ व्यावृ॑त्त्यै । स्फा॒त्यै त्वा ना॑रा॒त्या
इ॒त्याह॑ गु॒प्त्यै । तम॑सी॒व वा ए॒षोऽन्त॑श्चरति । यः प॑री॒णहि॑ । सु॒वर॑भि
वि॒ख्येषं॑ वै॒श्वान॑रं ज्योति॒रित्या॑ह । सु॒वरे॑वाभि वि प॑श्यति वै॒श्वान॑रं
ज्योतिः॑ । द्या॒वापृ॑थि॒वी ह॒विषि॑ गृही॒त उद॑वेपेताम् । दृ॒हन्तां॑ दु॒र्या
द्या॒वापृ॑थि॒व्योरित्या॑ह । गृ॒हाणां॑ द्या॒वापृ॑थि॒व्योर्-धृ॒त्यै । उर्व॑न्त॒रिक्ष-
मन्वि॑हीत्याह ग॒त्यै () । अ॒दि॒त्यास्त्वो॑प॒स्थे सा॒दया॑मीत्याह ।
इ॒यं वा॑ अ॒दि॒तिः । अ॒स्या ए॒वैन॑दुप॒स्थे सा॒दय॑ति ।

अ॒ग्ने ह॒व्यं र॑क्षस्वेत्याह गु॒प्त्यै । 34 (14)

(य॒ज्ञो वा आ॒पो – धा॒म प्र॑णी॒य प्र॑चर – त॒यती॑या – दे॒तद् –
बा॒हुभ्या॑मित्याह – ह॒विं॒षि निर्व॑पति – ग॒त्यै च॒त्वारि॑ च) (A4)

3.2.5 अनुवाकं 5 – व्रीह्यवघातः

T.B.3.2.5.1

इन्द्रो॑ वृ॒त्रम॑हन् । सो॒ऽपः । अ॒भ्य॒म्रिय॑त । ता॒सां य॑न्मे॒ध्यं य॑ज्ञि॒यꣳ
स॒दे॒वमा॑सीत् । तद॒पोद॑क्रामत् । ते॒ दर्भा॑ अभवन् ।

यद्-दर्भै॑रप॒ उत्पु॑नाति । या ए॒व मे॒ध्या य॑ज्ञि॒याः स॒दे॒वा आपः॑ ।
ताभि॑रे॒वैना॒ उत्पु॑नाति । द्वाभ्या॑मुत्पु॒नाति । 35 (10)

T.B.3.2.5.2

द्वि॒पाद्-य॑ज॒मानः॑ प्र॒तिष्ठि॑त्यै । दे॒वो वः॑ स॒वितो॑त्-पु॒नात्वि॑त्याह ।
स॒वि॒तृप्र॑सू॒त ए॒वैना॒ उत्पु॑नाति । अ॒च्छि॒द्रेण॑ प॒वित्रे॑णेत्याह ।
अ॒सौ वा आ॑दि॒त्योऽच्छि॑द्रं प॒वित्र॑म् । ते॒नै॒वैना॒ उत्पु॑नाति ।
व॒सोः सूर्य॑स्य र॒श्मिभि॑रि॒त्याह॑ । प्रा॒णा वा आपः॑ । प्रा॒णा व॑सवः ।
प्रा॒णा र॒श्मयः॑ । 36 (10)

T.B.3.2.5.3

प्रा॒णैरे॒व प्रा॑णान्त् संपृ॑णक्ति । सा॒वि॒त्रि॒या॒र्चा । स॒वि॒तृप्र॑सू॒तं मे॒
क॒र्मा॒सदि॑ति । स॒वि॒तृप्र॑सू॒तमे॒वास्य॑ क॒र्म भ॑वति । प॒च्छो गाय॑त्रि॒या
त्रि॒ष्वमृ॑द्ध॒त्वाय॑ । आपो॑ दे॒वीर॑ग्रे॒षुवो॑ अ॒ग्रेगु॑व इत्याह ।

रूप-मे॒वासा॒मेतन्-महि॒मानं॑ व्याचष्टे । अग्र॑ इ॒मं य॒ज्ञं न॑यताग्रे
य॒ज्ञप॑तिमित्याह । अग्रे॑ ए॒व य॒ज्ञं न॑यन्ति । अग्रे॑ य॒ज्ञप॑तिम् । 37 (10)

T.B.3.2.5.4

युष्मा॑निद्रो ऽवृ॒णीत॑ वृ॒त्रतू॑र्ये यू॒यमिन्द्र॑मवृ॒णीध्वं॑ वृ॒त्रतू॑र्य इत्याह ।
वृ॒त्रं ह॑ ह॒निष्य॑न्निन्द्र॒ आपो॑ व॒त्रे । आपो॑ हेन्द्रं॑ व॒त्रिरे॑ । सं॒ज्ञा-
मे॒वासा॒मेतत्-सा॒मानं॑ व्याचष्टे । प्रो॒क्षिताः॑ स्थेत्याह । तेनापः
प्रो॒क्षिताः॑ । अ॒ग्नये॑ वो जुष्टं॑ प्रोक्षा-म्य॒ग्नीषो॑माभ्या-मित्याह ।
यथा॑ दे॒वत॑मे॒वैनान्॑ प्रोक्षति । त्रिः प्रोक्षति । त्र्यावृ॒द्धि य॒ज्ञः । 38 (10)

T.B.3.2.5.5

अथो॑ रक्ष॒साम॑प॒हत्यै॑ । शु॒न्धध्वं॑ दै॒व्याय॑ क॒र्मणे॑ दे॒वय॑ज्याया इत्याह ।
दे॒वय॑ज्याया ए॒वैनानि॑ शु॒न्धति॑ । त्रिः प्रोक्षति । त्र्यावृ॒द्धि य॒ज्ञः । अथो॑
मे॒ध्यत्वाय॑ । अ॒वधू॑तं रक्षो॒ऽवधू॑ता अ॒रात॑य इत्याह । रक्ष॒सा-म॑प॒हत्यै॑ ।
अदि॒त्यास्त्व॑गसीत्याह । इ॒यं वा॑ अदि॒तिः । 39 (10)

T.B.3.2.5.6

अस्या॑ ए॒वैनत् त्वचं॑ करोति । प्रति॑ त्वा पृथि॒वी वे॒त्त्वित्याह॑ प्रतिष्ठित्यै ।
पु॒रस्ता॑त् प्र॒तीची॑न॒ग्रीव॑-मु॒त्तर॑लोमोपस्तृणाति मे॒ध्यत्वाय॑ ।

तस्मात् पुरस्तात् प्रत्यञ्चः पशवो मेधमुपतिष्ठन्ते । तस्मात् प्रजा
मृगं ग्राहुकाः । यज्ञो देवेभ्यो निलायत । कृष्णो रूपं कृत्वा ।
यत् कृष्णाजिने हविरध्यवहन्ति । यज्ञादेव-तद्-यज्ञं प्रयुङ्क्ते ।
हविषोऽस्कन्दाय । 40 (10)

T.B.3.2.5.7

अधिषवणमसि वानस्पत्यमित्याह । अधिषवण-मेवैनत् करोति ।
प्रति त्वाऽदित्यास्त्वग्वेत्त्वित्याह सयत्वाय । अग्नेस्तनू-रसीत्याह ।
अग्नेर्वा एषा तनूः । यदोषधयः । वाचो विसर्जनमित्याह ।
यदा हि प्रजा ओषधीना-मश्नन्ति । अथ वाचं विसृजन्ते ।
देववीतये त्वा गृह्णामीत्याह । 41 (10)

T.B.3.2.5.8

देवताभिरेवैनत् समर्धयति । अद्रिरसि वानस्पत्य इत्याह । ग्रावाण-
मेवैनत् करोति । स इदं देवेभ्यो हव्यं सुशमि शमिष्वेत्याह शान्त्यै ।
हविष्कृदेहीत्याह । य एव देवानां हविष्कृतः । तान् ह्वयति ।
त्रिह्वयति । त्रिषत्या हि देवाः । इषमा वदोर्जमा वदेत्याह । 42 (10)

T.B.3.2.5.9

इ॒षमे॒वोर्जं॑ य॒ज॒मा॒ने द॒धा॒ति । द्यु॒म॒द्व॒द॒त व॒य॒ꣳ सं॒घा॒तं जे॒ष्मे॒त्याह॑
 भ्रा॒तृ॒व्याभि॒भू॒त्यै । म॒नोः॑ श्र॒द्धादे॒वस्य॑ य॒ज॒मा॒नस्या॒सुर॒घ्नी वाक् ।
 य॒ज्ञायु॒धेषु॑ प्र॒वि॒ष्टाऽऽसी॑त् । तेऽसु॒रा या॒व॒न्तो य॒ज्ञायु॒धाना॑मु॒द्व॒द॒ता-
 मु॒पा॒शृ॒ण्वन् । ते॒ परा॑ऽभवन् । तस्मा॑त् स्व॒ानां म॒ध्येऽव॒साय॑ य॒जेत॑ ।
 या॒व॒न्तोऽस्य॑ भ्रा॒तृ॒व्या य॒ज्ञायु॒धाना॑-मु॒द्व॒द॒ता-मु॒प॒शृ॒ण्वन्ति॑ ।
 ते॒ परा॑ भ॒वन्ति॑ । उ॒च्चैः स॒मा॒ह॒न्त॒वा आ॒ह वि॒जि॒त्यै । 43 (10)

T.B.3.2.5.10

वृ॒द्ध ए॒षामि॒न्द्रि॒यं वी॒र्य॑म् । श्रे॒ष्ठ ए॒षां भ॒वति॑ । व॒र्ष वृ॒द्धम॒सि प्र॒ति
 त्वा व॒र्षवृ॒द्धं वै॒त्वि॒त्याह॑ । व॒र्षवृ॒द्धा वा ओ॒ष॒धयः॑ । व॒र्षवृ॒द्धा
 इ॒षी॒काः स॒मृ॒द्ध्यै । य॒ज्ञꣳ र॒क्षाꣳस्य॑नु॒ प्रा॒वि॒शन् । ता॒न्य॒स्ना प॒शुभ्यो॑
 नि॒र॒वा॒द॒यन्त॑ । तु॒षैरो॒ष॒धी॒भ्यः । प॒रापू॒तꣳ र॒क्षः॑ प॒रापू॒ता अ॒रा॒तय॑
 इ॒त्याह॑ । र॒क्ष॒सा॒म॒प॒ह॒त्यै । 44 (10)

T.B.3.2.5.11

र॒क्ष॒सां भा॒गोऽसी॑त्याह । तु॒षैरे॒व र॒क्षाꣳसि॑ नि॒र॒व॒द॒यते॑ । अ॒प
 उ॒प॒स्पृ॒श॒ति मे॒ध्य॒त्वाय॑ । वा॒युर्वो॑ वि वि॒न॒क्त्वि॒त्याह॑ । प॒वि॒त्रं वै वा॒युः ।

पु॒नात्ये॒वैनान् । अ॒न्तरि॒क्षादि॒व वा ए॒ते प्र॒स्कन्द॑न्ति । ये शू॒र्पात् ।
 दे॒वो वः॑ स॒विता॑ हि॒रण्य॑पाणिः प्र॒तिगृ॑ह्णा॒त्वित्या॑ह प्र॒तिष्ठि॑त्यै ।
 ह॒विषो॑ऽस्क॒न्दाय॑ () । त्रि॒ष्फली॑कर्त॒वा आ॑ह । त्र्या॒वृद्धि॑ य॒ज्ञः ।
 अथो॑ मे॒ध्यत्वाय॑ । 45 (13) (द्वा॒भ्यामु॑त् पु॒नाति॑ – र॒श्मयो॑ – न॒यन्त्य॑ग्रे
 य॒ज्ञप॑तिं – य॒ज्ञो – ऽदि॑ति – र॒स्कन्दा॑य – गृ॒ह्णामी॑त्याह – व॒देत्या॑ह
 – वि॒जित्या॑ – अ॒पह॑त्या – अ॒स्कन्दा॑य त्रीणि॑ च) (A5)

3.2.6 अनुवाकं 6 – तण्डुलपेषणम्

T.B.3.2.6.1

अ॒वधू॑त् र॒क्षोऽव॑धू॒ता अ॒रात॑य इ॒त्याह॑ । र॒क्षसा॑म॒पह॑त्यै ।
 अ॒दित्या॑स्त्व॒गसी॑त्याह । इ॒यं वा॑ अ॒दितिः॑ ।
 अ॒स्या ए॒वैन॑त् त्वचं॑ करोति । प्र॒ति त्वा॑ पृथि॒वी वे॒त्त्वित्या॑ह प्र॒तिष्ठि॑त्यै ।
 पु॒रस्ता॑त् प्र॒तीची॑न॒ग्रीव॑-मु॒त्तर॑लो॒मोप॑स्तृणाति मे॒ध्यत्वाय॑ ।
 तस्मा॑त् पु॒रस्ता॑त् प्र॒त्यञ्चः॑ प॒शवो॑ मे॒धमु॑पतिष्ठन्ते ।
 तस्मा॑त् प्र॒जा मृ॑गं ग्राहु॒काः । य॒ज्ञो दे॒वेभ्यो॑ नि॒लाय॑त । 46 (10)

T.B.3.2.6.2

कृ॒ष्णो रू॒पं कृ॒त्वा । यत् कृ॒ष्णाजि॒ने ह॒विरधि॑पिनष्टि । य॒ज्ञादे॒व तद्
य॒ज्ञं प्र॒युङ्क्ते । ह॒विषोऽ॒स्कन्दा॑य । द्या॒वापृ॑थि॒वी सहा॑स्ताम् ॥
ते श॒म्यामा॒त्रमे॒कमह॑र्व्येता ॥ श॒म्यामा॒त्रमे॒कमहः॑ । दि॒वः स्क्म॑म्भ॒निर॑सि
प्रति॑ त्वा ऽदि॒त्यास्त्व॑ग्वे॒त्त्वित्या॑ह । द्या॒वापृ॑थि॒व्योर् वी॒त्यै ॥
धि॒षणा॑ऽसि प॒र्वत्या॑ प्रति॑ त्वा दि॒वः स्क्म॑म्भ॒निर्वे॑त्त्वित्या॑ह ।
द्या॒वापृ॑थि॒व्योर् वि॒धृत्यै॑ । 47 (10)

T.B.3.2.6.3

धि॒षणा॑ऽसि पा॒र्वते॑यी प्रति॑ त्वा प॒र्वति॑र्वे॒त्त्वित्या॑ह । द्या॒वापृ॑थि॒व्योर्धृत्यै॑ ॥
दे॒वस्य॑ त्वा स॒वितुः॑ प्र॒सव॑ इत्या॒ह प्र॒सूत्यै॑ ॥ अ॒श्विनो॑र् बा॒हुभ्या॑मित्या॒ह ।
अ॒श्विनौ॑ हि दे॒वाना॑मध्व॒र्यू आ॑स्ताम् । पू॒ष्णो ह॑स्ता॒भ्यामि॑त्या॒ह य॒त्यै ॥
अधि॑व॒पामी॑त्या॒ह । यथा॑दे॒वत॑-मे॒वैनान॑धि व॒पति॑ । धा॒न्यम॑सि धि॒नुहि॑
दे॒वानि॑त्या॒ह । ए॒तस्य॑ य॒जुषो॑ वी॒र्ये॑ण । 48 (10)

T.B.3.2.6.4

याव॑दे॒का दे॒वता॑ का॒मय॑ते याव॑दे॒का । ताव॑दाहु॒तिः प्र॑थ॒ते । न हि
तद॑स्ति । यत्ता॑वदे॒व स्या॑त् । याव॑ज्जु॒होति॑ । प्रा॒णाय॑ त्वाऽपानाय॑

त्वेत्याह । प्राणानेव यजमाने दधाति । दीर्घामनु प्रसितिमायुषे
 धामित्याह । आयुरेवास्मिन् दधाति । अन्तरिक्षादिव वा एतानि
 प्रस्कन्दन्ति () । यानि दृषदः । देवो वः सविता हिरण्यपाणिः प्रति
 गृह्णात्वित्याह प्रतिष्ठित्यै । हविषोऽस्कन्दाय । असम्वपन्ती
 पिष्पाणूनि कुरुतादित्याह मेध्यत्वाय । 49 (14)

(निलायत – विधृत्यै – वीर्येण – स्कन्दन्ति चत्वारि च) (A6)

3.2.7 अनुवाकं 7 – कपालोपधानम्

T.B.3.2.7.1

धृष्टिरसि ब्रह्म यच्छेत्याह धृत्यै । अपाग्ने ऽग्निमामादं जहि
 निष्क्रव्यादं सेधा देवयजं वहेत्याह । य एवामात्क्रव्यात् । तमपहत्य ।
 मेध्येऽग्नौ कपालमुपदधाति । निर्दग्धं रक्षो निर्दग्धा अरातय
 इत्याह । रक्षाऽस्येव निर्दहति । अग्निवत्युपदधाति ।

अस्मिन्नेव लोके ज्योतिर्धत्ते । अङ्गारमधि-वर्तयति । 50 (10)

T.B.3.2.7.2

अन्तरिक्ष एव ज्योतिर्धत्ते । आदित्यमेवामुष्मिन् लोके ज्योतिर्धत्ते ।

ज्योतिष्मन्तोऽस्मा इमे लोका भवन्ति । य एवं वेद । ध्रुवमसि
पृथिवीं दृष्ट्वेत्याह । पृथिवीमेवैतेन दृष्ट्वेति । धर्ममस्यन्तरिक्षं
दृष्ट्वेत्याह । अन्तरिक्षमेवैतेन दृष्ट्वेति । धरुणमसि दिवं दृष्ट्वेत्याह ।
दिवमेवैतेन दृष्ट्वेति । 51 (10)

T.B.3.2.7.3

धर्मासि दिशो दृष्ट्वेत्याह । दिश एवैतेन दृष्ट्वेति । इमानेवैतैर्
लोकान् दृष्ट्वेति । दृष्ट्वे हन्तेऽस्मा इमे लोकाः प्रजया पशुभिः ।
य एवं वेद । त्रीण्यग्रे कपालान्युपदधाति । त्रय इमे लोकाः ।
एषां लोकानामाप्यै ॥ एकमग्रे कपालमुपदधाति । एकं वा अग्रे
कपालं पुरुषस्य संभवति । 52 (10)

T.B.3.2.7.4

अथ द्वे । अथ त्रीणि । अथ चत्वारि । अथाष्टौ । तस्मादष्टाकपालं
पुरुषस्य शिरः । यदेवं कपालान्युप दधाति । यज्ञो वै प्रजापतिः ।
यज्ञमेव प्रजापतिः सः स्मरति । आत्मानमेव तथ् स्मरति ।
तः सः स्मृतमात्मानम् ॥ 53 (10)

T.B.3.2.7.5

अमुष्मिन् लोकेऽनुपरैति । यदष्टावुपदधाति । गायत्रिया तथ्
संमितम् । यन्नव । त्रिवृता तत् । यद् दश । विराजा तत् ।
यदेकादश । त्रिष्टुभा तत् । यद्द्वादश । 54 (10)

T.B.3.2.7.6

जगत्या तत् । छन्दः संमितानि स उपदधत् कपालानि । इमान्
लोकाननुपूर्वं दिशो विधृत्यै दृहति । अथायुः प्राणान् प्रजां पशून्
यजमाने दधाति । सजातानस्मा अभितो बहुलान् करोति ।
चितः स्थेत्याह । यथा यजुरेवैतत् । भृगूणामङ्गिरसां तपसा
तप्यध्वमित्याह । देवताना-मेवैनानि तपसा तपति । तानि ततः
सञ्स्थिते () । यानि घर्मे कपालान् युपचिन्वन्ति वेधस इति
चतुष्पदयर्चा विमुञ्चति । चतुष्पादः पशवः । पशुष्वेवोपरिष्ठात्
प्रतितिष्ठति । 55 (13)

(वर्तयति – दिवमेवैतेन दृहति – सम्भवति –

तत् सञ्स्कृतमात्मानं – द्वादश – सञ्स्थिते त्रीणि च) (A7)

3.2.8 अनुवाकं 8 – पुरोडाशानिष्पादनम्

T.B.3.2.8.1

दे॒वस्य॑ त्वा स॒वितुः॑ प्र॒सव॑ इत्याह प्र॒सू॒त्यै॑ । अ॒श्विनो॑र् बा॒हुभ्या॑मित्याह ।
अ॒श्विनौ॑ हि दे॒वाना॑मध्व॒र्यू आ॒स्ताम्॑ । पू॒ष्णो ह॒स्ताभ्या॑मित्याह य॒त्यै॑ ।
सम्॑व॒पामी॑त्याह । यथा दे॒वत॑मे॒वैनानि॑ सम्॑व॒पति॑ । समा॑पो
अ॒द्भि॒रग॑मत॒ समो॑ष॒धयो॑ र॒सेने॑त्याह । आपो॑ वा ओ॒षधी॑र्-जि॒न्वन्ति॑ ।
ओ॒षधयो॑ऽपो जि॒न्वन्ति॑ । अ॒न्या वा ए॒तासा॑म॒न्या जि॒न्वन्ति॑ । 56 (10)

T.B.3.2.8.2

तस्मा॑दे॒वमा॑ह । सꣳ रे॒वती॑र्-जग॑तीभिर्-मधु॑मतीर्-मधु॑मतीभिः
सृ॒ज्यध्व॑मित्याह । आपो॑ वै रे॒वतीः॑ । प॒शवो॑ जग॑तीः । ओ॒षधयो॑
मधु॑मतीः । आप॑ ओ॒षधीः॑ प॒शून् । ता॒नेवा॑स्मा ए॒कधा॑ सꣳसृ॒ज्य ।
मधु॑मतः करोति । अ॒द्भ्यः परि॑ प्रजा॒ताः स्थ॑ सम॒द्भिः पृ॑च्यध्वमि॒ति
पर्या॑प्लावयति । यथा सु॒वृष्ट॑ इ॒माम॑नु वि॒सृत्य॑ । 57 (10)

T.B.3.2.8.3

आप॑ ओ॒षधी॑र्म॒हय॑न्ति । तादृ॑गे॒व तत् । जन॑यत्यै त्वा सम्॑यौमीत्याह ।
प्रजा॑ ए॒वैते॑न दा॒धार । अ॒ग्नये॑ त्वाऽग्नी॒षोमा॑भ्यामित्याह व्यावृ॑त्यै ।

म॒खस्य॑ शि॒रोऽसी॑त्याह । य॒ज्ञो वै म॒खः । तस्यै॑तच्छि॒रः ।

यत् पु॒रोडा॑शः । तस्मा॑दे॒वमा॑ह । 58 (10)

T.B.3.2.8.4

घ॒र्मोऽसि॑ वि॒श्वायु॑रित्याह । वि॒श्वमे॑वायु॒र् यज॑माने दधाति ।

उ॒रु प्र॑थस्वो॒रु ते य॒ज्ञप॑तिः प्रथता॑मित्याह । यज॑मानमे॒व प्र॑जया

प॒शुभिः॑ प्रथयति । त्वचं॑ गृ॒ह्णी॒ष्वेत्या॑ह । स॒र्वमे॑वैनं॒ सत॑नुं करोति ।

अथाप॑ आ॒नीय॒ परि॑ मा॒र्ष्टि । मा॒स ए॒व तत् त्वचं॑ दधाति ।

॥ तस्मा॑त् त्वचा॒ मा॒सं छ॒न्नम् । घ॒र्मो वा ए॒षोऽशान्तः॑ ॥ 59 (10)

T.B.3.2.8.5

अ॒र्धमा॑से॒र्धमा॑से प्रवृ॑ज्यते । यत् पु॒रोडा॑शः । स ई॒श्वरो॑ यज॑मानं॒

शु॒चा प्र॑दहः । पर्य॑ग्नि करोति । प॒शुमे॑वैनम॒कः । शान्त्या॑ अप्र॑दाहाय ।

त्रिः पर्य॑ग्नि करोति । त्र्या॑वृद्धि य॒ज्ञः । अथो॑ रक्ष॒साम॑पहत्यै ।

अ॒न्तरि॑तं॒ रक्षो॑ऽन्तरि॒ता अ॑रातय॒ इत्या॑ह । 60 (10)

T.B.3.2.8.6

रक्ष॑सा-मन्त॒र्.हि॑त्यै । पु॒रोडा॑शं वा अधि॑श्रितं॒ रक्षा॑स्यजिघा॒सन् ।

दि॒वि ना॒को ना॒माग्नी॑ रक्षो॒हा । स ए॒वास्मा॑द्-रक्षा॑स्यपा॒हन् ।

दे॒वस्त्वा॑ स॒विता॑ श्र॒पय॑त्वित्याह । स॒वितृ॑प्रसू॒त ए॒वैन॑ꣳ श्र॒पय॑ति ।
 वर्॒षिष्ठे॑ अ॒धि ना॒क इ॒त्याह॑ । र॒क्ष॒साम॑प॒हत्यै॑ । अ॒ग्निस्ते॑ त॒नुवं॑ मा॒ऽति॑
 धा॒गित्या॑हा॒नति॑दाहाय । अ॒ग्ने ह॒व्यꣳ र॒क्ष॒स्वेत्या॑ह गु॒प्त्यै॑ ॥ 61 (10)

T.B.3.2.8.7

अ॒विद॑हन्तः श्र॒पय॑तेति वाचं॑ वि॒सृज॑ते । य॒ज्ञमे॒व ह॒वीꣳष्य॑भि॒व्याह॑त्य
 प्र॒तनु॑ते । पु॒रोरु॑चमवि॒दाहाय॑ शृ॒त्यै करो॑ति । म॒स्तिष्क॑ो वै पु॒रोडा॑शः ।
 तं य॑न्नाभि॒वास॑येत् । आ॒विर्म॑स्तिष्कः स्यात् । अ॒भिवा॑सयति ।
 तस्मा॑द्-गुहा॑ म॒स्तिष्कः॑ । भ॒स्मना॑ऽभि वा॒सय॑ति ।
 तस्मा॑न् माꣳसे॒नास्थि॑ छ॒न्नम् ॥ 62 (10)

T.B.3.2.8.8

वे॒देना॑भि वा॒सय॑ति । तस्मा॑त् के॒शैः शि॒रः छ॒न्नम् । अ॒खल॑तिभा॒वुको॑
 भ॒वति॑ । य ए॒वं वे॒द । प॒शोर्वै॑ प्र॒तिमा॑ पु॒रोडा॑शः । स ना॒यजु॑ष्क-
 म॒भिवा॑स्यः । वृ॒थेव॑ स्यात् । ई॒श्वरा॑ य॒जमा॑नस्य प॒शवः॑ प्र॒मेतोः॑ ।
 सं ब्र॑ह्मणा पृ॒च्यस्वे॑त्याह । प्रा॒णा वै ब्र॑ह्म ॥ 63 (10)

T.B.3.2.8.9

प्रा॒णाः प॒शवः॑ । प्रा॒णैरे॒व प॒शून्त् संपृ॑णक्ति । न प्र॒मायु॑का भवन्ति ।
यज॑मानो॒ वै पु॒रोडा॑शः । प्र॒जा प॒शवः॑ पु॒रीष॑म् । यदे॒वम॑भि वा॒सय॑ति ।
यज॑मानमे॒व प्र॒जया॑ प॒शुभिः॑ स॒मर्ध॑यति । दे॒वा वै ह॒विर् भृ॒त्वाऽब्रु॑वन् ।
कस्मि॑न्निदं म॒क्ष्याम॑ह इति । सोऽ॒ग्निर॑ब्रवीत् । 64 (10)

T.B.3.2.8.10

मयि॑ त॒नूः संनि॑धध्वम् । अ॒हं व॑स्तं ज॒नयि॑ष्यामि । यस्मि॑न् म॒क्ष्यध्व॑
इति॑ । ते दे॒वा अ॒ग्नौ त॒नूः सं न्य॑दधत । तस्मा॑दाहुः । अ॒ग्निः सर्वा॑
दे॒वता॑ इति॑ । सोऽ॒ङ्गारे॑णापः । अ॒भ्यपा॑तयत् । तत॑ ए॒कतो॑ऽजायत ।
स द्वि॑तीयम॒भ्यपा॑तयत् । 65 (10)

T.B.3.2.8.11

ततो॑ द्वि॒तोऽजा॑यत । स तृ॒तीय॑-म॒भ्यपा॑तयत् । तत॑-स्त्रि॒तोऽजा॑यत ।
यद्द॒भ्योऽजा॑यन्त । तदा॒प्याना॑माप्यत्वम् । यदा॒त्मभ्यो॑ ऽजायन्त ।
तदा॒त्म्याना॑-मात्म्यत्वम् । ते दे॒वा आ॒प्येष्व॑मृजत । आ॒प्या अ॑मृजत
सू॒र्याभ्यु॑दिते । सू॒र्याभ्यु॑दितः सू॒र्याभि॑निमुक्ते । 66 (10)

T.B.3.2.8.12

सूर्या॑भिनि॒मु॒क्तः कु॒न॒खि॒नि । कु॒न॒खी॑ श्याव॑दति । श्याव॑दन्न॒ग्रदि॑धिषौ ।
अ॒ग्रदि॑धिषुः परि॒वित्ते॑ । परि॒वित्तो॑ वी॒रह॑णि । वी॒रहा॑ ब्र॒ह्मह॑णि ।
तद्ब्र॒ह्मह॑णं नात्य॒च्यव॑त । अ॒न्तर्वे॑दि नि॒नय॑त्यव॒रुध्यै॑ । उ॒ल्मुके॑नाभि
गृ॒ह्णाति॑ शृ॒तत्वा॑य । शृ॒तका॑मा इव हि दे॒वाः () । 67 (10)

(अ॒न्या जि॒न्वन्-त्य॑नु॒वि॒सृत्यै॑-व॒मा-हा॑शा॒न्त-आ॒ह-गु॒प्त्यै॑-छ॒न्नं -
ब्र॒ह्मा-ब्र॑वीद्-द्वि॒तीय॑म॒भ्यपा॑तय॒त्-सूर्या॑भिनि॒मु॒क्ते-दे॒वाः) (A8)

3.2.9 अनुवाकं 9 – वेदिकरणम्

T.B.3.2.9.1

दे॒वस्य॑ त्वा स॒वितुः॑ प्र॒सव॑ इति स्फ्य॒माद॑त्ते प्र॒सू॒त्यै । अ॒श्विनो॑र्-
बाहु॑भ्यामि॒त्याह॑ । अ॒श्विनौ॑ हि दे॒वाना॑मध्व॒र्यू आ॑स्ताम् ।
पू॒ष्णो ह॑स्ता॒भ्यामि॒त्याह॑ य॒त्यै । आ॒दद॑ इन्द्र॒स्य बा॒हुर॑सि दक्षि॒ण
इ॒त्याह॑ । इन्द्रि॒यमे॒व य॑ज॒माने॑ दधाति । स॒हस्र॑भृ॒ष्टिः श॑तते॒जा इ॒त्याह॑ ।
रू॒पमे॒वा॒स्यैत॑न्-महि॒मानं॑ व्याच॒ष्टे । वा॒युर॑सि ति॒ग्मते॑जा इ॒त्याह॑ ।
ते॒जो वै वा॒युः । 68 (10)

T.B.3.2.9.2

तेज॑ ए॒वास्मिन् द॑धाति । वि॒षाद्वै॑ ना॒मासुर॑ आ॒सीत् । सोऽ॑बिभेत् ।
यज्ञे॑न मा दे॒वा अ॒भिभ॑विष्यन्तीति । स पृ॒थि॒वीम॑भ्यवमीत् ।
सा ऽमे॒ध्या ऽभ॑वत् । अथो॒ यदिन्द्रो॑ वृ॒त्रम॑हन् ।
तस्य॑ लो॒हितं॑ पृ॒थि॒वीम॑नु व्यधावत् । सा ऽमे॒ध्या ऽभ॑वत् ।
पृ॒थि॒वि दे॒वय॑जनीत्याह । 69 (10)

T.B.3.2.9.3

मे॒ध्यामे॒वैनां॑ दे॒वय॑जनीं करोति । ओष॑ध्यास्ते मूलं॑ मा
हि॒सि॒षमि॑त्याह । ओष॑धीना-महि॒सायै॑ । व्रजं॑ गच्छ
गो॒स्थान॑मि॒त्याह । छन्दा॑सि वै व्रजो गो॒स्थानः॑ । छन्दा॑स्ये॒वास्मै॑
व्रजं॑ गो॒स्थानं॑ करोति । वर्ष॑तु ते द्यौरि॒त्याह । वृष्टि॑र्वै द्यौः ।
वृष्टि॑मे॒वाव॑रुन्धे । ब॒धान॑ दे॒व स॑वितः पर॒मस्यां॑ परावतीत्याह । 70 (10)

T.B.3.2.9.4

द्वौ वाव॑ पु॒रुषौ॑ । यं चै॒व द्वेष्टि॑ । यश्चैनं॑ द्वेष्टि । तावु॒भौ ब॑ध्नाति
पर॒मस्यां॑ परावति॑ श॒तेन॑ पाशैः॑ । योऽस्मा॑न् द्वेष्टि॑ यं च व॒यं
द्विष्म॑स्तमतो॒ मा मौ॒गि॒त्याहा॑निमु॒क्त्यै॑ । अ॒रुर्वै॑ ना॒मासुर॑ आ॒सीत् ।

स पृ॒थि॒व्यामु॒प॒म्लु॒प्तोऽश॑यत् । तं दे॒वा अप॑हतोऽरुः पृ॒थि॒व्या इति॑
पृ॒थि॒व्या अपा॑घ्नन् । भ्रातृ॑व्यो वा अरुः । अप॑हतोऽरुः पृ॒थि॒व्या
इति॑ यदाह । 71 (10)

T.B.3.2.9.5

भ्रातृ॑व्यमे॒व पृ॒थि॒व्या अप॑हन्ति । तेऽम॑न्यन्त । दि॒वं वा॑ अ॒य॒मितः
पति॑ष्यतीति । तमरु॑स्ते दि॒वं मा स्का॑निति दि॒वः पर्य॑बाधन्त ।
भ्रातृ॑व्यो वा अरुः । अरु॑स्ते दि॒वं मा स्का॑निति यदाह । भ्रातृ॑व्यमे॒व
दि॒वः परि॑बाधते । स्तम्ब॑ यजुर्हरति । पृ॒थि॒व्या ए॒व भ्रातृ॑व्य-
मप॑हन्ति । द्वि॒तीयं॑ हरति । 72 (10)

T.B.3.2.9.6

अन्तरि॑क्षादे॒वैन-म॑पहन्ति । तृ॒तीयं॑ हरति । दि॒व ए॒वैन-म॑पहन्ति ।
तूष्णीं॑ चतु॒र्थं॑ हरति । अपरि॑मितादे॒वैन-म॑पहन्ति । असुरा॑णां वा
इ॒यम॑ग्र आसीत् । याव॑दासीनः परा पश्यति । तावद्-दे॒वाना॑म् ।
ते दे॒वा अब्रु॑वन् । अ॒स्त्वे॒व नोऽस्या॑मपीति । 73 (10)

T.B.3.2.9.7

क्य॑न्नो दा॒स्यथे॑ति । याव॑त्स्वयं॑ परि॒गृह्णी॑थेति ।
 ते वस॑वस्त्वेति॑ दक्षि॒णतः॑ पर्य॒गृह्णन् । रु॒द्रास्त्वेति॑ प॒श्चात् ।
 आ॒दि॒त्या-स्त्वेत्यु॑त्तरतः । ते॒ऽग्नि॑ना प्रा॒ञ्चोऽज॑यन् ।
 वसु॑भिर् दक्षि॒णा । रु॒द्रैः प्र॒त्यञ्चः॑ । आ॒दि॒त्यैरु॑दञ्चः ।
 यस्यै॒वं वि॒दुषो॑ वेदिं॑ परि॒ गृह्ण॑न्ति । 74 (10)

T.B.3.2.9.8

भव॑त्यात्म॒ना । परा॑ऽस्य भ्रातृ॒व्यो भव॑ति । दे॒वस्य॑ सवि॒तुः सव॑ इत्याह॒
 प्र॒सूत्यै॑ । कर्म॑ कृ॒ण्वन्ति वे॒धस॑ इत्याह । इ॒षित॑ हि कर्म॑ क्रियते॑ ।
 पृ॒थि॒व्यै मे॒ध्यं चा॒मे॒ध्यं च॒ व्यु॑दक्रामताम् । प्रा॒चीन॑-मु॒दीची॑नं मे॒ध्यम् ।
 प्र॒तीची॑नं दक्षि॒णा ऽमे॒ध्यम् । प्रा॒चीमु॒दीचीं॑ प्रव॒णां करो॑ति ।
 मे॒ध्यामे॒वैनां॑ दे॒वय॑जनीं करोति । 75 (10)

T.B.3.2.9.9

प्रा॒ञ्चौ वे॒द्यं सा॒वुन्न॑यति । आ॒हव॑नियस्य परि॒गृही॑त्यै । प्र॒तीची॑
 श्रो॒णी । गा॒र्हप॑त्यस्य परि॒गृही॑त्यै । अथो॑ मिथु॒नत्वाय॑ । उ॒द्धन्ति॑ ।
 यदे॒वास्या॑ अमे॒ध्यम् । तद॑प॒हन्ति॑ । उ॒द्धन्ति॑ । तस्मा॑दोष॒धयः॑

पराभवन्ति । 76 (10)

T.B.3.2.9.10

मूलं छिनत्ति । भ्रातृव्यस्यैव मूलं छिनत्ति । मूलं वा अतितिष्ठद्-
रक्षा७स्यनूत् पिपते । यद्धस्तेन छिन्द्यात् । कुनखिनीः प्रजाः स्युः ।
स्फ्येन छिनत्ति । वज्रो वै स्फ्यः । वज्रेणैव यज्ञाद्-रक्षा७स्यपहन्ति ।
पितृदेवत्या ऽतिखाता । इयतीं खनति । 77 (10)

T.B.3.2.9.11

प्रजापतिना यज्ञमुखेन संमिताम् । वेदिर्देवेभ्यो निलायत ।
तां चतुरङ्गुले ऽन्वविन्दन् । तस्माच्चतुरङ्गुलं खेया । चतुरङ्गुलं खनति ।
चतुरङ्गुले ह्योषधयः प्रतितिष्ठन्ति । आप्रतिष्ठायै खनति ।
यजमानमेव प्रतिष्ठां गमयति । दक्षिणतो वर्षीयसीं करोति ।
देवयजनस्यैव रूपमकः । 78 (10)

T.B.3.2.9.12

पुरीषवतीं करोति । प्रजा वै पशवः पुरीषम् । प्रजयैवैनं पशुभिः
पुरीषवन्तं करोति । उत्तरं परिग्राहं परिगृह्णाति । एतावती वै पृथिवी ।
यावती वेदिः । तस्या एतावत एव भ्रातृव्यं निर्भज्य ।

आत्मन॑ उत्तरं॑ परि॒ग्राहं॑ परि॒गृह्णाति॑ ।

ऋ॒त-म॑स्य॒तस॑दन-म॑स्य॒तश्री॑रसी॒त्याह॑ । य॒था य॑जु॒रेवै॑ तत् । 79 (10)

T.B.3.2.9.13

क्रू॒रमि॑व वा ए॒तत् क॑रोति । यद्वेदिं॑ क॑रोति । धा॑ अ॒सि स्व॑धा अ॒सीति॑
यो॒युष्य॑ते शान्त्यै॑ ॥ उ॒र्वी चा॑सि व॒स्वी चा॑सी॒त्याह॑ । उ॒र्वीमे॑वैनां॑ व॒स्वीं
क॑रोति । पु॒रा क्रू॒रस्य॑ वि॒सृपो॑ वि॒रप्ति॑न्नित्याह॑ मे॒ध्यत्वा॑य । उ॒दादा॑य
पृ॒थि॒वीं जी॑र॒दानु॑र्यामै॒रयं॑ च॒न्द्रम॑सि स्व॒धाभि॑रित्याह॑ । यदे॒वास्या॑
अ॒मे॒ध्यम् । तद॑प॒हत्य॑ । मे॒ध्यां दे॒वय॑जनीं॑ कृ॒त्वा । 80 (10)

T.B.3.2.9.14

यद॑दश्च॒न्द्रम॑सि मे॒ध्यम् । तद॑स्यामे॒रय॑ति । तां॑ धी॒रासो॑ अनु॒दृश्य॑
यज॑न्त इ॒त्याहा॑नु॒ख्यात्यै॑ । प्रो॒क्षणी॑रासा॒दय॑ । इ॒ध्माब॑र्हि-रु॒पसा॑दय ।
स्रु॒वं च॑ स्रु॒चश्च॑ संमृ॒ड्ढि॑ । प॒त्नी सं॑न॒ह्य ।
आज्ये॑नोदे॒हीत्या॑हानु॒पूर्व॑तायै । प्रो॒क्षणी॑रासा॒दय॑ति ।
आपो॑ वै रक्षो॒घ्नीः । 81 (10)

T.B.3.2.9.15

रक्ष॑साम॒प॒ह॒त्यै । स्फ्य॑स्य॒ वर्त्मन्॑-सा॒द॒यति॑ । य॒ज्ञस्य॑ स॒न्त॒त्यै ।
 उ॒वाच॑ हा॒सितो॑ दै॒वलः॑ । ए॒ताव॑ती॒र्वा अ॒मुष्मिन्॑ लो॒क आप॑ आ॒सन् ।
 या॒वतीः॑ प्रो॒क्षणी॑रिति॑ । तस्मा॑द् ब॒ह्वीरा॒साद्याः॑ । स्फ्य॑मु॒दस्य॑न् ।
 यं द्वि॒ष्यात्तं॑ ध्या॒येत् । शु॒चैवैन॑-म॒र्पय॑ति () । 82 (10)

(वै वा॒यु - रा॒ह - परा॑वती॒त्याहा - ह - द्वि॒तीय॑ हर - ती॒ति -
 परि॑गृह्णन्ति॑ - दे॒वय॑जनीं॒ करो॑ति - भ॒वन्ति - ख॒नत्य॑ - क - रे॒तत्
 - कृ॒त्वा - रक्षो॑घ्नी - र॒र्पय॑ति) (A9)

3.2.10 अनुवाकं 10 – इध्माबर्हिः सादनम्

T.B.3.2.10.1

व॒ज्रो वै स्फ्यः॑ । यद॒न्वञ्चं॑ धा॒रये॑त् । व॒ज्रेऽध्व॑र्युः क्ष॒ण्वीत॑ । पु॒रस्ता॑त्
 ति॒र्यञ्चं॑ धा॒रय॑ति । व॒ज्रो वै स्फ्यः॑ । व॒ज्रेणै॒व य॒ज्ञस्य॑ दक्षि॒णतो॑
 रक्षा॑स्य॒प॒ह॒न्ति । अ॒ग्निभ्यां॑ प्रा॒चश्च॑ प्र॒तीच॑श्च । स्फ्ये॑नो॒दीच॑श्चा-
 ध॒राच॑श्च । स्फ्ये॑न॒ वा ए॒ष व॒ज्रेणा॒स्यै पा॒प्मानं॑ भ्रातृ॒व्य-म॒प॒ह॒त्यै ।
 उत्क॑रेऽधि॒ प्रवृ॑श्चति॑ । 83 (10)

T.B.3.2.10.2

यथो॑प॒धाय॑ वृ॒श्चन्त्ये॑वम् । ह॒स्ताव॑व ने॒नित्ते॑ । आ॒त्मान॑मे॒व प॑वयते ।
 स्म्यं॑ प्र॒क्षाल॑यति मे॒ध्यत्वा॑य । अथो॑ पा॒प्मन॑ ए॒व भ्रा॑तृ॒व्यस्य॑ न्यङ्गं॑
 छि॑नति । इ॒ध्मा-ब॒र्हि-रु॒पसा॑दयति यु॒क्त्यै॑ ॥ य॒ज्ञस्य॑ मि॒थुन॑त्वाय ।
 अथो॑ पु॒रोरु॑चमे॒वैतां॑ दधाति । उ॒त्तर॑स्य क॒र्मणो॑ऽनु॒ख्यात्यै॑ ॥ न पु॒रस्ता॑त्
 प्र॒त्यगु॑पसादयेत् । 84 (10)

T.B.3.2.10.3

यत् पु॒रस्ता॑त् प्र॒त्य-गु॑पसादयेत् । अ॒न्यत्रा॑हु॒तिप॒थादि॒ध्मं प्र॑तिपादयेत् ।
 प्र॒जा वै ब॒र्हिः । अ॒परा॑ध्नुयाद्-ब॒र्हिषा॑ प्र॒जानां॑ प्र॒जन॑नम् ।
 प॒श्चात्-प्रा॑गुपसादयति । आ॒हुति॑प॒थेने॒ध्मं प्र॑तिपादयति । संप्र॒त्यैव॑
 ब॒र्हिषा॑ प्र॒जानां॑ प्र॒जन॑नमु॒पैति॑ । दक्षि॑णमि॒ध्मम् । उ॒त्तरं॑ ब॒र्हिः ।
 आ॒त्मा वा इ॒ध्मः () । प्र॒जा ब॒र्हिः । प्र॒जा ह्या॒त्मन॑ उ॒त्तर॑तरा ती॒र्थे ।
 ततो॑ मे॒धमु॑पनीय । यथा॑ दे॒वत॑मे॒वैनत्-प्र॑तिष्ठापयति । प्र॒ति॒तिष्ठ॑ति
 प्र॒जया॑ प॒शुभि॑र् यज॒मानः॑ । 85 (15)

(वृ॒श्चति॑ - सा॒दये॑ - दि॒ध्मः प॒ञ्च च) (A10)

तृतीयाष्टके द्वितीयः प्रपाठकः – (TB 3.2)

Prapaataka Korvai with starting Padams of 1 to 10 Anuvaakams :-

(तृतीयस्यां – दे॒वस्या॑श्च॒पर्शु॑ँ यो॒ वै – पूर्वे॑द्युः – कर्म॑णे वा –
मिन्द्रो॑ वृ॒त्रम॑हन्त् सोऽ॒पो – ऽव॑धूतं – धृ॒ष्टिर् – दे॒वस्ये॑त्याह
सम्॑व॒पामि॑ – दे॒वस्य॑ स॒प्यमा॑ददे – वज्रो॑ वै स्फ्यो॑ दश)

Korvai with starting Padams of 1, 11, 21 Series of Dasinis :-

(तृतीयस्यां – य॒ज्ञस्या॑नतिरे॒काय॑ – पवि॑त्रवत्य – ध्व॒र्यु चा –
धि॒षव॑णमस्य – न्तरि॑क्ष ए॒व – रक्ष॑सामन्तर्हि॒त्यै –
द्वौ वा॑व पु॒रुषो॑ – यद॑दश्च॒न्द्रम॑सि मे॒ध्यं पञ्चा॑शीतिः)

First and Last Padam 3rd Ashtakam 2nd Prapaatakam :-

(तृतीयस्यां – य॒जमा॑नः)

हरिः॑ ओं ।

। कृष्ण यजुर्वेदीय तैत्तिरीय ब्राह्मणे तृतीयाष्टके द्वितीयः प्रपाठकः समाप्तः ।

Details of Dasini & Vaakyams for Ashtakam 3 –

Prapaatakam 2 – (TB 3.2)

	Dasini	Vaakyams
Anuvakam 1	6	59
Anuvakam 2	9	90
Anuvakam 3	12	125
Anuvakam 4	7	74
Anuvakam 5	11	113
Anuvakam 6	4	44
Anuvakam 7	6	63
Anuvakam 8	12	120
Anuvakam 9	15	150
Anuvakam 10	3	35
Total →	85	873

3.3 तृतीयाष्टके तृतीय प्रपाठकः – दर्शपूर्णमासेष्टिब्राह्मणम्

3.3.1 अनुवाकं 1 – स्त्रुखसंमार्गः

T.B.3.3 1.1

प्र॒त्युष्ट॑ꣳ र॒क्षः प्र॒त्युष्टा॑ अ॒रा॒तय॑ इ॒त्याह॑ । र॒क्षसा॑-म॒प॒ह॒त्यै ।
अ॒ग्नेर्व॑स्तेजि॒ष्ठेन॑ तेज॒सा नि॑ष्ट॒पामी॑त्याह मे॒ध्य॒त्वाय॑ । स्रु॒चः सं॒मार्ष्टि॑ ।
स्रु॒वम॑ग्रे । पु॒माꣳ स॒मे॒वाभ्यः॑ सꣳश्यति मि॒थुन॑त्वाय । अथ जु॒हूम् ।
अथो॑प॒भृत॑म् । अथ ध्रु॒वाम् । अ॒सौ वै जु॒हूः । 1 (10)

T.B.3.3 1.2

अ॒न्तरि॑क्षमु॒पभृ॑त् । पृ॒थि॒वी ध्रु॒वा । इ॒मे वै लो॒काः स्रु॒चः ।
वृ॒ष्टिः सं॒मार्ज॑नानि । वृ॒ष्टिर्वा इ॒मान् लो॒कान॑नुपूर्वं क॒ल्पय॑ति । ते ततः
क्लृ॒प्ताः स॒मे॒धन्ते॑ । स॒मे॒धन्ते॑ऽस्मा इ॒मे लो॒काः प्र॒जया॑ प॒शुभिः॑ ।
य ए॒वं वै॑द । यदि॑ का॒मये॑त॒ वर्षु॑कः प॒र्जन्यः॑ स्या॒दिति॑ ।
अ॒ग्रतः॑ संमृ॒ज्यात् । 2 (10)

T.B.3.3 1.3

वृ॒ष्टिमे॒व नि॒यच्छ॑ति । अ॒वाची॑ना॒ग्रा हि॑ वृ॒ष्टिः । यदि॑ का॒मये॑ता॒वर्षु॑कः
स्या॒दिति॑ । मू॒लतः॑ संमृ॒ज्यात् । वृ॒ष्टिमे॒वोद्य॑च्छति । तदु॒ वा आ॒हुः ।

अ॒ग्रत॑ ए॒वो॒परि॑ष्ठा॒त् सं॒मृ॒ज्या॒त् । मू॒ल॒तोऽध॑स्तात् । तदनु॒पूर्व॑ कल्पते ।
व॒र्षु॒को भ॑वतीति । 3 (10)

T.B.3.3 1.4

प्रा॒चीम॑भ्या॒कारम् । अ॒ग्रैर॑न्तरतः । ए॒वमि॑व ह्यन्नम॒द्यते॑ ॥ अथो अ॒ग्रा॒द्वा
ओष॑धीनामूर्जं प्रजा उपजीवन्ति । ऊ॒र्ज ए॒वा-न्ना॒द्यस्या॑वरु॒ध्यै ।
अध॑स्तात् प्र॒तीची॑म् । दण्डमु॒त्तम॑तः । मू॒लेन॑ मूलं प्रतिष्ठित्यै ।
तस्मा॑द॒रन्तौ प्रा॒ञ्च्यु॒परि॑ष्ठा॒ल् लो॒मानि॑ । प्र॒त्यञ्च्य॑धस्तात् । 4 (10)

T.B.3.3 1.5

स्रु॒ग॒ध्येषा॑ । प्रा॒णो वै स्रु॒वः । जु॒हूर्दक्षि॑णो हस्तः । उपभृ॒त्सव्यः॑ ।
आ॒त्मा ध्रु॒वा । अन्न॑ सं॒मार्ज॑नानि । मुख॒तो वै प्रा॒णोऽपा॒नो भू॒त्वा ।
आ॒त्मान॑मन्नं प्रविश्य । बा॒ह्यत॑स्तनुव॑ शु॒भय॑ति । तस्मा॑त् स्रु॒वमे॒वाग्रे॑
सं॒मार्ष्टि॑ () । मुख॒तो हि प्रा॒णोऽपा॒नो भू॒त्वा ।
आ॒त्मान॑मन्न-मावि॒शति॑ । तौ प्रा॒णापा॒नौ । अव्य॑र्धुकः प्रा॒णापा॒नाभ्यां॑
भव॑ति । य एवं वे॒द । 5 (15) (जु॒हूर् - मृ॒ज्याद् - भ॑वतीति -
प्र॒त्यञ्च्य॑धस्तान् - मा॒र्ष्टि पञ्च॑ च) (A1)

3.3.2 आनुवाकं 2 – सम्मार्जनानामग्नौ प्रहरणम्

T.B.3.3 2.1

दिवः॑ शिल्प॑मवत॑तम् । पृथि॑व्याः क॒कु॒भि॑ श्रित॑म् । तेन॑ वय॑ꣳ
सह॑स्रवल्॒शेन॑ । स॒प॒त्रं॑ नाशयाम॑सि स्वाहे॑ति स्रु॒ख्सं॑मार्ज॑नान्य॒ग्नौ
प्र॑हरति । आपो॑ वै द॒र्भाः । रूप॑मे॒वैषा॑मे॒तन् महि॑मानं॒ व्याच॑ष्टे ।
अ॒नु॒ष्टु॒भ॒र्चा । आ॒नु॒ष्टु॒भः प्र॒जाप॑तिः । प्रा॒जाप॑त्यो वे॒दः ।
वे॒दस्या॑ग्रꣳ स्रु॒ख्सं॑मार्ज॑नानि । 6 (10)

T.B.3.3 2.2

स्वे॒नै॒वैनानि॑ छन्द॑सा । स्वया॑ दे॒वत॑या॒ सम॑र्धयति ।
अथो॑ ऋ॒गवा॑व योषा॑ । द॒र्भो वृ॑षा । तन्मि॑थुनम् । मि॒थुन॑मे॒वास्य॑
तद्-य॒ज्ञे करो॑ति प्र॒जन॑नाय । प्र॒जाय॑ते प्र॒जया॑ प॒शुभिर्-य॑जमानः ।
तान्ये॑के वृथै॒वापा॑स्यन्ति । तत्तथा॑ न का॒र्यम् । आ॒रब्ध॑स्य य॒ज्ञिय॑स्य
कर्म॑णः स वि॒दोहः॑ । 7 (10)

T.B.3.3 2.3

यद्ये॒नानि॑ प॒शवो॑ऽभिति॑ष्ठेयुः । न तत् प॒शुभ्यः॑ कम् । अ॒द्भिर्मा॑र्-
जयि॑त्वोत्क॒रे न्य॑स्येत् । यद्वै य॒ज्ञिय॑स्य कर्म॑णोऽन्य॑त्राहु॒तीभ्यः॑

सन्तिष्ठते । उत्करो वाव तस्य प्रतिष्ठा । एतां हि तस्मै प्रतिष्ठां देवाः
समभरन् । यदद्विर्मार्जयति । तेन शान्तम् । यदुत्करे न्यस्यति ।
प्रतिष्ठामेवैनानि तद्-गमयति । 8 (10)

T.B.3.3 2.4

प्रतिष्ठति प्रजया पशुभिर्यजमानः । अथो स्तम्बस्य वा एतद्-
रूपम् । यथ् सुख्संमार्जनानि । स्तम्बशो वा ओषधयः ।
तासां जरत्कक्षे पशवो न रमन्ते । अप्रियो ह्येषां जरत्कक्षः ।
यावदप्रियो ह वै जरत्कक्षः पशूनाम् । तावदप्रियः पशूनां भवति ।
यस्यैतान्यन्यत्राग्नेर्-दधति । नवदाव्यासु वा ओषधीषु पशवो
रमन्ते । 9 (10)

T.B.3.3 2.5

नवदावो ह्येषां प्रियः । यावत्प्रियो ह वै नवदावः पशूनाम् ।
तावत्प्रियः पशूनां भवति । यस्यैतान्यग्नौ प्रहरन्ति ।
तस्मादेतान्यगनावेव प्रहरेत् । यतरस्मिन्थ-संमृज्यात् । पशूनां धृत्यै ।
यो भूतानामधिपतिः । रुद्रस्तन्तिचरो वृषा ।

प॒शू॒न॒स्मा॒कं॒ मा॒ हि॒॒सीः॒ () । ए॒तद॒स्तु॒ हु॒तं॒ तव॒ स्वा॒हे॒त्यग्नि॒ स॒
मा॒र्ज॒ना॒न्य॒ग्नौ॒ प्र॒हर॒ति । ए॒षा वा॒ ए॒तेषां॒ यो॒निः॒ ।

ए॒षा प्र॒ति॒ष्ठा । स्वा॒मे॒वैना॒नि यो॒निम् । स्वां॒ प्र॒ति॒ष्ठां ग॒मय॒ति ।

प्र॒ति॒ति॒ष्ठति॒ प्र॒जया॒ प॒शु॒भि॒र्य॒ज॒मा॒नः । 10 (16)

(वे॒दस्या॒ग्रं सु॒खसं॒मा॒र्ज॒ना॒नि – वि॒दो॒हो – ग॒मय॒ति – प॒शवो॑ र॒मन्ते॑
– हि॒॒सीः षट्च॑) (A2)

3.3.3 अनुवाकं 3 – पत्नीसंनहनम्

T.B.3.3 3.1

अ॒य॒ज्ञो वा॒ ए॒षः । यो॒ऽप॒त्नी॒कः । न॒ प्र॒जाः प्र॒जाये॒रन् । प॒त्न्य॒न्वा॒स्ते ।
य॒ज्ञमे॒वाकः॑ । प्र॒जा॒नां॒ प्र॒ज॒न॒नाय॑ । यत् ति॒ष्ठन्ती॑ सं॒नह्ये॑त । प्रि॒यं
ज्ञा॒ति॒रु॒न्ध्यात् । आ॒सी॒ना सं॒नह्ये॑ते । आ॒सी॒ना ह्ये॒षा वी॒र्यं॑
क॒रो॒ति । 11 (10)

T.B.3.3 3.2

यत् प॒श्चात्–प्रा॒च्य॒न्वा॒सी॒त । अ॒नया॑ स॒मदं॑ द॒धी॒त । दे॒वा॒नां प॒त्न्या॑
स॒मदं॑ द॒धी॒त । दे॒शाद्–दक्षि॑णत उ॒दी॒च्य॒न्वा॒स्ते । आ॒त्म॒नो गो॒पी॒थाय॑ ।

आ॒शा॒सा॒ना सौ॒मन॒समि॒त्याह॑ । मे॒ध्या॒मे॒वैनां॑ के॒वलीं॑ कृ॒त्वा ।

आ॒शि॒षा॒ सम॑र्धयति । अ॒ग्नेर॑नु॒व्रता॑ भू॒त्वा सं॑न॒ह्ये सु॒कृ॒ताय॑ क॒मि॒त्याह॑ ।

ए॒तद्वै प॒त्नियै॑ व्र॒तोप॑नयनम् । 12 (10)

T.B.3.3 3.3

ते॒नै॒वैनां॑ व्र॒तमु॑पनयति । तस्मा॑दाहुः । यश्चै॒वं वै॒द् यश्च॑न । यो॒क्त्रमे॑व
यु॒ते । यम॑न्वास्ते॑ । तस्या॑मु॒ष्मिन् लो॑के भव॒तीति॑ यो॒क्त्रेण॑ ।

यद् यो॒क्त्रम् । स यो॒गः । यदा॑स्ते॑ । स क्षे॒मः । 13 (10)

T.B.3.3 3.4

यो॒गक्षे॑मस्य॒ क्लृ॑प्त्यै॑ । यु॒क्तं क्रि॑याता आ॒शीः का॒मे यु॒ज्याता॑ इति॑ ।
आ॒शि॒षः सम॑र्द्ध्यै॑ । ग्र॒न्थिं ग्र॑थ्नाति । आ॒शि॒ष ए॒वास्यां॑ परि॒गृह्णा॑ति ।
पु॒मान् वै ग्र॑न्थिः । स्त्री प॒त्नी । तन् मि॑थुनम् । मि॒थुन॑मे॒वास्य॑
तद्-य॒ज्ञे करो॑ति प्र॒जन॑नाय । प्र॒जाय॑ते प्र॒जया॑ प॒शुभि॑र् यज॒मानः॑ ।

14 (10)

T.B.3.3 3.5

अथो॑ अ॒र्धो वा ए॒ष आ॒त्मनः॑ । यत् प॒त्नी । य॒ज्ञस्य॑ धृ॒त्या
अ॒शि॒थिल॑भावाय । सु॒प्र॒जस॑स्त्वा वय॑ꣳ सु॒प॒त्नीरु॑प॒सेदि॑मे॒त्याह॑ ।

य॒ज्ञमे॒व तन् मि॒थुनी॑ करो॒ति । ऊ॒नेऽति॑रि॒क्तं धी॒याता॑ इति॒ प्रजा॑त्यै ।
मही॒नां पयो॑ऽस्योष॒धीना॑ र॒स इत्या॑ह । रू॒पमे॒वा॒स्यै-त॑न्महि॒मानं॑
व्या॒चष्टे॑ । तस्य॒ तेऽक्षी॑यमाणस्य॒ निर्व॑पामि दे॒वय॑ज्याया॒ इत्या॑ह ।
आशि॒षमे॒वैता॑माशास्ते () । 15 (10)

(करो॑ति – व्रतो॑पनय॒नं – क्षेमो॑ – यज॑मानः – शास्ते॑) (A3)

3.3.4 अनुवाकं 4 – आज्योत्पवनम्

T.B.3.3 4.1

घृ॒तं च॒ वै मधु॑ च प्र॒जाप॑तिरासीत् । यतो॒ मध्वा॑सीत् । ततः॒ प्रजा॑
असृ॒जत॑ । तस्मा॑न् मधु॒षि प्र॑जननमिवास्ति । तस्मा॑न् मधु॒षा न
प्रच॑रन्ति । यात॒याम॑ हि । आज्ये॑न प्रचरन्ति । य॒ज्ञो वा॑ आज्यम् ।
य॒ज्ञेनै॒व य॒ज्ञं प्र॑चरन्त्ययातयामत्वाय । प॒न्यवे॑क्षते । 16 (10)

T.B.3.3 4.2

मि॒थुन॑त्वाय प्रजा॒त्यै । यद्वै प॒त्नी य॒ज्ञस्य॑ करो॒ति । मि॒थुनं॑ तत् ।
अथो॒ पत्नी॑या ए॒वैष य॒ज्ञस्या॑न्वारम्भोऽन॒वच्छि॑त्यै । अ॒मेध्यं॑ वा ए॒तत्
करो॑ति । यत् प॒न्यवे॑क्षते । गा॒र्हप॑त्ये ऽधि॒श्रय॑ति मे॒ध्यत्वा॑य ।

आ॒हव॒नीय॒-म॒भ्युद्द्र॑वति । य॒ज्ञस्य॒ सन्त॑त्यै ।

ते॒जोऽसि॒ तेजोऽनु॒ प्रे॒हीत्या॑ह । 17 (10)

T.B.3.3 4.3

ते॒जो वा अ॒ग्निः । ते॒ज आ॒ज्यम् । ते॒जसै॒व ते॒जः स॑म॒र्धय॑ति ।

अ॒ग्निस्ते॒ तेजो॒ मा वि॒नैदि॒त्याहा॑हि॒सायै॑ । स्प॒यस्य॒ वर्त॑मन्त्

सा॒दय॑ति । य॒ज्ञस्य॒ सन्त॑त्यै । अ॒ग्नेर्जि॒ह्वाऽसि॒ सु॒भूर्दे॒वाना॑मित्या॒ह ।

य॒था य॒जुरे॒वैत॑त् । धा॒म्ने॒धा॒म्ने दे॒वेभ्यो॒ यजु॑षे॒यजु॑षे भ॒वेत्या॑ह ।

आ॒शिष॑मे॒वैता॑मा॒शास्ते॑ । 18 (10)

T.B.3.3 4.4

त॒द्वा अ॒तः प॒वित्रा॑भ्यामे॒वोत् पु॑नाति । य॒जमा॑नो वा आ॒ज्यम् ।

प्रा॒णापा॑नौ प॒वित्रे॑ । य॒जमा॑न ए॒व प्रा॑णापा॒नौ द॑धाति । पु॒नरा॑हारम् ।

ए॒वमि॒व हि प्रा॑णापा॒नौ स॑न्च॒रतः॑ । शु॒क्रम॑सि॒ ज्योति॑रसि॒

ते॒जोऽसी॑त्या॒ह । रू॒पमे॒वास्यै॒ तन् म॑हि॒मानं॒ व्या॑चष्टे । त्रि॒र्यजु॑षा ।

त्रय॑ इ॒मे लो॒काः । 19 (10)

T.B.3.3 4.5

एषां॑ लो॒काना॑माप्स्यै॑ । त्रिः॑ । त्र्या॑वृद्धि॒ यज्ञः॑ । अथो॑ मे॒ध्यत्वाय॑ ।
अथा॑ज्यवती॒भ्यामपः॑ । रूपमे॒वासा॑मे॒तद्-वर्णं॑ दधाति । अपि॑ वा
उताहुः॑ । यथा॑ ह॒ वै योषा॑ सु॒वर्णं॑ हिरण्यं॑ पेशलं॑ बिभ्रती
रूपा॑ण्यास्ते॑ । ए॒वमे॒ता ए॒तर्हीति॑ । आपो॑ वै सर्वा॑ दे॒वताः॑ । 20 (10)

T.B.3.3 4.6

एषा॑ हि वि॒श्वेषां॑ दे॒वानां॑ त॒नूः । यदा॑ज्यम् । तत्रो॒भयो॑र्मीमा॒सा ।
जामि॑ स्यात् । यद्-य॒जुषा॑ऽज्यं॒ य॒जुषा॑ऽप॒ उत्पु॑नीयात् ।
छन्द॑साऽप॒ उत्पु॑नात्य॒जामित्वा॑य । अथो॑ मिथु॒नत्वाय॑ । सा॒वि॒त्रि॒या॒र्चा ।
स॒वि॒तृ॒प्र॒सू॒तं मे॒ कर्मा॑सदिति । स॒वि॒तृ॒प्र॒सू॒तमे॒वास्य॑ कर्म॒ भवति॑ () ।
प॒च्छो गाय॑त्रिया॒ त्रिः ष॑मृद्धत्वाय । अ॒द्धिरे॒वौष॑धीः संनयति ।
ओष॑धीभिः प॒शून् । प॒शुभि॑र्यज॒मानम् । शु॒क्रं त्वा शु॒क्रायां॑
ज्योति॑स्त्वा ज्योति॑ष्यर्चि॒स्त्वा ऽर्चि॑षीत्याह॒ सर्व॑त्वाय ।
पर्या॑प्त्या॒ अन॑न्तरायाय । 21 (16)

(ईक्षत- आह-शास्ते-लोका - देवता - भवति षट्च) (A4)

3.3.5 अनुवाकं 5 – आज्यग्रहणम्

T.B.3.3 5.1

दे॒वा॒सु॒राः॑ स॒म्य॑त्ता आ॒सन् । स ए॒त॒मिन्द्र॑ आ॒ज्य॒स्याव॑काश-
म॒पश्य॑त् । ते॒नावै॑क्षत । ततो॑ दे॒वा अ॒भवन् । परा॑ऽसु॒राः । य ए॒वं
वि॒द्वाना॑ज्य-म॒वेक्ष॑ते । भव॒त्यात्म॑ना । परा॑ऽस्य भ्रातृ॒व्यो भ॑वति ।
ब्र॒ह्मवा॑दिनो॑ वदन्ति । यदा॒ज्ये॒नान्यानि॑ ह॒वीऽष्य॑-भि॒घार॑यति । 22 (10)

T.B.3.3 5.2

अथ॑ के॒नाज्य॑मिति । स॒त्येने॑ति ब्रूयात् । चक्षु॒र्वे स॒त्यम् ।
स॒त्येनै॑वैन॒द-भि॒घार॑यति । ई॒श्वरो॑ वा ए॒षोऽन्धो॑ भवि॒तोः ।
यश्चक्षु॑षा ऽऽज्य॒मवे॑क्षते । निमी॒ल्यावे॑क्षेत । दा॒धारा॑त्मञ्चक्षुः ।
अभ्या॑ज्यं घा॒रय॑ति । आ॒ज्यं गृ॑ह्णाति । 23 (10)

T.B.3.3 5.3

छन्दा॑ऽसि वा आ॒ज्यम् । छन्दा॑ऽस्ये॒व प्री॑णाति । चतु॒र्जु॒ह्वां गृ॑ह्णाति ।
चतु॑ष्पादः प॒शवः॑ । प॒शूने॒वाव॑रुन्धे । अ॒ष्टावु॑प॒भृति॑ । अ॒ष्टाक्ष॑रा गाय॒त्री ।
गा॒य॒त्रः प्रा॒णः । प्रा॒णमे॒व प॒शुषु॑ दधाति । चतु॒र्ध्रु॒वाया॑म् । 24 (10)

T.B.3.3 5.4

चतु॑ष्पादः प॒शवः॑ । प॒शुष्वे॑-वोपरि॑ष्ठात्-प्रति॑तिष्ठति । यज॑मानदे॒वत्या॑
वै जु॒हूः । भ्रातृ॑व्यदे॒वत्यो॑पभृत् । चतु॑र्जु॒ह्वां गृ॒ह्णन्भू॑यो गृ॒ह्णीयात् ।
अ॒ष्टावु॑पभृति गृ॒ह्णन् क॑नीयः । यज॑मानायै॒व भ्रातृ॑व्यमु॒पस्तिं॑ करोति ।
गौर्वै॑ स्रुचः । चतु॑र्जु॒ह्वां गृ॒ह्णाति । तस्मा॑च्चतु॒ष्पदी॑ । 25 (10)

T.B.3.3 5.5

अ॒ष्टावु॑पभृति । तस्मा॑द॒ष्टाश॑फा । चतु॑र्ध्रु॒वायाम्॑ । तस्मा॑च्चतुः स्तना ।
गामे॑व तथ् स॒ऽस्करो॑ति । साऽस्मै॑ स॒ऽस्कृ॑तेष॒मूर्जं॑ दुहे । यज्जु॒ह्वां
गृ॒ह्णाति॑ । प्र॒याजे॑भ्यस्तत् । यदु॑पभृति । प्र॒याजा॑नू॒याजे॑भ्यस्तत् () ।
सर्व॑स्मै वा ए॒तद्-य॒ज्ञाय॑ गृ॒ह्यते॑ । यद्ध्रु॒वायामा॑ज्यम् । 26 (12)

(अ॒भि॒घा॒रय॑ति - गृ॒ह्णाति॑ - ध्रु॒वायां॑ - चतु॒ष्पदी॑ - प्र॒याजा॑नू॒याजे॑भ्य
स्तद् द्वे॑ च) (A5)

3.3.6 अनुवाकं 6 – स्त्रुखसादनम्

T.B.3.3 6.1

आपो॑ दे॒वीर॒ग्रेपु॒वो अ॒ग्रेगु॒व इत्या॑ह । रू॒पमे॒वासा॑मे॒तन्-म॒हिमा॑नं
 व्या॑चष्टे । अ॒ग्र इ॒मं य॒ज्ञं न॒यता॑ग्रे य॒ज्ञप॑तिमित्याह । अ॒ग्र ए॒व य॒ज्ञं
 न॒यन्ति॑ । अ॒ग्रे य॒ज्ञप॑तिम् । यु॒ष्मानि॒न्द्रोऽवृ॑णीत वृ॒त्रतू॑र्ये
 यू॒यमि॒न्द्रम॑वृ॒णीध्वं॑ वृ॒त्रतू॑र्य इत्याह । वृ॒त्रं ह॑ ह॒निष्य॑न्निन्द्र॒ आपो॑
 व॒त्रे । आपो॑ हे॒न्द्रं व॑त्रिरे । सं॒ज्ञा-मे॒वासा॑-मे॒तत्-सा॒मानं॑ व्या॑चष्टे ।
 प्रो॒क्षिताः॑ स्थे॒त्याह॑ । 27 (10)

T.B.3.3 6.2

तेना॒पः प्रो॒क्षिताः॑ । अ॒ग्निर् दे॒वेभ्यो॑ नि॒लाय॑त । कृ॒ष्णो रू॒पं कृ॒त्वा ।
 स व॒नस्प॑तीन् प्रा॒विश॑त् । कृ॒ष्णोऽस्या॑ख॒रेष्ठोऽग्न॑र्ये॒ त्वा स्वा॑हेत्याह ।
 अ॒ग्नय॑ ए॒वैनं॑ जु॒ष्टं क॑रोति । अथो॑ अ॒ग्नेरे॒व मे॒धम॑वरु॒न्धे । वे॒दिर॑सि
 ब॒र्हिषे॑ त्वा स्वा॑हेत्याह । प्र॒जा वै ब॒र्हिः । पृ॒थि॒वी वे॒दिः । 28 (10)

T.B.3.3 6.3

प्र॒जा ए॒व पृ॒थि॒व्यां प्र॑तिष्ठापयति । ब॒र्हि॒रसि॑ सु॒ग॒भ्यस्त्वा स्वा॑हेत्याह ।
 प्र॒जा वै ब॒र्हिः । य॒ज॒मा॒नः सु॒चः । य॒ज॒मा॒नमे॒व प्र॒जासु॑

प्रतिष्ठापयति । दिवे॑ त्वा॒ऽन्तरिक्षाय॑ त्वा पृथिव्यै॑ त्वेति॑ बर्हि॒रासाद्य॑
प्रोक्षति॑ । ए॒भ्य ए॒वैनं॑ लो॒केभ्यः॑ प्रोक्षति॑ । अथ॑ ततः॑ सह॒ स्रुचा॑
पुरस्तात्॑ प्रत्यञ्चं॑ ग्रन्थिं॑ प्रत्युक्षति॑ । प्रजा॑ वै बर्हिः॑ ।
यथा॑ सू॒त्यै का॒ल आपः॑ पुरस्ताद्-यन्ति॑ । 29 (10)

T.B.3.3 6.4

तादृगे॑व तत् । स्व॒धा पि॒तृभ्य॑ इत्याह॑ । स्व॒धाका॒रो हि पि॒तृणा॑म् ।
ऊ॒र्ध्व बर्हि॒षद्भ्य॑ इति॑ दक्षि॒णायै॑ श्रो॒णोरोत्तर॑स्यै॒ निनयति॑ सन्तत्यै॑ ।
मा॒सा वै पि॒तरो॑ बर्हि॒षदः॑ । मा॒साने॒व प्री॑णाति ।
मा॒सा वा ओष॑धीर्-वर्धयन्ति॑ । मा॒साः पच॑न्ति॒ समृद्ध्यै॑ ।
अ॒नति॑स्कन्दन्॒ ह प॒र्जन्यो॑ वर्॒षति॑ । यत्रै॒तदे॒वं क्रि॒यते॑ ॥ 30 (10)

T.B.3.3 6.5

ऊ॒र्जा पृथि॒वीं गच्छ॑तेत्याह॑ । पृथि॒व्यामे॒वोर्जं॑ दधाति॑ । तस्मा॑त्
पृथि॒व्या ऊ॒र्जा भु॑ञ्जते । ग्रन्थिं॑ वि॒स्र॒ज्यस॑यति । प्र॒जनय॑त्ये॒व तत् ।
ऊ॒र्ध्वं प्राञ्च॑मुद्गूढं॑ प्रत्यञ्च॑मायच्छति॑ । तस्मा॑त् प्रा॒चीनं॑ रे॒तो
धी॒यते॑ । प्र॒तीचीः॑ प्र॒जा जा॑यन्ते । वि॒ष्णोः स्तू॒पोऽसी॑त्याह॑ ।

य॒ज्ञो वै वि॒ष्णुः । 31 (10)

T.B.3.3 6.6

य॒ज्ञस्य॑ धृ॒त्यै॑ । पु॒रस्ता॑त् प्र॒स्तरं॑ गृ॒ह्णाति॑ । मु॒ख्यमे॒वैनं॑ करोति ।
इ॒यन्तं॑ गृ॒ह्णाति॑ । प्र॒जाप॑तिना य॒ज्ञमु॒खेन॑ सं॒मितम्॑ । इ॒यन्तं॑ गृ॒ह्णाति॑ ।
य॒ज्ञप॑रुषा सं॒मितम्॑ । इ॒यन्तं॑ गृ॒ह्णाति॑ । ए॒ताव॑द्वै पु॒रुषे॑ वी॒र्यम्॑ ।
वी॒र्यं॑ सं॒मितम्॑ । 32 (10)

T.B.3.3 6.7

अ॒परि॑मितं गृ॒ह्णाति॑ । अ॒परि॑मितस्याव॒रुद्ध्यै॑ । तस्मिन्॑ पवि॒त्रे
अ॒पि॒सृज॑ति । य॒ज॒मा॒नो वै प्र॒स्तरः॑ । प्रा॒णापा॑नौ पवि॒त्रे ।
य॒ज॒मा॒न ए॒व प्रा॒णापा॑नौ द॒धाति॑ । ऊ॒र्णाम्र॑द॒सं त्वा स्तृ॑णामीत्याह ।
य॒थाय॑जु॒रेवै॑ तत् । स्वा॒स॒स्थं दे॒वेभ्य॑ इत्याह । दे॒वेभ्य॑ ए॒वैन॑थ्
स्वा॒स॒स्थं करो॑ति । 33 (10)

T.B.3.3 6.8

ब॒र्हिः स्तृ॑णाति । प्र॒जा वै ब॒र्हिः । पृ॒थि॒वी वे॒दिः । प्र॒जा ए॒व
पृ॒थि॒व्यां प्र॒तिष्ठा॑पयति । अ॒न॒तिदृ॑श्नं स्तृ॑णाति । प्र॒जयै॒वैनं॑
प॒शुभि॑र॒न॒तिदृ॑श्नं करोति । धा॒रय॑न् प्र॒स्तरं॑ प॒रिधी॑न् प॒रि द॑धाति ।

यज॒मानो॑ वै प्र॒स्तरः॑ । यज॒मान॑ ए॒व तथ् स्व॒यं परि॒धीन् परि॑ दधाति ।

गन्ध॒र्वोऽसि॑ विश्वावसु॒रित्या॑ह । 34 (10)

T.B.3.3 6.9

विश्वमे॒वायु॑र्-यज॒माने॑ दधाति । इन्द्र॑स्य बा॒हुर॑सि दक्षि॒ण इत्या॑ह ।

इन्द्रि॒यमे॒व यज॒माने॑ दधाति । मि॒त्रावरु॑णौ त्वोत्तरतः परि॒धत्ता॑मित्या॒ह ।

प्रा॒णापा॑नौ मि॒त्रावरु॑णौ । प्रा॒णापा॑ना-वे॒वास्मिन्॑ दधाति ।

सूर्य॑स्त्वा पु॒रस्ता॑त् पा॒त्वित्या॑ह । रक्ष॑सा-मप॒हत्यै॑ ।

कस्या॑श्चिदभि॒शस्त्या॑ इत्या॒ह । अप॑रि॒मिता॑दे॒वैनं॑ पाति । 35 (10)

T.B.3.3 6.10

वी॒तिहो॑त्रं त्वा क॒व इत्या॑ह । अ॒ग्निमे॒व हो॒त्रेण॑ स॒मर्ध॑यति । द्यु॒मन्त॑ꣳ

स॒मिधी॑म॒हीत्या॑ह स॒मिद्ध्यै॑ । अ॒ग्ने बृ॒हन्त॑मध्व॒र इत्या॑ह वृ॒द्ध्यै॑ ।

वि॒शो य॒न्त्रे स्थ॑ इत्या॒ह । वि॒शां य॒त्यै । उ॒दीची॑ना॒ग्रे नि॑दधाति

प्र॒तिष्ठि॑त्यै । व॒सूनाꣳ रु॒द्राणा॑-मा॒दित्या॑नाꣳ स॒दसि॑ सी॒देत्या॑ह ।

दे॒वता॑नामे॒व स॒दने॑ प्र॒स्तर॑ꣳ सा॒दय॑ति । जु॒हूर॑सि घृ॒ताची॑

ना॒म्नेत्या॑ह । 36 (10)

T.B.3.3 6.11

असौ॑ वै जु॒हूः । अ॒न्तरि॑क्षमु॒पभृ॑त् । पृ॒थि॒वी ध्रु॒वा । ता॒सामे॑तदे॒व प्रि॒यं
नाम॑ । यद्-घृ॒ताची॑ति । यद्-घृ॒ताची॑त्याह । प्रि॒येणै॒वैना॑ नाम्ना
सा॒दय॑ति । ए॒ता अ॒सद॑न्थ्-सु॒कृत॑स्य लो॒क इ॒त्याह॑ । स॒त्यं वै
सु॒कृत॑स्य लो॒कः । स॒त्य ए॒वैनाः॑ सु॒कृत॑स्य लो॒के सा॒दय॑ति () ।
ता वि॒ष्णो पा॒हीत्या॑ह । य॒ज्ञो वै वि॒ष्णुः । य॒ज्ञस्य॑ धृ॒त्यै । पा॒हि य॒ज्ञं
पा॒हि य॒ज्ञप॑तिं पा॒हि मां य॒ज्ञनि॑यमित्या॒ह । य॒ज्ञाय॑ य॒जमा॑नाया॒त्मने॑ ।
तेभ्य॑ ए॒वाशि॑षमा॒शास्ते॑ऽना॒त्यै । 37 (16) (स्थे॑त्याह – पृ॒थि॒वी वैदि॑र्
– य॒न्ति – क्रि॑यते – वि॒ष्णुर् – वी॒र्य॑सं॒मितं – करो॑ – त्याह –
पा॒ति – ना॒म्नेत्या॑ह – लो॒के सा॒दय॑ति षट्च) (A6)

3.3.7 अनुवाकं 7 – आधारः

T.B.3.3 7.1

अ॒ग्नि॒ना वै हो॒त्रा । दे॒वा अ॒सुरा॑-न॒भ्यभ॑वन् । अ॒ग्नये॑
स॒मि॒ध्यमा॑नाया-नु॒ब्रू॒हीत्या॑ह भ्रा॒तृव्या॑भिभू॒त्यै । ए॒कवि॑ंश॒ति-
मि॒ध्मदा॑रू॒णि भ॑वन्ति । ए॒कवि॑ंशो॒ वै पु॒रुषः॑ । पु॒रुष॑स्या॒प्त्यै ।

पञ्चदशोध्मदारूण्य-भ्यादधाति । पञ्चदश वा अर्धमासस्य रात्रयः ।
 अर्धमासशः सम्वत्सर आप्यते । त्रीन्-परिधीन्-परि-
 दधाति । 38 (10)

T.B.3.3 7.2

ऊर्ध्वे समिधावादधाति । अनूयाजैभ्यः समिधमतिशिनष्टि । षट्थसं
 पद्यन्ते । षड्वा ऋतवः । ऋतूनेव प्रीणाति । वेदेनोपवाजयति ।
 प्राजापत्यो वै वेदः । प्राजापत्यः प्राणः । यजमान आहवनीयः ।
 यजमान एव प्राणं दधाति । 39 (10)

T.B.3.3 7.3

त्रिरुपवाजयति । त्रयो वै प्राणाः । प्राणानेवास्मिन् दधाति ।
 वेदेनोपयत्य स्रुवेण प्राजापत्य-माघार-माघारयति । यज्ञो वै
 प्रजापतिः । यज्ञमेव प्रजापतिं मुखत आरभते । अथो प्रजापतिः
 सर्वा देवताः । सर्वा एव देवताः प्रीणाति । अग्निमग्नीत्तिस्त्रिः
 संमृड्ढीत्याह । त्र्यावृद्धि यज्ञः । 40 (10)

T.B.3.3 7.4

अथो रक्षसामपहत्यै । परिधीन्थ्-संमार्ष्टि । पुनात्येवैनान् । त्रिस्त्रिः
 संमार्ष्टि । त्र्यावृद्धि यज्ञः । अथो मेध्यत्वाय । अथो एते वै देवाश्चाः ।
 देवाश्चानेव तथ् संमार्ष्टि । सुवर्गस्य लोकस्य समष्ट्यै ।
 आसीनोऽन्य-माघार-माघारयति । 41 (10)

T.B.3.3 7.5

तिष्ठन्नन्यम् । यथाऽनो वा रथम्वा युञ्ज्यात् । एवमेव तदध्वर्युर्-यज्ञं
 युनक्ति । सुवर्गस्य लोकस्याभ्यूढ्यै । वहन्त्येनं ग्राम्याः पशवः ।
 य एवं वैद । भुवनमसि विप्रथस्वेत्याह । यज्ञो वै भुवनम् ।
 यज्ञ एव यजमानं प्रजया पशुभिः प्रथयति । अग्ने यष्टरिदं
 नम इत्याह । 42 (10)

T.B.3.3 7.6

अग्निर्वै देवानां यष्टा । य एव देवानां यष्टा । तस्मा एव नमस्करोति ।
 जुह्वेह्यग्निस्त्वा ह्वयति देवयज्याया उपभृदेहि देवस्त्वा सविता ह्वयति
 देवयज्याया इत्याह । आग्नेयी वै जुहूः । सावित्र्युपभृत् । ताभ्यामेवैने
 प्रसूत आदत्ते । अग्नाविष्णू मा वामवक्रमिषमित्याह ।

अ॒ग्निः पु॒रस्ता॑त् । वि॒ष्णुर्य॒ज्ञः प॒श्चात् । 43 (10)

T.B.3.3 7.7

ता॒भ्यामे॒व प्र॒ति प्रो॒च्यात्या॑क्राम॒ति । वि॒जिहा॑थां मा मा
सं॒ताप्त॑मित्या॒हाहि॑सायै । लो॒कं मे॑ लो॒ककृ॑तौ कृ॒णुत॑मित्याह ।
आ॒शिष॑मे॒वैता॑माशास्ते । वि॒ष्णोः स्था॑नमसीत्याह । य॒ज्ञो वै वि॒ष्णुः ।
ए॒तत् ख॒लु वै दे॒वाना॑-मपराजित-मायतनम् । यद्-य॒ज्ञः ।
दे॒वाना॑मे॒वापरा॑जित आयतने तिष्ठति । इ॒त इन्द्रो॑ अकृ॒णोद्-
वी॒र्या॑णीत्याह । 44 (10)

T.B.3.3 7.8

इ॒न्द्रि॒यमे॒व यज॑माने दधाति । स॒मा॒र॒भ्योर्ध्वो॑ अ॒ध्वरो
दि॒वि॒स्पृ॒श॒मि॒त्याह॑ वृ॒द्ध्यै॑ । आ॒घार॑-मा॒घार्य॑माणमनु स॒मा॒र॒भ्य ।
ए॒तस्मिन्॑ का॒ले दे॒वाः सु॒वर्गं॑ लो॒कमा॑यन् । सा॒क्षादे॒व यज॑मानः
सु॒वर्गं॑ लो॒कमे॑ति । अथो स॒मृ॒द्धेनै॒व य॒ज्ञेन॑ यजमानः सु॒वर्गं॑
लो॒कमे॑ति । अ॒हुतो॑ य॒ज्ञो य॒ज्ञप॑तेरित्या॒हाना॑त्यै । इन्द्रा॑वान्थ्-
स्वा॒हेत्या॑ह । इ॒न्द्रि॒यमे॒व यज॑माने दधाति । बृ॒हद्वा॑ इत्याह । 45 (10)

T.B.3.3 7.9

सु॒वर्गो॑ वै लो॒को बृ॒हद्भाः॑ । सु॒वर्गस्य॑ लो॒कस्य॑ सम॑ष्ट्यै ।
यज॑मानदे॒वत्या॑ वै जु॒हूः । भ्रातृ॑व्यदे॒वत्यो॑पभृत् । प्रा॒ण आ॑धारः ।
यथ् स॒ऽस्पर्श॑येत् ॥ भ्रातृ॑व्येऽस्य प्रा॒णं द॑ध्यात् ।
अस॒ऽस्पर्श॑यन्न॒त्याक्रा॑मति । यज॑मान ए॒व प्रा॒णं द॑धाति ।
पाहि॑मा॒ग्ने दु॑श्चरि॒तादा॑ मा सु॒चरि॑ते भ॒जेत्या॑ह । 46 (10)

T.B.3.3 7.10

अ॒ग्निर्वा॑व प॒वित्रम् ॥ वृ॒जिन॑म॒नृतं॑ दु॒श्चरि॑तम् । ऋ॒जु॒कर्म॑ स॒त्ये
सु॒चरि॑तम् । अ॒ग्निरे॒वैनं॑ वृ॒जिना॑द-नृ॒ताद्-दु॒श्चरि॑तात्पाति । ऋ॒जु॒कर्म॑
स॒त्ये सु॒चरि॑ते भ॒जति॑ । तस्मा॑दे॒वमा॑शास्ते । आ॒त्मनो॑ गो॒पीथा॑य ।
शि॒रो वा ए॒तद्-य॒ज्ञस्य॑ । यदा॑धारः । आ॒त्मा ध्रु॒वा । 47 (10)

T.B.3.3 7.11

आ॒धार-मा॒घार्य॑ ध्रु॒वा स॑म॒नक्ति॑ । आ॒त्मन्ने॒व य॒ज्ञस्य॑ शि॒रः
प्रति॑दधाति । द्विः स॑म॒नक्ति॑ । द्वौ हि प्रा॒णापा॑नौ । तदा॑हुः ।
त्रि॒रे॒व स॑मञ्ज्यात् । त्रिधा॑तु हि शि॒र इति॑ । शि॒र इ॒वैतद्-य॒ज्ञस्य॑ ।
अथो॑ त्रयो॒ वै प्रा॒णाः । प्रा॒णाने॒वास्मिन्॑ दधाति () ।

म॒खस्य॑ शि॒रोऽसि॑ संज्योतिषा ज्योति॑रङ्गामित्याह । ज्योति॑रेवास्मा
उप॑रिष्ठाद्-दधाति । सुव॑र्गस्य लो॒कस्यानु॑ख्यात्यै । 48 (13)

(परि॑दधाति – प्रा॒णं द॑धाति – हि य॒ज्ञो – घा॑रयति – नम॑ इत्याह –
पश्चा॑द् – वी॒र्या॑णीत्याह – भा॑ इत्याह – भ॒जेत्याह –
ध्रु॑ – वैवास्मिन् दधाति त्रीणि॑ च) (A7)

3.3.8 अनुवाकं 8 – इडाभक्षणम्

T.B.3.3 8.1

धिष्णि॑या वा ए॒ते न्यु॑प्यन्ते । यद्ब्र॑ह्मा । यद्धो॑ता । यदध्व॑र्युः । यदग्नी॑त् ।
यद्-यज॑मानः । तान् यदन्त॑रेयात् । यज॑मानस्य प्रा॒णान्थ्-सं॑कर्षेत् ।
प्रमा॑युकः स्यात् । पु॒रोडा॑शमप॒गृह्य॑ संच॑रत्यध्व॑र्युः । 49 (10)

T.B.3.3 8.2

यज॑मानायैव तल्लो॒कं शि॑ष्ति । नास्य॑ प्रा॒णान्थ्-सं॑कर्षति ।
न प्र॑मायु॒को भ॑वति । पु॒रस्ता॑त् प्रत्यङ्मु॑सीनः । इडा॑या इडा॒माद॑धाति ।
हस्त्या॑ होत्रे॑ । प॒शवो॑ वा इडा॑ । प॒शवः॑ पु॒रुषः॑ । प॒शुष्वे॒व प॒शून्
प्रति॑ष्ठापयति । इडा॑यै वा ए॒षा प्र॑जातिः । 50 (10)

T.B.3.3 8.3

तां प्रजातिं यजमानोऽनु प्रजायते । द्विरङ्गुलावनक्ति पर्वणोः ।
 द्विपाद्-यजमानः प्रतिष्ठित्यै । सकृदुपस्तृणाति । द्विरादधाति ।
 सकृदभिघारयति । चतुः संपद्यते । चत्वारि वै पशोः प्रतिष्ठानानि ।
 यावानेव पशुः । तमुपह्वयते । 51 (10)

T.B.3.3 8.4

मुखमिव प्रत्युपह्वयेत । संमुखानेव पशूनुपह्वयते । पशवो वा इडा ॥
 तस्मात् साऽन्वारभ्या ॥ अध्वर्युणा च यजमानेन च । उपहूतः
 पशुमानसानीत्याह । उप ह्येनौ ह्वयते होता । इडायै देवताना-
 मुपह्वे । उपहूतः पशुमान् भवति । य एवं वेद । 52 (10)

T.B.3.3 8.5

यां वै हस्त्यामिडामादधाति । वाचः सा भागधेयम् । यामुपह्वयते ।
 प्राणानां सा । वाचं चैव प्राणाञ्श्चावरुन्धे । अथ वा
 एतर्ह्युपहूतायामिडायाम् । पुरोडाशस्यैव बर्हिषदो मीमांसा ।
 यजमानं देवा अब्रुवन् । हविर्नो निर्वपेति । नाहमभागो
 निर्वपस्यामीत्यब्रवीत् । 53 (10)

T.B.3.3 8.6

न मयाऽभा॒गया ऽनु॒वक्ष्य॑थेति वा॒गब्र॑वीत् । नाहम॑भा॒गा पु॒रोऽनु॒वाक्या॑
 भवि॑ष्यामीति पु॒रोऽनु॒वाक्या॑ । नाहम॑भा॒गा या॒ज्या भवि॑ष्यामीति
 या॒ज्या । न मयाऽभा॒गेन वषट्॑करिष्यथेति वषट्॑कारः ।
 यद्-यज॑मानभा॒गं नि॒धाय पु॒रोडा॑शं बर्हि॑षदं करो॑ति ।
 ताने॒व तद्-भा॒गिनः॑ करो॑ति । चतु॑र्धा करो॑ति । चत॑स्रो दि॒शः ।
 दिक्ष्वे॑व प्र॒तिति॑ष्ठति । बर्हि॑षदं करो॑ति । 54 (10)

T.B.3.3 8.7

यज॑मानो वै पु॒रोडा॑शः । प्र॒जा बर्हिः॑ । यज॑मानमे॒व प्र॒जासु॑
 प्र॒तिष्ठा॑पयति । तस्मा॑द॒स्थनाऽन्याः॑ प्र॒जाः प्र॒तिति॑ष्ठन्ति । मा॒सेना॑न्याः ।
 अथो॑ ख॒ल्वाहुः॑ । दक्षि॑णा वा ए॒ता ह॒विर्-यज्ञ॑स्यान्तर्वे॒द्यवरु॑ध्यन्ते ।
 यत् पु॒रोडा॑शं बर्हि॑षदं करो॑तीति । चतु॑र्धा करो॑ति ।
 चत्वा॑रो ह्ये॒ते ह॒विर्-यज्ञ॑स्य॒र्त्विजः॑ । 55 (10)

T.B.3.3 8.8

ब्र॒ह्मा हो॒ताऽध्व॑र्यु॒रग्नी॑त् । तम॑भि॒मृशे॑त् । इ॒दं ब्र॒ह्मणः॑ । इ॒दं हो॒तुः ।
 इ॒दम॑ध्व॒र्योः । इ॒दम॑ग्नी॒ध इति॑ । यथै॒वादः॑ सौ॒म्येऽध्व॑रे ।

आदेशमृ॒त्विग्भ्यो॑ दक्षि॒णा नी॒यन्ते॑ । तादृ॒गो॒व तत् ।

अग्नी॑धे॒ प्रथ॑मायादधाति । 56 (10)

T.B.3.3 8.9

अग्नि॑मुखा हृ॒द्धिः । अग्नि॑मुखामेव॒र्द्धिं य॑जमान ऋ॒ध्नोति॑ ।

सकृ॑दुप॒स्तीर्य॑ द्वि॒राद॑धत् । उप॒स्तीर्य॑ द्वि॒रभि॑घारयति । षट्॑थ् संप॒द्यन्ते॑ ।

षड्॑वा ऋ॒तवः॑ । ऋ॒तूने॒व प्री॑णाति । वेदे॑न ब्र॒ह्मणो॑ ब्र॒ह्मभा॑गं परि॒हरति॑ ।

प्राजा॑पत्यो वै वे॒दः । प्राजा॑पत्यो ब्र॒ह्मा । 57 (10)

T.B.3.3 8.10

सवि॑ता य॒ज्ञस्य॑ प्र॒सूत्यै॑ । अथ॑ का॒मम॑न्येन । ततो॑ हो॒त्रे । मध्यं॑ वा

ए॒तद्-य॒ज्ञस्य॑ । यद्धो॑ता । मध्य॑त ए॒व य॒ज्ञं प्री॑णाति । अथा॑ध्व॒र्यवे॑ ।

प्रति॑ष्ठा वा ए॒षा य॒ज्ञस्य॑ । यदध्व॑र्युः ।

तस्मा॑द्ध॒विर्-य॒ज्ञस्यै॑तामे॒वावृ॑तमनु । 58 (10)

T.B.3.3 8.11

अन्या॑ दक्षि॒णा नी॒यन्ते॑ । य॒ज्ञस्य॑ प्रति॒ष्ठित्यै॑ । अग्नि॑मग्नी॒थ् सकृ॑थ्

सकृ॑थ् संमृ॒ङ्गीत्या॑ह । परा॑डिव हो॒तर्.हि॑ य॒ज्ञः । इ॒षिता॑ दै॒व्या हो॒तार॑

इत्या॑ह । इ॒षित॑ हि क॒र्म क्रि॑यते । भद्र॑वाच्याय प्रेषि॒तो मा॑नुषः

सू॒क्त॒वा॒का॒य॒ सू॒क्ता॒ ब्रू॒ही॒त्या॒ह॒ । आ॒शि॒ष॒मे॒वै॒ता॒मा॒शा॒स्ते॒ । स्व॒गा॒ दै॒व्या॒
हो॒तृ॒भ्य॒ इ॒त्या॒ह॒ । य॒ज्ञ॒मे॒व॒ तथ॑स्व॒गा॒ करो॑ति () । स्व॒स्ति॒र्-मा॒नु॒षे॒भ्य॒
इ॒त्या॒ह॒ । आ॒शि॒ष॒मे॒वै॒ता॒मा॒शा॒स्ते॒ । श॒म्-यो॒र्-ब्रू॒ही॒त्या॒ह॒ ।

श॒म्-यु॒मे॒व॒ बा॒र्ह॒स्प॒त्यं॑ भा॒ग॒धे॒ये॒न॑ स॒म॒र्ध॒य॒ति॒ । 59 (14)

(च॒र॒त्य॒ध्व॒र्युः॑ - प्र॒जा॒ति॒र्-ह॒य॒ते॑ - वे॒दा॑ - ब्र॒वी॒द् - ब॒र्हि॒ष॒दं॑
क॒रो॒-त्य॒त्वि॒जो॑-द॒धा॒ति॒-ब्र॒ह्मा॑-ऽनु॒-क॒रो॒ति॒ च॒त्वा॒रि॑ च) (A8)

3.3.9 अनुवाकं 9 – प्रस्तरप्रहारादिकम्

T.B.3.3 9.1

अथ॒ स्रु॒चा॒व॒नु॒ष्टु॒ग्भ्यां॑ वा॒ज॒व॒ती॒भ्यां॑ व्यू॒ह॒ति॒ । प्र॒ति॒ष्ठा॒ वा॒ अ॒नु॒ष्टु॒क् ।
अ॒न्नं॑ वा॒जः॑ प्र॒ति॒ष्ठि॒त्यै॑ । अ॒न्ना॒द्य॒स्या॒व॒रु॒ध्यै॑ । प्रा॒चीं॑ जु॒हू॒मू॒ह॒ति॒ ।
जा॒ता॒ने॒व॒ भ्रा॒तृ॒व्यान्॑ प्र॒णु॒द॒ते॒ । प्र॒ती॒ची॒मु॒प॒भृ॒तम्॑ । ज॒नि॒ष्य॒मा॒णा॒ने॒व॒
प्र॒ति॒नु॒द॒ते॒ । स॒ वि॒षू॒च॒ ए॒वा॒पो॒ह्य॑ स॒प॒त्नान्॑ । य॒ज॒मा॒नः॑ ।

अ॒स्मिन्॑ लो॒के॒ प्र॒ति॒ति॒ष्ठ॒ति॒ । 60 (10)

T.B.3.3 9.2

द्वा॑भ्याम् । द्वि॑प्रतिष्ठो॒ हि । वसु॑भ्यस्त्वा रु॒द्रेभ्य॑स्त्वाऽऽदि॒त्येभ्य॑स्त्वेत्या॑ह ।
यथा॑यजु॒रेवै॑ तत् । सु॒क्षु प्र॑स्तरमनक्ति । इ॒मे वै लो॒काः सु॒चः ।
यज॑मानः प्र॒स्तरः । यज॑मानमे॒व तेज॑साऽनक्ति । त्रे॒धाऽन॑क्ति ।
त्रय॑ इ॒मे लो॒काः । 61 (10)

T.B.3.3 9.3

ए॒भ्य ए॒वैनं॑ लो॒केभ्यो॑ऽनक्ति । अ॒भिपूर्व॑मनक्ति । अ॒भिपूर्व॑मे॒व
यज॑मानं तेज॑साऽनक्ति । अ॒क्तञ् रि॑हाणा इत्या॑ह । ते॒जो वा आ॒ज्यम् ।
यज॑मानः प्र॒स्तरः । यज॑मानमे॒व तेज॑साऽनक्ति । वि॒यन्तु॒ वय॑ इत्या॑ह ।
वय॑ ए॒वैनं॑ कृ॒त्वा । सु॒वर्गं लो॒कं ग॑मयति । 62 (10)

T.B.3.3 9.4

प्र॒जां यो॒निं मा निर्मृ॑क्षमित्या॑ह । प्र॒जायै॑ गो॒पीथा॑य । आ॒प्याय॑न्तामाप
ओ॒षध॑य इत्या॑ह । आप॑ ए॒वौष॑धीराप्याययति । मरु॑तां पृष॑तयः
स्थे॑त्याह । मरु॑तो वै वृ॒ष्ट्या ई॑शते । वृ॒ष्टिमे॑वावरुन्धे । दि॒वं ग॑च्छ॒ ततो॑
नो॒ वृष्टि॑मे॒रये॑त्याह । वृ॒ष्टिर्वै द्यौः । वृ॒ष्टिमे॑वावरुन्धे । 63 (10)

T.B.3.3 9.5

यावद्वा अ॒ध्व॒र्युः प्र॒स्तरं॑ प्र॒हरति॑ । ताव॑द॒स्यायु॑र्मी॒यते॑ । आ॒यु॒ष्पा
अ॒ग्नेऽस्या॑यु॒र्मे पा॒हीत्या॑ह । आ॒यु॒रेवा॒त्मन्-ध॑त्ते । यावद्वा अ॒ध्व॒र्युः
प्र॒स्तरं॑ प्र॒हरति॑ । ताव॑द॒स्य चक्षु॑र्मी॒यते॑ । चक्षु॑ष्पा अ॒ग्नेऽसि॑ चक्षु॒र्मे
पा॒हीत्या॑ह । चक्षु॑रेवा॒त्मन्-ध॑त्ते । ध्रु॒वाऽसी॑त्याह॒ प्रति॑ष्ठित्यै ।

यं परि॑धिं पर्य॑धत्था इत्याह । 64 (10)

T.B.3.3 9.6

यथा॑य॒जुरे॒वैतत् । अ॒ग्ने दे॒व प॒णिभिर्-वी॒यमा॑ण इत्याह ।
अ॒ग्नय॑ ए॒वैनं॑ जुष्टं॑ करोति । तं त ए॒तम॒नु जोषं॑ भ॒रामी॑त्याह ।
सजा॑तानेवास्मा अनु॑कान्करोति । ने॒देष॑ त्वद॒पचे॑तया॒ता
इत्या॑हानु॒ख्यात्यै॑ । य॒ज्ञस्य॑ पाथ॒ उप॒ समि॑तमित्याह । भू॒मान॑मे॒वोपै॑ति ।
परि॑धीन्-प्र॒हरति॑ । य॒ज्ञस्य॑ समि॒ष्ट्यै । 65 (10)

T.B.3.3 9.7

स्रु॒चौ सं प्र॑स्रावयति । यदे॒व तत्र॑ कू॒रम् । तत्-ते॑न श॒मय॑ति ।
जु॒ह्वामु॑प॒भृतम्॑ ॥ यज॑मानदे॒वत्या॑ वै जु॒हूः । भ्रातृ॑व्यदे॒वत्यो॑प॒भृत् ।
यज॑मानायै॒व भ्रातृ॑व्यमु॒पस्तिं॑ करोति । स॒स्रा॒वभा॒गाः स्थे॑त्याह ।

वसवो॒ वै रु॒द्रा आ॒दित्याः॒ स॒स्राव॒भागाः॒ ।

तेषां॒ तद्-भा॒गधे॒यम् । 66 (10)

T.B.3.3 9.8

ताने॒व तेन॑ प्रीणाति । वै॒श्वदे॒व्यर्चा॑ । ए॒ते हि वि॒श्वे दे॒वाः ।

त्रि॒ष्टुग्-भ॑वति । इ॒न्द्रि॒यं वै त्रि॒ष्टुक् । इ॒न्द्रि॒यमे॒व यज॑माने दधाति ।

अ॒ग्नेर्वा॒मप॑न्नगृहस्य सदसि सादयामीत्याह । इ॒यं वा अ॒ग्निर॑प॒न्नगृ॑हः ।

अस्या॒ ए॒वैने॑ स॒दने॑ सादयति । सु॒म्नाय॑ सु॒म्निनी॑ सु॒म्ने

मा ध॒त्तमि॑त्याह । 67 (10)

T.B.3.3 9.9

प्र॒जा वै प॑शवः सु॒म्नम् । प्र॒जामे॒व प॑शूनात्मन्धत्ते । धु॒रि धु॒र्यौ

पा॒तमि॑त्याह । जा॒याप॑त्योर्-गो॒पीथा॑य । अ॒ग्नेऽद॑ब्धायोऽशी॒तत॑नो

इ॒त्याह॑ । य॒थाय॑जु॒रेवै॑तत् । पा॒हि मा॒ऽद्य दि॒वः पा॒हि प्र॑सि॒त्यै पा॒हि

दु॒रि॒ष्ट्यै पा॒हि दु॒र॒घ्न॒न्यै पा॒हि दु॒श्च॑रितादित्याह । आ॒शि॒षमे॒वैता॑माशास्ते ।

अ॒वि॒षं नः॑ पि॒तुं कृ॑णु सु॒षदा॑ यो॒निः स्वा॑हेती॒ध्म-

स॒म्वृ॑श्च॒नान्य॑न्वाहा॒र्यप॑चने ऽभ्या॒धाय॑ फली॒करण॑होमं जुहोति ।

अतिरिक्तानि वा इध्म सम्वृश्नानि । 68 (10)

T.B.3.3 9.10

अतिरिक्ताः फलीकरणाः । अतिरिक्तमाज्योच्छेषणम् । अतिरिक्त
एवातिरिक्तं दधाति । अथो अतिरिक्ते-नैवातिरिक्त-माप्त्वाऽवरुन्धे ।
वेदिर्-देवैभ्यो निलायत । तां वेदेनान्वविन्दन् । वेदेन वेदिं विविदुः
पृथिवीम् । सा पप्रथे पृथिवी पार्थिवानि । गर्भं बिभर्ति भुवनेष्वन्तः ।
ततो यज्ञो जायते विश्वदानिरिति पुरस्ताथ् स्तम्बयजुषो वेदेन वेदिं
समाष्टर्यनुवित्यै । 69 (10)

T.B.3.3 9.11

अथो यद्-वेदश्च वेदिश्च भवतः । मिथुनत्वाय प्रजात्यै । प्रजापतेर्वा
एतानि श्मश्रूणि । यद्-वेदः । पत्निया उपस्थ आस्यति । मिथुनमेव
करोति । विन्दते प्रजाम् । वेदं होताऽऽहवनीयाथ्-स्तृणन्नेति ।
यज्ञमेव तथ् सन्तनोत्योत्तरस्मा-दर्धमासात् । तं सन्ततमुत्तरेऽर्धमास
आलभते । 70 (10)

T.B.3.3 9.12

तं काले॑काल॑ आ॒गते॑ यज॑ते । ब्र॒ह्मवा॑दि॒नो वद॑न्ति । स त्वा अ॒ध्वर्युः॑
 स्यात् । यो यतो॑ य॒ज्ञं प्र॑यु॒ङ्क्ते । तदे॑नं प्रति॒ष्ठाप॑यतीति । वा॒ताद्वा
 अ॒ध्वर्यु॑र्य॒ज्ञं प्र॑यु॒ङ्क्ते । दे॒वा गा॑तुविदो गा॒तुं वि॒त्वा गा॑तुमि॒तेत्या॑ह ।
 यत॑ ए॒व य॒ज्ञं प्र॑यु॒ङ्क्ते । तदे॑नं प्रति॒ष्ठाप॑यति । प्र॒ति॒ति॒ष्ठति॑ प्र॒जया॑
 प॒शुभिर्-य॑जमानः () । 71 (10)

(ति॒ष्ठती - मे॑ लो॒का - ग॑मयति - द्यौर् वृ॒ष्टिमे॑वाव॒रुन्धे - पर्य॑ध॒त्था
 इ॒त्याह॑ - स॒मि॒ष्ट्यै - भा॒गधे॑यं - ध॒त्तमि॒त्याह॑ - वा इ॒ध्म
 स॒म्वृ॑श्च॒ना - न्य॒नुवि॑त्त्यै - ल॒भते॑ - य॒जमा॑नः) (A9)

3.3.10 अनुवाकं 10 – पत्नीयोक्रविमोकः

T.B.3.3 10.1

यो वा अ॒यथा॑दे॒वतं॑ य॒ज्ञमु॑प॒चर॑ति । आ दे॒वता॑भ्यो वृ॒श्च्यते॑ । पापी॑यान्
 भव॑ति । यो य॒थादे॑वतम् । न दे॒वता॑भ्य आ॒वृ॒श्च्यते॑ । वसी॑यान् भव॑ति ।
 वा॒रु॒णो वै पा॑शः । इ॒मं वि॑ष्यामि वरु॒णस्य॑ पा॒शमि॒त्याह॑ ।
 वरु॒णपा॑शादे॒वैनां॑ मुञ्च॑ति । स॒वितृ॑प्र॒सूतो॑ यथादे॒वतम्॑ । 72 (10)

T.B.3.3 10.2

न दे॒वता॑भ्य॒ आवृ॑क्ष्यते । वसी॑यान् भवति । धा॒तुश्च॒ यो॒नौ॑ सु॒कृ॒तस्य॑
लो॒क इ॒त्याह॑ । अ॒ग्निर्वै॑ धा॒ता । पु॒ण्यं॑ क॒र्म सु॒कृ॒तस्य॑ लो॒कः ।
अ॒ग्निरे॒वैनां॑ धा॒ता । पु॒ण्ये॑ क॒र्मणि॑ सु॒कृ॒तस्य॑ लो॒के द॑धाति । स्यो॒नं मे॑
सह॑ प॒त्या करो॑मीत्याह । आ॒त्मन॑श्च॒ यज॑मानस्य॒ चाना॑त्यै सं॒त्वाय॑ ।
समा॑युषा॒ संप्र॑जयेत्याह । 73 (10)

T.B.3.3 10.3

आ॒शिष॑मे॒वैता॑माशास्ते पूर्ण॑पात्रे । अ॒न्ततो॑ऽनु॒ष्टुभा॑ । चतु॑ष्प॒द्वा
ए॒तच्छ॑न्दः प्र॒तिष्ठि॑तं प॒त्नियै॑ पूर्ण॑पात्रे भवति । अ॒स्मिन् लो॒के
प्र॒ति॒ति॒ष्ठानी॑ति । अ॒स्मिन्ने॒व लो॒के प्र॒ति॒ति॒ष्ठति॑ । अथो॑ वा॒ग्वा अ॒नु॒ष्टुक् ।
वाङ्मि॑थु॒नम् । आपो॑ रे॒तः प्र॒जन॑नम् । ए॒तस्मा॑द्वै मि॒थुना॑द्विद्यो॒तमानः॑
स्तन॑यन्वर्षति । रे॒तः सि॒ञ्चन् । 74 (10)

T.B.3.3 10.4

प्र॒जाः प्र॒जन॑यन् । यद्वै॑ य॒ज्ञस्य॑ ब्र॒ह्म॒णा यु॒ज्यते॑ । ब्र॒ह्म॒णा वै तस्य॑
विमो॑कः । अ॒द्भिः शान्तिः॑ । विमु॑क्तं वा ए॒तर्हि॑ यो॒क्त्रं ब्र॒ह्म॒णा ।
आ॒दायै॑न॒त्पत्नी॑ सहाप॒ उपगृ॑ह्णीते शान्त्यै॑ । अ॒ञ्जलौ॑ पूर्ण॑पात्रमा॒नय॑ति ।

रेत॑ ए॒वास्यां॑ प्र॒जां द॒धाति॑ । प्र॒जया॑ हि म॒नुष्यः॑ पू॒र्णः ।

मुखं॑ वि॒मृष्टे॑ () । अव॒भृथ॑स्यै॒व रूपं॑ कृ॒त्वोत्तिष्ठ॑ति । 75 (11)

(स॒वितृ॑प्र॒सूतो॑ यथादे॒वतं॑-प्र॒जये॑त्याह-सि॒ञ्चन्-मृष्ट॑ एकं॑ च) (A10)

3.3.11 अनु॒वाकं॑ 11 – उप॒वेषो॑पगू॒हनम्

T.B.3.3 11.1

परि॒वेषो॑ वा ए॒ष वन॑स्पती॒नाम् । यदु॑प॒वेषः॑ । य ए॒वं वैद॑ ।

वि॒न्दते॑ परि॒वेषा॑रम् । तमु॒त्करो॑ । यं दे॒वा म॒नुष्ये॑षु । उप॒वेषम॑धा॒रयन् ।

ये अ॒स्मद॑प॒चेत॑सः । तान॒स्मभ्य॑-मिहा॒कुरु॑ ।

उप॒वेषो॑प॒विद्धि॑ नः । 76 (10)

T.B.3.3 11.2

प्र॒जां पु॒ष्टिम॑थो॒ धन॑म् । द्वि॒पदो॑ नश्चतु॒ष्पदः॑ । ध्रु॒वान-न॑प॒गान्-कु॒र्विति॑

पु॒रस्ता॑त् प्र॒त्यञ्च॑मु॒पगू॑हति । तस्मा॑त् पु॒रस्ता॑त् प्र॒त्यञ्चः॑ शू॒द्रा

अव॑स्यन्ति । स्थ॒विमत॑ उप॒गूह॑ति । अ॒प्रति॑वादि॒न ए॒वैनान्॑ कुरु॒ते ।

धृ॒ष्टिर्वा॑ उप॒वेषः॑ । शु॒चा॒र्तो वज्रो॑ ब्र॒ह्मणा॑ सञ्शितः॑ ।

योप॑वेषे शुक् । सा॒ऽमुमृ॑च्छतु॒ यं द्वि॒ष्म इति॑ । 77 (10)

T.B.3.3 11.3

अ॒था॒स्मै॑ नाम॒ गृह्य॑ प्र॒हर॑ति । नि॒र॒मुं॑ नु॒द ओ॒क॒सः॑ । स॒प॒त्नो॒ यः
पृ॒त॒न्य॑ति । नि॒र्बा॒ध्ये॒न ह॒विषा॑ ॥ इ॒न्द्र ए॒णं॑ प॒रा॒शरी॑त् । इ॒हि ति॒स्रः
प॒रा॒वतः॑ । इ॒हि प॒ञ्च॒जना॑ अ॒ति । इ॒हि ति॒स्रोऽति॑ रो॒चना॑ यावत् ।
सू॒र्यो अ॒सद्-दि॒वि । प॒र॒मां त्वा॑ प॒रा॒वत॑म् । 78 (10)

T.B.3.3 11.4

इ॒न्द्रो न॑यतु वृ॒त्रहा॑ । यतो॒ न पु॑नराय॒सि । श॒श्वती॑भ्यः स॒मा॒भ्य इति॑ ।
त्रि॒वृ॒द्धा ए॒ष व॒ज्रो ब्र॑ह्म॒णा सञ्शितः॑ । शु॒चै॒वैनं॑ वि॒द्ध्वा । ए॒भ्यो
लो॒के॒भ्यो निर्णु॑द्य । व॒ज्रेण॑ ब्र॒ह्म॒णा स्तृ॑णुते । ह॒तो ऽसा॑व॒वधि॑ष्मा-
मु॒मित्या॑ह स्तृ॒त्यै । यं द्वि॒ष्यात्तं॑ ध्या॒येत् । शु॒चै॒वैन-
म॒र्पय॑ति () । 79 (10) (नो-द्विष्य इति-परावत-मर्पयति) (A11)

Prapaataka Korvai with starting Padams of 1 to 11 Anuvaakams :-

(प्र॒त्युष्टं॑ – दि॒वः शि॒ल्प – म॒य॒ज्ञो – धृ॒तं च॑ – दे॒वा॒सु॒राः स
ए॒त॒मि॒न्द्र – आ॒पो दे॒वी – र॒ग्नि॒ना – धि॒ष्णि॒या –
अथ॑ सु॒चौ – यो॒ वा अ॒य॒था॒दे॒वतं॑ – प॒रि॒वेषो॑ वा ए॒का॒द॒श)

तैत्तिरीय ब्राह्मणम् – (TB 3.3)

Korvai with starting Padams of 1, 11, 21 Series of Dasinis :-

(प्र॒त्यु॒ष्ट – म॒य॒ज्ञ – ए॒षा हि वि॒श्वे॒षां दे॒वाना॑ – मू॒र्जा पृ॒थि॒वी –
म॒थो र॒क्ष॒सां – तां प्र॒जातिं॑ – द्वा॒भ्यां – तं का॒ले॒का॒ले न॒वस॒प्त॒तिः)

First and Last Padam 3rd Ashtakam 3rd Prapaatakam :-

(प्र॒त्यु॒ष्टꣳ – शु॒चै॒वैन॑म॒र्प॒य॒ति)

। हरिः॑ ओम् ।

। कृष्ण यजुर्वेदीय तैत्तिरीय ब्राह्मणे तृतीयाष्टके तृतीय प्रपाठकः समाप्तः ।

=====

**Details of Dasani & Vaakyams for Ashtakam 3 –
Prapaatakam 3 – (TB 3.3)**

	Dasini	Vaakyams
Anuvakam 1	5	55
Anuvakam 2	5	56
Anuvakam 3	5	50
Anuvakam 4	6	66
Anuvakam 5	5	52
Anuvakam 6	11	116
Anuvakam 7	11	113
Anuvakam 8	11	114
Anuvakam 9	12	120
Anuvakam 10	4	41
Anuvakam 11	4	40
Total →	79	823

3.4 तृतीयाष्टके चतुर्थः प्रपाठकः – पुरुषमेधः

3.4.1 to 3.4.19 – पुरुषमेधः

T.B.3.4.1.1

ब्र॒ह्म॒णो ब्रा॒ह्म॒णमा॒ल॒भ॒ते । क्ष॒त्राय॑ रा॒ज॒न्य॒म् । म॒रुद्भ्यो॑ वै॒श्य॒म् ॥
तप॑से शू॒द्र॒म् । तम॑से तस्कर॒म् । ना॒र॒काय॑ वी॒र॒ह॒ण॒म् ॥
पा॒प्म॒ने क्ली॒ब॒म् । आ॒क्र॒याया॑यो॒गू॒म् । का॒माय॑ पु॒ञ्च॒ल॒म् ॥
अ॒ति॒क्रु॒ष्टाय॑ मा॒ग॒ध॒म् । 1 (10) (A1)

T.B.3.4.2.1

गी॒ताय॑ सू॒त॒म् । नृ॒त्ताय॑ शै॒लू॒ष॒म् । ध॒र्माय॑ स॒भाच॑र॒म् । न॒र्माय॑ रे॒भ॒म् ।
न॒रि॒ष्टायै॑ भी॒म॒ल॒म् । ह॒साय॑ का॒रि॒म् । आ॒न॒न्दाय॑ स्त्री॒ष॒ख॒म् । प्र॒मु॒दे
कु॒मा॒रीपु॒त्र॒म् । मे॒धायै॑ रथ॒का॒र॒म् । धै॒र्याय॑ तक्ष॒ाण॒म् । 2 (10) (A2)

T.B.3.4.3.1

श्र॒माय॑ कौ॒ला॒ल॒म् । मा॒यायै॑ का॒र्मा॒र॒म् । रू॒पाय॑ म॒णि॒का॒र॒म् ।
शु॒भे व॒प॒म् । श॒र॒व्याया॑ इ॒षु॒का॒र॒म् । हे॒त्यै ध॑न्व॒का॒र॒म् ।
क॒र्म॒णे ज्या॑का॒र॒म् । दि॒ष्टाय॑ रज्जु॒स॒र्ग॒म् । मृ॒त्य॒वे मृ॑ग॒यु॒म् ।

अ॒न्त॒का॒य॒ श्व॒नि॒तं । ३ (10) (A3)

T.B.3.4.4.1

स॒न्ध॒ये॒ जा॒रम् । गे॒हा॒यो॒प॒प॒तिम् । नि॒र्ऋ॒त्यै॒ परि॒वि॒त्तम् ।
आ॒त्यै॒ परि॒वि॒वि॒दा॒नम् । अ॒रा॒ध्यै॒ दि॒धि॒षू॒प॒तिम् । प॒वि॒त्रा॒य॒ भि॒ष॒जम् ।
प्र॒ज्ञा॒ना॒य॒ नक्ष॒त्र॒दर्श॒म् । नि॒ष्कृ॒त्यै॒ पेश॒स्का॒रीम् । ब॒ला॒यो॒ प॒दाम् ।
व॒र्णा॒या॒नू॒रु॒धम् । ४ (10) (A4)

T.B.3.4.5.1

न॒दी॒भ्यः॒ पौ॒ञ्जि॒ष्टम् । ऋ॒क्षी॒का॒भ्यो॒ नैषा॒दम् । पु॒रु॒ष॒व्या॒घ्रा॒य॒ दु॒र्म॒दम् ।
प्र॒यु॒द्भ्य॒ उ॒न्म॒त्तम् । ग॒न्ध॒र्वा॒प्स॒रा॒भ्यो॒ व्रा॒त्यम् । सर्प॑दे॒व॒ज॒ने॒भ्यो
ऽप्र॑ति॒प॒दम् । अ॒वे॒भ्यः॒ कि॒त॒वम् । इ॒र्य॑ता॒या॒ अ॒कि॒त॒वम् । पि॒शा॒चे॒भ्यो
बि॒द॒ल॒का॒रम् । या॒तु॒धा॒नै॒भ्यः॒ कण्ठ॑क॒का॒रम् । ५ (10) (A5)

T.B.3.4.6.1

उ॒थ्सा॑दे॒भ्यः॒ कु॒ब्ज॒म् । प्र॒मु॒दे॒ वा॒म॒नम् । द्वा॒भ्यः॒ स्रा॒मम् ।
स्व॒प्ना॒या॒न्ध॒म् । अ॒ध॒र्मा॒य॒ ब॒धि॒रम् । सं॒ज्ञा॒ना॒य॒ स्म॒र॒का॒रीम् ।
प्र॒का॒मो॒द्या॒यो॒प॒स॒दम् । आ॒शि॒क्षा॒यै॒ प्र॒श्नि॒नम् । उ॒प॒शि॒क्षा॒या॒
अ॒भि॒प्र॒श्नि॒नम् । म॒र्या॑दा॒यै॒ प्र॒श्न॑वि॒वा॒कम् । ६ (10) (A6)

T.B.3.4.7.1

ऋ॒त्यै स्ते॒नहृ॒दय॑म् । वै॒रह॑त्याय पि॒शुन॑म् । वि॒वित्त्यै॑ क्ष॒त्तार॑म् ।
 औ॒प॒द्र॒ष्टाय॑ सं॒ग्रही॑तारम् । ब॒ला॒या॒नु॒चर॑म् । भू॒म्ने॑ परि॒ष्क॒न्दम् ।
 प्रि॒याय॑ प्रि॒यवा॑दिनम् । अ॒रि॒ष्ट्या॑ अ॒श्वसा॑दम् । मे॒धाय॑ वा॒सः प॒ल्पू॒लीम् ।
 प्र॒का॒मा॒य रज॑यित्रीम् । 7 (10) (A7)

T.B.3.4.8.1

भा॒यै दा॒र्वाहा॑रम् । प्र॒भा॒या आ॒ग्ने॒न्ध॑म् । ना॒क॒स्य॑ पृ॒ष्ठा॒या॒भिषे॑त्तारम् ।
 ब्र॒ध्न॒स्य॑ वि॒ष्टपा॑य पा॒त्रनि॑र्ण॒गम् । दे॒वलो॑काय पे॒शिता॑रम् ।
 म॒नु॒ष्यलो॑काय प्र॒करि॑तारम् । स॒र्वेभ्यो॑ लो॒केभ्य॑ उप॒से॒त्तार॑म् ।
 अ॒व॒र्त्यै॑ व॒धा॒योप॑मन्थि॒तार॑म् । सु॒व॒र्गा॒य लो॑काय भा॒गदु॑घम् ।
 व॒र्षि॒ष्ठाय॑ ना॒काय॑ परि॒वेष्टा॑रम् । 8 (10) (A8)

T.B.3.4.9.1

अ॒र्मेभ्यो॑ ह॒स्ति॒पम् । ज॒वा॒या॒श्च॒पम् । पु॒ष्ट्यै॑ गो॒पाल॑म् ।
 ते॒ज॒सेऽज॑पालम् । वी॒र्या॑यावि॒पाल॑म् । इ॒रा॒यै॑ की॒नाश॑म् ।
 की॒ला॒ला॒य सु॒राका॑रम् । भ॒द्राय॑ गृ॒हप॑म् । श्रे॒य॒से॒ वित्त॑धम् ।
 अ॒ध्य॒क्षा॒या॒नु॒क्ष॒त्तार॑म् । 9 (10) (A9)

T.B.3.4.10.1

मन्यवेऽयस्तापम् । क्रो॒धाय॑ नि॒सरम् । शो॒काया॑भि॒सरम् ।
उ॒त्कूल॑वि॒कूला॑भ्यां॑ त्रि॒स्थिन॑म् । यो॒गाय॑ यो॒क्तार॑म् । क्षे॒माय॑
विमो॒क्तार॑म् । वपु॑षे मा॒नस्कृ॑तम् । शी॒लाया॑ञ्जनी॒कारम् ।
नि॒र॒ऋत्यै॑ को॒शका॑रीम् । य॒माया॑सूम् । 10 (10) (A10)

T.B.3.4.11.1

य॒म्यै य॒मसू॑म् । अथ॑र्व॒भ्योऽव॑तो॒काम् । स॒म्व॑त्स॒राय॑ प॒र्या॒रिणी॑म् ।
प॒रि॒व॒त्स॒राया॑वि॒जाता॑म् । इ॒दा॒व॒त्स॒राया॑प॒स्क॒द्वरी॑म् ।
इ॒द्व॒त्स॒राया॑ती॒त्वरी॑म् । व॒त्स॒राय॑ वि॒ज॒र्ज॒राम् । स॒र्व॒त्स॒राय॑ प॒लि॒क्नी॑म् ।
व॒नाय॑ व॒न॒पम् । अ॒न्य॒तो॒र॒ण्याय॑ दा॒व॒पम् । 11 (10) (A11)

T.B.3.4.12.1

स॒रो॒भ्यो धै॒व॒रम् । वे॒श॒न्ता॒भ्यो दा॑शम् । उ॒प॒स्था॒वरी॑भ्यो॒ बै॒न्दम् ।
न॒ड्व॒ला॒भ्यः शौ॒ष्क॒लम् । पा॒र्या॑य॒ कै॒व॒र्तम् । अ॒वा॒र्या॑य॒ मा॒र्गा॒रम् ।
ती॒र्थे॒भ्य आ॑न्दम् । वि॒ष॒मे॒भ्यो मै॑ना॒लम् । स्व॒ने॒भ्यः प॑र्ण॒कम् ।
गु॒हा॒भ्यः कि॑रा॒तम् । सा॒नु॒भ्यो ज॑म्भ॒कम् ।
प॒र्व॒ते॒भ्यः किं॑ पू॒रुष॑म् । 12 (12) (A12)

T.B.3.4.13.1

प्र॒ति॒श्रु॒त्का॒या ऋ॒तु॒लम् । घो॒षाय॑ भ॒षम् । अ॒न्ताय॑ बहु॒वादि॑नम् ।
 अ॒नन्ताय॑ मू॒कम् । म॒ह॒से वी॒णावा॑दम् । क्रो॒शाय॑ तू॒णव॑ध्मम् ।
 आ॒क्र॒न्दाय॑ दु॒न्दु॒भ्याघा॑तम् । अ॒वर॑स्प॒राय॑ शङ्ख॒ध्मम् ।
 ऋ॒भु॒भ्योऽजि॑नस॒न्धाय॑म् । सा॒ध्ये॒भ्यश्च॑र्म॒म्णम् । 13 (10) (A13)

T.B.3.4.14.1

बी॒भ॒त्सायै॑ पौ॒ल्क॒सम् । भू॒त्यै जा॑गर॒णम् । अ॒भू॒त्यै स्व॑प॒नम् । तु॒लायै॑
 वा॒णिज॑म् । वर्णा॑य हि॒र॒ण्यका॑रम् । वि॒श्वे॒भ्यो दे॒वेभ्यः॑ सि॒ध्मल॑म् ।
 प॒श्चाद्-दो॑षाय॑ ग्ला॒वम् । ऋ॒त्यै ज॑नवा॒दिन॑म् । व्यृ॒द्ध्य॑ अप॒गल्भ॑म् ।
 स॒ञ्श॒राय॑ प्र॒च्छि॒दम् । 14 (10) (A14)

T.B.3.4.15.1

ह॒साय॑ पु॒ञ्च॒लूमा॑लभ॒ते । वी॒णावा॑दं ग॒णकं॑ गी॒ताय॑ ।
 या॒द॒से शा॑बु॒ल्याम् । न॒र्माय॑ भ॒द्रव॑तीम् । तू॒णव॑ध्मं ग्रा॒म॒ण्यं पा॑णिसं॒घातं॑
 नृ॒त्ताय॑ । मो॒दाया॑नु॒क्रो॒शक॑म् । आ॒न॒न्दाय॑ त॒ल॒वम् । 15 (7) (A15)

T.B.3.4.16.1

अक्षराजाय॑ कित॒वम् । कृ॒ताय॑ सभा॒विनम्॑ । त्रेता॑या आदि॒नवद॑र्शम् ।
द्वाप॑राय ब॒हिः स॒दम् । क॒लये॑ सभा॒स्थाणु॑म् । दु॒ष्कृ॒ताय॑ च॒रका॑चार्यम् ।
अध्व॑ने ब्र॒ह्मचा॑रिणम् । पि॒शाचे॑भ्यः सै॒लगम् । पि॒पासा॑यै गो॒व्यच्छ॑म् ।
नि॒र॒ऋत्यै॑ गो॒घात॑म् । क्षु॒धे गो॑वि॒कर्त॑म् । क्षु॒त्तृष्णा॑भ्यां तम् ।
यो गां॑ वि॒कृ॒न्तन्तं॑ मा॒ऽसं॑ भि॒क्षमा॑ण उप॒तिष्ठ॑ते । 16 (13) (A16)

T.B.3.4.17.1

भूम्यै॑ पी॒ठस॑र्पिण॒माल॑भते । अ॒ग्नये॑ऽऽस॒लम् । वा॒यवे॑ चाण॒डाल॑म् ।
अ॒न्तरि॑क्षाय व॒ऽशन॑र्ति॒नम् । दि॒वे ख॑ल॒तिम् । सू॒र्याय॑ ह॒र्यक्ष॑म् ।
च॒न्द्रम॑से मि॒र्मिर॑म् । नक्ष॑त्रेभ्यः कि॒लास॑म् । अ॒ह्ने शु॒क्लं पि॑ङ्ग॒लम् ।
रा॒त्रियै॑ कृ॒ष्णं पि॑ङ्गाक्षम् । 17 (10) (A17)

T.B.3.4.18.1

वा॒चे पु॒रुष॑माल॒भते॑ । प्रा॒णम॑पानं॒ व्या॒नमु॑दानं॒ समानं॑ तान् । वा॒यवे॑ ।
सू॒र्याय॑ चक्षु॒राल॑भते । म॒नश्च॑न्द्रम॑से । दि॒ग्न्यः श्रो॑त्रम् ।
प्र॒जाप॑तये॒ पुरु॑षम् । 18 (6) (A18)

T.B.3.4.19.1

अथै॒तान॑रूपे॒भ्य आ॑लभते । अति॑ह्रस्व-मति॑दीर्घम् ।
 अति॑कृ॒शम॑त्य॒सल॑म् । अति॑शु॒क्ल-मति॑कृ॒ष्णम् । अति॑श्लक्ष्ण-
 मति॑लोम॒शम् । अति॑कि॒रिट-मति॑दन्तु॒रम् । अति॑मि॒र्मिर-मति॑मे॒मिष॑म् ।
 आ॒शायै॑ जा॒मिम् । प्र॒तीक्षायै॑ कु॒मारी॑म् । 19 (9) (A19)

Prapaataka Korvai with starting Padams of 1 to 19 Anuvaakams :-

(ब्रह्म॑णे – गी॒ताय॑ – श्र॒माय॑ – सन्ध॑ये – नदी॑भ्य – उ॒त्सादे॑भ्य –
 ऋ॒त्यै – भा॒या – अ॒र्मे॑भ्यो – म॒न्यवे॑ – य॒म्यै द॑श द॑श – स॒रो॑भ्यो
 द्वा॒दश॑ – प्र॒तिश्रु॑त्कायै – बी॒भ॒त्सायै॑ द॑श द॑श – ह॒साय॑ स॒प्ता-
 क्ष॒राजा॑य त्रयो॑दश – भू॒म्यै द॑श – वा॒चे ष॑डथ – न॒वैका॑न्न
 वि॒ंशतिः॑)

Korvai with starting Padams of 1, 11, 21 Series of Dasinis :-

(ब्रह्म॑णे – य॒म्यै न॑वद॑श)

तृतीयाष्टके चतुर्थः प्रपाठकः – (TB 3.4)

First and Last Padam 3rd Ashtakam 4th Prapaatakam :-

॥
(ब्रह्मणे – कुमारीम्)
–

॥
। हरिः ओम् ।

। कृष्ण यजुर्वेदीय तैत्तिरीय ब्राह्मणे तृतीयाष्टके चतुर्थ प्रपाठकः

समाप्तः ।

Details of Dasani & Vaakyams for Ashtakam 3 –
Prapaatakam 4 – TB 3.4

	Dasini	Vaakyams
Anuvakam 1	1	10
Anuvakam 2	1	10
Anuvakam 3	1	10
Anuvakam 4	1	10
Anuvakam 5	1	10
Anuvakam 6	1	10
Anuvakam 7	1	10
Anuvakam 8	1	10
Anuvakam 9	1	10
Anuvakam 10	1	10
Anuvakam 11	1	10
Anuvakam 12	1	12
Anuvakam 13	1	10
Anuvakam 14	1	10
Anuvakam 15	1	7
Anuvakam 16	1	13
Anuvakam 17	1	10
Anuvakam 18	1	6
Anuvakam 19	1	9
Total →	19	187

3.5 तृतीयाष्टके पञ्चमः प्रपाठकः – इष्टिहौत्रम्

3.5.1 अनुवाकं 1 – होतुर्जपः पुरस्तात् सामिधेनीनाम्

T.B.3.5.1.1

स॒त्यं प्र॒पद्ये॑ । ऋ॒तं प्र॒पद्ये॑ । अ॒मृतं॑ प्र॒पद्ये॑ । प्र॒जाप॑तेः प्रि॒यां
त॒नुव॑म॒नार्तां॑ प्र॒पद्ये॑ । इ॒दम॑हं पञ्चद॒शेन॑ वज्रेण । द्विष॑न्तं
भ्रातृ॑व्यमव॒क्रामा॑मि । योऽस्मा॑न् द्वेष्टि॑ । यं च॑ वयं द्विष॑मः ।
भूर्भुवः॑ सु॒वः । हि॒म् । 1 (10) (स॒त्यं द॒श) (A1)

3.5.2 अनुवाकं 2 – सामिधेनीमन्वाह

T.B.3.5.2.1

प्र वो॑ वा॒जा अ॒भिद्य॑वः । ह॒विष्म॑न्तो घृ॒ताच्या॑ । दे॒वाज्जि॑गाति सु॒म॒न॒युः ।
अ॒ग्न आ॑याहि वी॒तये॑ । गृ॒णानो॑ ह॒व्यदा॑तये । नि होता॑ स॒त्सि
ब॒र्हिषि॑ । तं त्वा॑ स॒मिद्भि॑र॒ङ्गिरः॑ । घृ॒तेन॑ वर्ध॒याम॑सि ।
बृ॒हच्छो॑चा यवि॒ष्ट्य । स नः॑ पृ॒थु श्र॑वाय्यम् । 2 (10)

T.B.3.5.2.2

अच्छा॑ दे॒व वि॒वास॑सि । बृ॒हद॑ग्ने सु॒वीर्य॑म् । ई॒डेन्यो॑ नम॒स्यस्ति॑रः ।
तमा॑सि द॒र्श॒तः । स॒म॒ग्निरि॑ध्यते वृषा॑ । वृषो॑ अ॒ग्निः स॒मिध्य॑ते ।
अश्वो॑ न दे॒ववा॑हनः । त॒ ह॒विष्म॑न्त ई॒डते॑ । वृष॑णं त्वा वयं वृष॑न् ।

वृषाणः समिधीमहि । 3 (10)

T.B.3.5.2.3

अग्ने दी॒द्यतं॑ बृ॒हत् । अ॒ग्निं दू॒तं वृ॑णीमहे । हो॒तारं वि॒श्ववे॑दसम् ।
अस्य॑ य॒ज्ञस्य॑ सु॒क्रतु॑म् । समि॒ध्यमा॑नो अध्व॒रे । अ॒ग्निः पा॒वक॑ ई॒ड्यः ।
शो॒चिष्के॑ श॒स्तमी॑महे । समि॒द्धो अ॒ग्न आ॑हुत । दे॒वान् य॑क्षि स्वध्व॒र ।
त्व॒ हि ह॒व्यवा॑डसि () । आ॒जुहो॑त दु॒वस्य॑त । अ॒ग्निं प्र॑यत्यध्व॒रे ।
वृ॒णीध्व॑ ह॒व्यवा॑हनम् । त्वं व॑रुण उ॒त मि॒त्रो अ॒ग्ने । त्वां व॑र्धन्ति
म॒तिभि॑र्वसि॒ष्ठाः । त्वे व॑सु सु॒षण॑नानि सन्तु । यू॒यं पा॑त स्व॒स्तिभिः॑
सदा॑ नः । 4 (17) (श्र॒वाय्य॑ – मि॒धीम॑ – ह्य॒सि स॑प्त च) (A2)

3.5.3 अनुवाकं 3 – प्रमुक्त्वा निविदोऽनूच्य देवता आवाहयति

T.B.3.5.3.1

अग्ने॑ म॒हा अ॒सि ब्रा॑ह्मण भा॒रत॑ । अ॒साव॑सौ । दे॒वेद्धो॑ म॒न्विद्धः॑ ।
ऋ॒षिष्टु॑तो वि॒प्रानु॑मदितः । क॒विश॑स्तो ब्र॒ह्मस॑ शि॒तो घृ॑ताह॒वनः॑ ।
प्र॒णीर्-य॒ज्ञाना॑म् । र॒थीर॑ध्व॒राणा॑म् । अ॒तूर्तो॑ हो॒ता । तू॒र्णिर्-ह॒व्यवा॑ट् ।
आ॒स्पात्रं॑ जु॒हूर्-दे॒वाना॑म् । 5 (10)

T.B.3.5.3.2

च॒म॒सो॒ दे॒व॒पा॒नः॑ । अ॒रा॒॒ इ॒वा॒ग्ने॑ ने॒मि॒र्दे॒वा॒॒स्त्वं॑ परि॒भूर॑सि । आ॒व॒ह
 दे॒वा॒न् य॒ज॒मा॒नाय॑ । अ॒ग्नि॒म॒ग्न आ॒व॒ह । सो॒म॒मा॒व॒ह । अ॒ग्नि॒मा॒व॒ह ।
 प्र॒जा॒प॒ति॒मा॒व॒ह । अ॒ग्नी॒षो॒मा॒वा॒व॒ह । इ॒न्द्रा॒ग्नी आ॒व॒ह ।
 इ॒न्द्र॒मा॒व॒ह () । म॒हे॒न्द्र॒मा॒व॒ह । दे॒वा॒॒ आ॒ज्य॒पा॒॒ आ॒व॒ह ।
 अ॒ग्नि॒॒ हो॒त्रा॒या॒व॒ह । स्वं॑ म॒हि॒मा॒न॒मा॒व॒ह । आ॒ चा॒ग्ने॑ दे॒वा॒न् व॒ह ।
 सु॒य॒जा च॑ य॒ज जा॒तवे॑दः । 6 (16) (दे॒वा॒ना-मि॒न्द्र॒मा॒व॒ह षट्च॑) (A3)

3.5.4 अनुवाकं 4 – सुचावादापयति

T.B.3.5.4.1

अ॒ग्नि॒र् होता॑ वे॒त्व॒ग्निः॑ । हो॒त्रं वे॑त्तु प्रा॒वि॒त्रम् । स्मो॑ व॒यम् ।
 सा॒धु ते॑ य॒ज॒मा॒न दे॒वता॑ । घृ॒त॒व॒ती-म॒ध्व॒र्यो सु॒च॒मा॒॒स्य॒स्व । दे॒वा॒यु॒वं
 वि॒श्व॒वा॒राम् । ई॒डा॒म॒है दे॒वा॒॒ ई॒डे॒न्यान् । न॒म॒स्या॒म न॒म॒स्यान् ।
 य॒जा॒म य॒ज्ञि॒या॒न् । 7 (9) (अ॒ग्नि॒र् होता॑ न॒व) (A4)

3.5.5 अनुवाकं 5 – प्रयाजाः

T.B.3.5.5.1

स॒मि॒धो॑ अ॒ग्न आ॒ज्य॒स्य॑ वि॒यन्तु॑ । त॒नू॒नपा॑द॒ग्न आ॒ज्य॒स्य॑ वे॒तु । इ॒डो॑
 अ॒ग्न आ॒ज्य॒स्य॑ वि॒यन्तु॑ । ब॒र्हि॒र॒ग्न आ॒ज्य॒स्य॑ वे॒तु । स्वा॒हा॒ऽग्नि॑म् ।
 स्वा॒हा सो॑मम् । स्वा॒हा॒ऽग्नि॑म् । स्वा॒हा प्र॑जा॒पति॑म् ।
 स्वा॒हा॒ऽग्नी॒षोमौ॑ । स्वा॒हेन्द्रा॑ग्नी () । स्वा॒हेन्द्र॑म् । स्वा॒हा म॑हेन्द्र॑म् ।
 स्वा॒हा दे॒वा॒ऽ आ॒ज्य॒पान् । स्वा॒हा॒ऽग्नि॑ऽ हो॒त्राज्जु॑षा॒णाः ।
 अ॒ग्न आ॒ज्य॒स्य॑ वि॒यन्तु॑ । 8 (15) (इन्द्रा॑ग्नी पञ्च॑ च) (A5)

3.5.6 अनुवाकं 6 – अज्यभागयोः पुरोनुवाक्ये

T.B.3.5.6.1

अ॒ग्निर्-वृ॒त्राणि॑ ज॒ङ्घन॑त् । द्र॒वि॒णस्यु॑र्-वि॒प॒न्यया॑ । स॒मि॒द्धः शु॒क्र
 आ॒हुतः॑ । जु॒षा॒णो अ॒ग्निरा॑ज्य॒स्य वे॒तु । त्व॑ऽ सो॒मासि॑ स॒त्पतिः॑ ।
 त्व॑ऽ रा॒जो॒त वृ॒त्रहा॑ । त्वं भ॒द्रो अ॒सि क्र॑तुः । जु॒षा॒णः सो॒म
 आ॒ज्य॒स्य ह॒विषो॑ वे॒तु । अ॒ग्निः प्र॒ले॒न ज॑न्म॒ना । शु॒म्भान॑स्त॒नुव॑ऽ
 स्वा॒म् () । क॒विर्-वि॒प्रेण॑ वावृ॒धे । जु॒षा॒णो अ॒ग्निरा॑ज्य॒स्य वे॒तु ।
 सो॒म गी॑र्भिष्ट्वा॒ वय॑म् । वर्ध॑यामो॒ वचो॑वि॒दः । सु॒मृ॒डीको॑ न

आ॒वि॒श । जु॒षा॒णः सो॒म आ॒ज्य॒स्य ह॒वि॒षो वे॒तु । 9 (16)

(स्वा॒ षट्च) (A6)

3.5.7 अनुवाकं 7 – हविषां याज्यानुवाक्याः

T.B.3.5.7.1

अ॒ग्नि॒र्-मूर्धा॑ दि॒वः क॒कु॒त् । प॒तिः पृ॒थि॒व्या अ॒यम् । अ॒पा॒ रे॒ता॒सि
जि॒न्व॒ति । भु॒वो य॒ज्ञ॒स्य र॒ज॒सश्च ने॒ता । य॒त्रा नि॒यु॒द्धिः स॒च॒से
शि॒वा॒भिः । दि॒वि मूर्धा॑नं द॒धि॒षे सु॒व॒र्षाम् । जि॒ह्वा॒ग्ने च॒कृ॒षे
ह॒व्य॒वा॒हम् ॥ प्र॒जा॒प॒ते न त्वदे॒तान्य॒न्यः । वि॒श्वा जा॒तानि॒ परि॒ ता ब॒भूव॑ ।
यत्-का॒मा॒स्ते जु॒हु॒म॒स्तन्नो॑ अ॒स्तु । 10 (10)

T.B.3.5.7.2

व॒य॒ स्या॑म प॒तयो॑ र॒यी॒णाम् । स वे॑द पु॒त्रः पि॒तर॒ स मा॒तर॒म् ।
स सू॒नु॒र्भु॒व॒थ्स भु॒व॒त्पु॒न॒र्म॒घः । स द्या॒मौ॒र्णो॒द॒न्त॒रि॒क्ष॒ सु॒वः ।
स वि॒श्वा भु॒वो अ॒भ॒व॒थ्स आ॒भ॒व॒त् । अ॒ग्नी॒षो॒मा स॒वे॒द॒सा । स॒हू॒ती
व॒न॒तं गि॒रः । सं दे॒व॒त्रा ब॒भूव॑थुः । यु॒व॒मे॒तानि॑ दि॒वि रो॒च॒नानि॑ ।
अ॒ग्निश्च॑ सो॒म स॒क्र॒तू अ॒ध॒त्तम् । 11 (10)

T.B.3.5.7.3

यु॒व॒ꣳ सि॒न्धूꣳ र॒भि॒श॒स्ते-र॒व॒द्यात् । अ॒ग्नी॒षो॒मा-व॒मु॒ञ्च॒तं गृ॒भी॒ता॒न् ।
 इ॒न्द्रा॒ग्नी रो॒च॒ना दि॒वः । परि॒ वा॒जेषु॑ भू॒षथः॑ । त॒द्वां चे॒ति प्र॒वी॒र्य॑म् ।
 इ॒न॒थ॒द्वृ॒त्रमु॒त स॒नो॒ति वा॒जम् । इ॒न्द्रा यो॑ अ॒ग्नी स॒हुरी॑ स॒पर्या॑त् ।
 इ॒र॒ज्य॒न्ता व॒स॒व्य॒स्य भू॒रेः । स॒ह॒स्त॒मा स॒ह॒सा वा॒ज॒य॒न्ता ।
 ए॒न्द्र सान॑सिꣳ र॒यिम् । 12 (10)

T.B.3.5.7.4

स॒जि॒त्वानꣳ स॒दा॒स॒हम् । व॒र्षि॒ष्ठ॒मू॒तये॑ भर । प्र॒स॒सा॒हि॒षे पु॒रु॒हू॒त
 श॒त्रून् । ज्ये॒ष्ठ॒स्ते शु॒ष्म इ॒ह रा॒तिर॑स्तु । इ॒न्द्रा॒भर॑ द॒क्षि॒णे॒ना व॒सू॒नि ।
 प॒तिः सि॒न्धू॒नाम॑सि रे॒वती॑नाम् । म॒हाꣳ इ॒न्द्रो य॑ ओ॒ज॒सा ।
 प॒र्जन्यो॑ वृ॒ष्टि॒माꣳ इ॒व । स्तो॒मैर्व॑थ्स॒स्य वा॒वृ॒धे ।
 म॒हां इ॒न्द्रो नृ॒व॒दा॒चर्ष॑णि॒प्राः । 13 (10)

T.B.3.5.7.5

उ॒त द्वि॒र्ब॒र्हा अ॒मि॒नः स॒हो॒भिः । अ॒स्म॒द्रि॒य॒ग्वा॒वृ॒धे वी॒र्या॑य ।
 उ॒रुः पृ॒थुः सु॒कृ॒तः क॒र्तृ॒भिर्भू॑त् । पि॒प्री॒हि दे॒वाꣳ उ॒श॒तो॑ य॒वि॒ष्ठ ।
 वि॒द्वां ऋ॒तूꣳर् ऋ॒तु॒प॒ते य॒जे॒ह । यो॑ दै॒व्या ऋ॒त्वि॒ज॒स्तेभि॑र॒ग्ने ।

त्व॑ हो॒तृ॒णाम॑स्यायजिष्ठः । अ॒ग्नि॑ स्वि॒ष्टकृ॑तम् । अया॑ङ्गि॒रग्नेः॑
प्रि॒या धा॑मानि । अया॑ट्थ॒सोम॑स्य प्रि॒या धा॑मानि । 14 (10)

T.B.3.5.7.6

अया॑ङ्गनेः प्रि॒या धा॑मानि । अया॑ट्प्रजापतेः प्रि॒या धा॑मानि ।
अया॑ङ्गनी॒षोम॑योः प्रि॒या धा॑मानि । अया॑ङिन्द्रा॒ग्नियोः॑ प्रि॒या धा॑मानि ।
अया॑ङिन्द्र॒स्य प्रि॒या धा॑मानि । अया॑ण्महेन्द्र॒स्य प्रि॒या धा॑मानि ।
अया॑ङ्दे॒वाना॑-मा॒ज्यपा॑नां प्रि॒या धा॑मानि । यक्ष॑दग्नेर् हो॒तुः प्रि॒या
धा॑मानि । यक्ष॑थ्स्वं म॒हिमा॑नम् । आ॒यज॑तामे॒ज्या इ॒षः () । कृ॒णोतु॑
सो अ॒ध्वरा॑ जा॒तवे॑दाः । जु॒षता॑ ह॒विः । अ॒ग्ने यद॑द्य वि॒शो
अ॒ध्वर॑स्य हो॒तः । पा॒वक॑ शो॒चे वे॒ष्ट्व॑ हि यज्वा । ऋ॒ता यजा॑सि
म॒हिना॑ वि यद्भूः । ह॒व्या वह॑ यविष्ठ या ते अद्य । 15 (16)

(अ॒स्त्व - ध॒त्त॑ - र॒यिं - च॒र्ष॑णि॒प्राः - सो॒मस्य॑ प्रि॒या धा॑मा -
नी॒षः षट्च॑) (A7)

3.5.8 अनुवाकं 8 – इडोपाह्वानाम्

T.B.3.5.8.1

उप॑हूत॒ꣳ रथ॑न्तर॒ꣳ सह॑ पृ॒थि॒व्या । उप॑ मा रथ॑न्तर॒ꣳ सह॑ पृ॒थि॒व्या
ह्व॑यताम् । उप॑हूतं॒ वाम॑दे॒व्यꣳ स॒हान्त॑रि॒क्षेण॑ । उप॑ मा वाम॑दे॒व्यꣳ
स॒हान्त॑रि॒क्षेण॑ ह्व॑यताम् । उप॑ हूतं॒ बृह॑त्सह॒ दिवा॑ । उप॑ मा बृह॑त्सह॒
दिवा॑ ह्व॑यताम् । उप॑हूताः स॒प्त हो॒त्राः । उप॑ मा स॒प्त हो॒त्रा
ह्व॑यन्ताम् । उप॑हूता धे॒नुः स॒हर्ष॑भा । उप॑ मा धे॒नुः स॒हर्ष॑भा
ह्व॑यताम् । 16 (10)

T.B.3.5.8.2

उप॑हूतो भ॒क्षः स॒खा । उप॑ मा भ॒क्षः स॒खा ह्व॑यताम् । उप॑हूताँ(४) हो ।
इडो॑पहूता । उप॑हूतेडा । उपो॑ अ॒स्माꣳ इडा॑ ह्व॑यताम् ।
इडो॑पहूता । उप॑हूतेडा । मा॒नवी॑ घृ॒तप॑दी मै॒त्रावरु॑णी ।
ब्र॒ह्म दे॒वकृ॑तमुपहूतम् । 17 (10)

T.B.3.5.8.3

दै॒व्या अ॒ध्वर्य॑व उप॑हूताः । उप॑हूता म॒नुष्याः॑ । य इ॒मं य॑ज्ञम॒वान् ।
ये य॑ज्ञप॒तिं व॑र्धा॒न् । उप॑हूते द्यावापृ॒थि॒वी । पू॒र्वजे॑ ऋ॒ताव॑री ।

दे॒वी दे॒वपु॒त्रे । उप॒हूतो॒ऽयं य॑ज॒मानः॑ । उत्तर॒स्यां दे॒वय॑ज्याया-मुप॒हूतः॑ ।
 भूय॑सि ह॒विष्क॑रण उप॒हूतः॑ () । दि॒व्ये धाम॑न्नुप॒हूतः॑ । इ॒दं मे॑ दे॒वा
 ह॒विर्जु॑षन्तामि॒ति तस्मि॑न्नुप॒हूतः॑ । वि॒श्वम॑स्य प्रि॒यमु॑प॒हूतम् ।
 वि॒श्वस्य॑ प्रि॒यस्यो॑प॒हूतस्यो॑प॒हूतः॑ । 18 (14) (स॒हर्ष॑भा ह्वय॒ता -
 मु॒प॒हूत॑ - ह॒विष्क॑रण उप॒हूतश्च॑त्वारि॒ च) (A8)

3.5.9 अनुवाकं 9 – अनुयाजाः

T.B.3.5.9.1

दे॒वं ब॒र्हिः । व॒सुव॑ने व॒सुधे॑यस्य वे॒तु । दे॒वो न॑राश॒ सः । व॒सुव॑ने
 व॒सुधे॑यस्य वे॒तु । दे॒वो अ॒ग्निः स्वि॑ष्टकृ॒त् । सु॒द्रवि॑णा म॒न्द्रः क॒विः ।
 स॒त्यम॑न्माऽऽय॒जी हो॑ता । हो॒तुर् हो॒तुरा॑यजी॒यान् ।
 अ॒ग्ने या॑न्-दे॒वान॑याट् । या॒ अपि॑प्रेः () । ये ते हो॒त्रे अ॑म॒थ्स॑त ।
 ता॒ स॒स॒नुषी॑ हो॒त्रां दे॒वं ग॑माम् । दि॒वि दे॒वेषु॑ य॒ज्ञमे॑रये॒मम् ।
 स्वि॑ष्टकृ॒च्चाग्ने॑ हो॒ताऽभूः॑ । व॒सुव॑ने व॒सुधे॑यस्य नमो॒वाके॑
 वी॒हि । 19 (15) (अ॒पिप्रेः॑ प॒ञ्च च) (A9)

3.5.10 अनुवाकं 10 – सूक्तावाकः

T.B.3.5.10.1

इ॒दं द्या॒वापृ॑थि॒वी भ॒द्रम॑भू॒त् । आ॒र्ध्मं सू॒क्तवा॑कम् । उ॒त न॑मो॒वाक॑म् ।
 ऋ॒ध्यास्म॑ सू॒क्तोच्य॑मग्ने । त्व॒ꣳ सू॒क्तवा॑ग॒सि । उ॒पश्रि॑तो दि॒वः
 पृ॒थि॒व्योः । ओ॒मन्व॑ती तेऽस्मिन् । य॒ज्ञे य॑ज॒मान॑ द्या॒वापृ॑थि॒वी स्ता॑म् ।
 शं॒गये॑ जी॒रदा॑नू । अ॒त्रस्नू॑ अ॒प्रवे॑दे ।
 उ॒रुग॑व्यू॒ती अ॒भयं॑ कृ॒तौ ॥ 20 (10)

T.B.3.5.10.2

वृ॒ष्टि॒द्यावा॑ री॒त्यापा॑ । श॒म्भुवौ॑ म॒योभु॑वौ । ऊ॒र्ज॒स्वती॑ च॒ पय॑स्वती
 च । सू॒पच॑रणा च॒ स्व॒धिच॑रणा च । तयो॑रा॒विदि॑ । अ॒ग्निरि॑दꣳ
 ह॒वि॒रजु॑षत । अ॒वीवृ॑धत॒ महो॑ ज्यायोऽकृ॒त । सो॒म इ॒दꣳ ह॒वि॒रजु॑षत ।
 अ॒वीवृ॑धत॒ महो॑ ज्यायोऽकृ॒त । अ॒ग्निरि॑दꣳ ह॒वि॒रजु॑षत । 21 (10)

T.B.3.5.10.3

अ॒वीवृ॑धत॒ महो॑ ज्यायोऽकृ॒त । प्र॒जाप॑तिरि॒दꣳ ह॒वि॒रजु॑षत । अ॒वीवृ॑धत॒
 महो॑ ज्यायोऽकृ॒त । अ॒ग्नीषो॑मा॒विदꣳ ह॒वि॒रजु॑षेताम् । अ॒वीवृ॑धेतां॒ महो॑
 ज्यायोऽक्रा॑ताम् । इ॒न्द्रा॒ग्नी इ॒दꣳ ह॒वि॒रजु॑षेताम् ।

अवी॑वृ॒धेतां॑ महो॒ ज्यायो॑ऽक्रा॒ताम् । इन्द्र॑ इ॒दं ह॒विर॑जुषत ।
अवी॑वृ॒धत महो॒ ज्यायो॑ऽकृत । महेन्द्र॑ इ॒दं ह॒विर॑जुषत । 22 (10)

T.B.3.5.10.4

अवी॑वृ॒धत महो॒ ज्यायो॑ऽकृत । दे॒वा आ॑ज्य॒पा आ॑ज्यमजुषन्त ।
अवी॑वृ॒धन्त महो॒ ज्यायो॑ऽकृत । अ॒ग्निर्हो॒त्रेणो॑दं ह॒विर॑जुषत ।
अवी॑वृ॒धत महो॒ ज्यायो॑ऽकृत । अस्यामृ॒ध-ब्धो॑त्रायां दे॒वंग॑मायाम् ।
आशा॑स्तेऽयं य॒जमा॑नोऽसौ । आयु॑राशास्ते । सु॒प्रजा॑स्त्व-माशा॑स्ते ।
सजा॑तवनस्या-माशा॑स्ते । 23 (10)

T.B.3.5.10.5

उत्तरां॑ दे॒वय॑ज्या-माशा॑स्ते । भूयो॑ ह॒विष्क॑रण-माशा॑स्ते । दि॒व्यं
धा॒माशा॑स्ते । वि॒श्वं प्रि॑यमाशा॑स्ते । यद॑नेन ह॒विषा॑ ऽऽशा॑स्ते ।
तद॑श्यात्-तदृ॑ध्यात् । तद॑स्मै दे॒वा रा॑सन्ताम् । तद॑ग्निर्-दे॒वो
दे॒वैभ्यो॑ वन॑ते । वय॑मग्नेर् मानु॑षाः । इष्टं॑ च वी॒तं च॑ () ।
उ॒भे च॑ नो द्या॒वापृ॑थि॒वी अ॒हस॑स्पाताम् । इ॒ह ग॑तिर्-वा॒मस्ये॑दं च॑ ।
नमो॑ दे॒वैभ्यः॑ । 24 (13)

(अ॒भयं॑ कृ॒ताव॑कृ – ता॒ग्निरि॑द॒ ह॒विर॑जुष॒त – म॒हेन्द्र॑ इ॒द॒ ह॒विर॑जुष॒त – स॒जा॒त॒व॒न॒स्या॒मा॒शा॒स्ते – वी॒तं च॑ त्री॒णि च॑) (A10)

3.5.11 अनुवाकं 11 – शंयुवाकः

T.B.3.5.11.1

तच्छं॑ यो॒रा वृ॑णीमहे । गा॒तुं य॑ज्ञाय । गा॒तुं य॑ज्ञप॒तये॑ ।
दै॒वी स्व॑स्तिरस्तु नः । स्व॑स्तिर् मानु॒षेभ्यः॑ । ऊ॒र्ध्वं जि॑गातु भेष॒जम् ।
शं नो॑ अस्तु द्वि॒पदे॑ । शं चतु॑ष्पदे । 25 (8) (तच्छं॑यो॒रष्टौ॑) (A11)

3.5.12 अनुवाकं 12 – पत्नीसंयाजानां याज्यानुवाक्याः

T.B.3.5.12.1

“आ प्या॑यस्व{1}” “सं ते॑ {2}” । “इ॒ह त्व॑ष्टारम॒ग्रियं॑{3}”
“तन्न॑स्तु॒रीप॑म् {4}” । दे॒वानां॑ प॒त्नीरु॑शती॒रव॑न्तु नः । प्रा॒वन्तु॑ नस्तु॒जये॑
वा॒जसा॑तये । याः पा॒र्थि॒वासो॑ या अ॒पाम॑पि ब्र॒ते ।
ता नो॑ दे॒वीः सु॒हवाः॑ श॒र्म य॑च्छत । उ॒त ग्ना॑ वि॒यन्तु॑ दे॒वप॑त्नीः ।
इन्द्रा॑ण्य॒गना॑य्यश्चि॒नी राट् । आ रो॑दसी वरु॒णानी॑ शृ॒णोतु॑ ।
वि॒यन्तु॑ दे॒वीर्य॑ ऋ॒तुर्ज॑नीनाम् () । 26 (10)

T.B.3.5.12.2

अ॒ग्नि॒र् होता॑ गृ॒हप॑तिः स राजा॑ । वि॒श्वा वे॑द ज॒नि॒मा जा॑तवे॒दाः ।
दे॒वाना॑मु॒त यो म॑र्त्याना॒म् । यजि॑ष्ठः स प्र॒यज॑तामृ॒तावा॑ । व॒यमु॑ त्वा
गृ॒हप॑ते ज॒नाना॑म् । अ॒ग्ने अ॑कर्म॒ समि॑धा बृ॒हन्त॑म् । अ॒स्थू॒रिणो॑
गा॒र्हप॑त्यानि सन्तु । ति॒ग्मेन॑ न॒स्तो॒जसा॑ स॒श्शि॑शाधि । 27 (8)

(जनी॑ना – +म॑ष्टौ च) (A12)

3.5.13 अनुवाकं 13 – पत्नीसंयाजे सोमाह्वानम्

T.B.3.5.13.1

उप॑हूत॒र् रथ॑न्तर॒र् सह॑ पृथि॒व्या । उप॑ मा रथ॑न्तर॒र् सह॑ पृथि॒व्या
ह्व॑यताम् । उप॑हूतं वा॒मदे॒व्यर् स॒हान्तरि॑क्षेण । उप॑ मा वा॒मदे॒व्यर्
स॒हान्तरि॑क्षेण ह्व॑यताम् । उप॑हूतं बृ॒हथ्स॑ह दि॒वा । उप॑ मा बृ॒हथ्स॑ह
दि॒वा ह्व॑यताम् । उप॑हूताः स॒प्त हो॑त्राः । उप॑ मा स॒प्त हो॑त्रा
ह्व॑यन्ताम् । उप॑हूता धे॒नुः स॒हर्ष॑भा ।
उप॑ मा धे॒नुः स॒हर्ष॑भा ह्व॑यताम् । 28 (10)

T.B.3.5.13.2

उप॑हूतो भक्षः॑ सखा॑ । उप॑ मा भक्षः॑ सखा॑ ह्यताम् । उप॑हूताँ(४) हो ।
 इडो॑पहूता । उप॑हूतेडा । उपो॑ अस्माँ इडा॑ ह्यताम् ।
 इडो॑पहूता । उप॑हूतेडा । मान॑वी घृ॒तप॑दी मै॒त्रावरु॑णी ।
 ब्रह्म॑ दे॒वकृ॑तमुपहूतम् । 29 (10)

T.B.3.5.13.3

दैव्या॑ अध्व॒र्यव॑ उपहूताः । उपहूता॑ मनु॒ष्याः । य इ॒मं य॑ज्ञमवान् ।
 ये य॑ज्ञप॒त्नीं व॑र्धान् । उपहूते॑ द्यावापृथि॒वी । पू॒र्वजे॑ ऋ॒तावरी॑ ।
 दे॒वी दे॒वपु॑त्रे । उपहूते॑यं य॑जमाना । इन्द्रा॑णीवाविधवा । अदि॑तिरिव
 सुपु॑त्रा () । उत्तर॑स्यां दे॒वय॑ज्याया-मुपहूता । भूय॑सि हविष्क॑रण
 उपहूता । दि॒व्ये धा॑मन्नुपहूता । इ॒दं मे॑ दे॒वा ह॒विर्-जु॑षन्तामिति
 तस्मिन्-नुपहूता । विश्व॑मस्याः प्रि॒यमु॑पहूतम् ।
 विश्व॑स्य प्रि॒यस्यो॑पहूतस्योपहूता । 30 (16)

(सह॑र्षभा ह्यता - मुप॑हूत - सुपु॑त्रा षट्च) (A13)

तृतीयाष्टके पञ्चमः प्रपाठकः – (TB 3.5)

Prapaataka Korvai with starting Padams of 1 to 13 Anuvaakams :-

(स॒त्यं – प्र॒वो – ऽग्ने॑ म॒हा – न॒ग्निर् होता – स॒मि॒धो – ऽग्नि॑
वृ॒त्रा॒ण्य – ग्नि॑ मू॒र्धो – प॒हू॒तं – दे॒वं ब॒र्हि – रि॒दं द्या॒वापृ॑थि॒वी –
त॒च्छ॒म्यो – रा प्या॑य॒स्वो – प॒हू॒तं त्रयो॑द॒श)

Korvai with starting Padams of 1, 11, 21 Series of Dasinis :-

(स॒त्यं – व॑य॒ऽस्या॑म – वृ॒ष्टि॒द्या॒वा त्रि॑ऽश॒त्)

First and Last Padam 3rd Ashtakam 5th Prapaatakam :-

(स॒त्य–मु॒प॒हू॒ता)

। हरिः ओम् ।

। कृष्ण यजुर्वेदीय तैत्तिरीय ब्राह्मणे तृतीयाष्टके

पञ्चम प्रपाठकः समाप्तः ।

=====

Appendix (of expansions)

T.B.3.5.12.1 – "आ प्यायस्व {1}" "सं ते {2}"

आ प्यायस्व समेतु ते विश्वतः सोम वृष्णियं ।

भवा वाजस्य सङ्गथे ॥ {1}

सं ते पयाँ सि समु यन्तु वाजाः सं वृष्ण्या-न्यभिमातिषाहः ।

आप्यायमानो अमृताय सोम दिवि श्रवाँस्युत्तमानि धिष्व ॥ {2}

(Both {1} and {2} appearing in TS 4.2.7.4)

T.B.3.5.12.1 – "इह त्वष्टारमग्रियं {3}" "तन्नस्तुरीपम् {4}"

इह त्वष्टारमग्रियं विश्वरूपमुप ह्वये । अस्माकमस्तु कैवलः ॥ {3}

तन्नस्तुरीपमध पोषयितु देव त्वष्टर्वि रराणः स्यस्व ।

यतो वीरः कर्मण्यः सुदक्षो युक्तग्रावा जायते देवकामः ॥ {4}

(Both {3} and {4} appearing in TS 3.1.11.1)

**Details of Dasini & Vaakyams for Ashtakam 3 –
Prapaatakam 5 – TB 3.5**

	Dasini	Vaakyams
Anuvakam 1	1	10
Anuvakam 2	3	37
Anuvakam 3	2	26
Anuvakam 4	1	9
Anuvakam 5	1	15
Anuvakam 6	1	16
Anuvakam 7	6	66
Anuvakam 8	3	34
Anuvakam 9	1	15
Anuvakam 10	5	53
Anuvakam 11	1	8
Anuvakam 12	2	18
Anuvakam 13	3	36
Total →	30	343

3.6 तृतीयाष्टके षष्ठः प्रपाठकः – पशुहौत्रम्

3.6.1 अनुवाकं 1 – यूपसंस्काराः

T.B.3.6.1.1

अ॒ञ्जन्ति॑ त्वा॒मध्व॑रे दे॒वय॑न्तः । वन॑स्पते॒ मधु॑ना दै॒व्येन॑ ।
यदूर्ध्व॑स्तिष्ठाद्-द्र॒विणे॑ह ध॒त्तात् । यद्वा॑ क्षयो॑ मा॒तुर॑स्या उप॒स्थे ॥
उच्छ्र॑यस्व वनस्पते । वर्ष॑न् पृथि॒व्या अ॑धि । सु॒मिती॑ मी॒यमा॑नः ।
वर्चो॑धा य॒ज्ञवा॑हसे । समि॑द्धस्य श्रय॑माणः पु॒रस्ता॑त् ।
ब्र॒ह्म व॑न्वा॒नो अ॒जर॑ सु॒वीर॑म् । 1 (10)

T.B.3.6.1.2

आ॒रे अ॒स्मद॑मतिं बा॒धमा॑नः । उच्छ्र॑यस्व म॒हते॑ सौ॒भगा॑य । ऊ॒र्ध्व
ऊ॒षुण॑ ऊ॒तये॑ ॥ तिष्ठा॑ दे॒वो न॑ स॒विता॑ । ऊ॒र्ध्वो वा॑ज॒स्य स॑निता
यद॒ज्जिभिः॑ । वा॒घदि॑भर्-वि॒ह्वया॑महे । ऊ॒र्ध्वो नः॑ पा॒ह्यह॑सो
नि के॒तुना॑ ॥ वि॒श्वस॑म॒त्रिणं॑ द॒ह । कृ॒धी न॑ ऊ॒र्ध्वाञ्च॑ रथा॒य
जी॒वसे॑ ॥ वि॒दा दे॒वेषु॑ नो॒ दुवः॑ । 2 (10)

T.B.3.6.1.3

जा॒तो जा॒यते॑ सु॒दिन॑त्वे अ॒ह्नाम् । सम॑र्य आ वि॒दथे॑ वर्ध॑मानः ।
 पु॒नन्ति॑ धी॒रा अप॑सो मनी॒षा । दे॒वया॑ वि॒प्र उ॒दिय॑र्ति वाच॑म् ।
 यु॒वा सु॒वासाः॑ परि॒वीत॑ आ॒गात् । स उ॒ श्रेया॑न् भव॑ति जा॒यमा॑नः ।
 तं धी॒रासः॑ कव॒य उ॒न्नय॑न्ति । स्वा॒धियो॑ मन॒सा दे॒वय॑न्तः ।
 पृ॒थुपा॒जा अम॑र्त्यः । घृ॒तनि॑र्णि॒ख्-स्वा॒हुतः॑ () । 3 (10)

T.B.3.6.1.4

अ॒ग्निर्-य॒ज्ञस्य॑ ह॒व्यवा॑ट् । त॒ऽ स॒बाधो॑ यत॒स्रुचः॑ । इ॒त्था धि॒या
 य॒ज्ञव॑न्तः । आ॒चक्रु॑र॒ग्नि-मू॒तये॑ । त्वं व॑रुण उ॒त मि॒त्रो अ॒ग्ने ।
 त्वां व॑र्धन्ति म॒तिभि॑र्-व॒सिष्ठाः॑ । त्वे व॑सु सु॒षण॒नानि॑ सन्तु ।
 यू॒यं पा॑त स्व॒स्तिभिः॑ स॒दा नः॑ । 4 (8)

(सु॒वीरं॑ - दु॒वः - स्वा॒हुतो॑ - +ऽष्टौ च॑) (A1)

3.6.2 अनुवाकं 2 – प्रयाजविषया मैत्रावरुणप्रैषाः

T.B.3.6.2.1

हो॒ता य॒क्षद॑ग्नि॒ऽ समि॑धा सु॒षमि॑धा समि॒द्धं ना॒भा पृ॒थिव्याः॑ सं॒गथे॑
 वा॒मस्य॑ । वर्ष्म॑न्दि॒व इ॒डस्प॑दे वे॒त्वाज्य॑स्य हो॒तर्य॑ज ।

हो॒ता य॒क्षत्-त॒नू॒नपा॒त-मदि॒तेर्-ग॒र्भं भु॒वन॒स्य गो॒पाम् ।
मध्वा॒ऽद्य दे॒वो दे॒वेभ्यो॑ दे॒वया॒नान्य॒थो अ॒नक्तु॑ वे॒त्वाज्य॑स्य हो॒तर्य॑ज ।
हो॒ता य॒क्षन्-न॒राश॑ऽसं नृ॒शस्त्रं॑ नृ॒ः प्र॒णेत्र॑म् । गो॒भिर्-व॒पावा॒न्थ-
स्याद्-वी॒रैः श॒क्तीवा॒न्-रथैः॑ प्रथ॒मया॒वा हि॒रण्यैश्च॑न्द्री वे॒त्वाज्य॑स्य
हो॒तर्य॑ज । हो॒ता य॒क्षद॒ग्निमि॒ड ई॒डितो॑ दे॒वो दे॒वाऽ॒ आव॑क्षद्-दू॒तो
ह॒व्यवा॒डमू॒रः । उ॒पे॒मं य॒ज्ञमु॒पे॒मां दे॒वो दे॒वहू॑तिमवतु वे॒त्वाज्य॑स्य हो॒त
र्य॑ज । हो॒ता य॒क्षद्-ब॒र्हिः सु॒ष्ट्रीमो॑र्णम्र॒दा अ॒स्मिन् य॒ज्ञे वि च प्र
च प्र॒थता॑ स्वा॒सस्थं॑ दे॒वेभ्यः॑ । ए॒मे॒नद॒द्य व॒सवो॑ रु॒द्रा आ॒दि॒त्याः
स॒दन्तु॑ प्रि॒यमि॒न्द्रस्या॒स्तु वे॒त्वाज्य॑स्य हो॒तर्य॑ज । 5 (10)

T.B.3.6.2.2

हो॒ता य॒क्षद्-दु॒र ऋ॒ष्वाः क॒व॒ष्योऽको॑षधा॒वनी-रु॒दाता॑भिर्-जि॒हतां॑
वि प॒क्षोभिः॑ श्रय॒न्ताम् । सु॒प्राय॑णा अ॒स्मिन् य॒ज्ञे वि॒श्रय॑न्ता-
मृ॒तावृ॑धो वि॒यन्त्वा॑ज्यस्य हो॒तर्य॑ज । हो॒ता य॒क्षदु॒षासा॑नक्ता बृ॒हती
सु॒पे॒शसा॑ नृ॒ः पति॑भ्यो यो॒निं कृ॑ण्वाने ।

स॒ऽस्मय॑माने॒ इन्द्रे॑ण दे॒वैरे॑दं ब॒र्हिः॒ सी॒दतां॑ वी॒तामा॑ज्यस्य हो॒तर्य॑ज
 । होता॑ यक्ष॒द्-दै॒व्या होता॑रा म॒न्द्रा पो॑तारा क॒वी प्र॑चे॒तसा॑ । स्वि॒ष्टम॑
 द्या॒न्यः कर॑दिषा स्व॒भिगूर्त॑मन्य ऊ॒र्जा स॑तवसे॒मं य॒ज्ञं दि॒वि दे॒वेषु॑
 धत्तां॑ वी॒तामा॑ज्यस्य हो॒तर्य॑ज । होता॑ यक्ष॒त्-तिस्रो॑ दे॒वीरप॑साम
 प॒स्तमा॑ अ॒च्छिद्र॑-म॒द्येद॑मप-स्तन्वताम् ।
 दे॒वेभ्यो॑ दे॒वीर्-दे॒वमपो॑ वियन्त्वाज्यस्य हो॒तर्य॑ज ।
 होता॑ यक्ष॒त्-त्वष्टा॑र-म॒चिष्टु॑मपाक॒ऽरेतो॑धां वि॒श्रव॑सं य॒शोधाम्॑ ।
 पु॒रुरूप॑म॒काम॑कर्॒शन् सु॑पोषः पोषैः स्याथ् सु॒वीरो॑ वी॒रैर्-
 वे॒त्वाज्य॑स्य हो॒तर्य॑ज () । होता॑ यक्ष॒द्-वन॑स्पति-
 मु॒पाव॑स्रक्ष॒द्धियो॑ जो॒ष्टार॑ऽश॒शम॑न्नरः । स्व॒दाथ् स्व॑धितिर्.
 ऋ॒तुथा॑ऽद्य दे॒वो दे॒वेभ्यो॑ ह॒व्याऽवा॑द्-वे॒त्वाज्य॑स्य हो॒तर्य॑ज ।
 होता॑ यक्ष॒दग्नि॑ऽस्वाहा॑ऽज्यस्य स्वाहा मे॒दसः॑ स्वाहा स्तो॒काना॑ऽ
 स्वाहा स्वाहा कृ॒तीना॑ऽस्वाहा ह॒व्यसू॑क्तीनाम् । स्वाहा दे॒वाऽ
 आ॒ज्यपा॑न्थ् स्वाहाऽग्नि॑ऽहो॒त्राज्जु॑षाणा अ॒ग्न अ॑ज्यस्य वियन्तु

हो॒तर्य॑ज । 6 (14) (प्रि॒यमिन्द्र॑स्यास्तु वे॒त्वाज्य॑स्य हो॒तर्य॑ज –
सु॒वी॒रो वी॒रैर् वे॒त्वाज्य॑स्य हो॒तर्य॑ज च॒त्वारि॑ च) (A2)

Special Korvai

(अ॒ग्निं त॒नून॑पातं नरा॒श॒स॒म॒ग्निमि॒ड ई॒डितो॑ ब॒र्हिर्दु॑र उ॒षासा॑न॒क्ता
दै॒व्या ति॒स्रस्त्व॑ष्टारं व॒नस्प॑तिम॒ग्निम्)
(प॒ञ्च वे॒त्वेको॑ वि॒यन्तु॑ द्वि॒र्वी॒तामे॑को वि॒यन्तु॑ द्वि॒र्वे॒त्वेको॑ वि॒यन्तु॑
हो॒तर्य॑ज)

3.6.3 अनुवाकं 3 – आप्रिय प्रयाजानां याज्याः

T.B.3.6.3.1

समि॑द्धो अ॒द्य म॑नु॒षो दुरो॑णे । दे॒वो दे॒वान् य॑जसि जा॒तवे॑दः ।
आ च॑ वह॒ मि॒त्रम॑ह–श्चि॒कित्वा॑न् । त्वं दू॒तः क॒विर॑सि प्र॒चे॒ताः ।
त॒नून॑पा॒त्पथ॑ ऋ॒तस्य॑ या॒नान् । म॒ध्वा स॑म॒ञ्जन्थ॑ स्व॒दया॑ सु॒जिह्व॑ ।
म॒न्मानि॑ धी॒भिरु॑त य॒ज्ञमृ॑न्ध॒न् । दे॒वत्रा॑ च कृ॒णु॑ह्यध्व॒रं नः॑ ।
नरा॒श॒स॒स्य म॑हि॒मान॑मेषाम् । उ॒पस्तो॑षाम॒ यज॑तस्य॒ यज्ञैः॑ । 7 (10)

T.B.3.6.3.2

ते सु॒क्र॒तवः॑ शु॒चयो॑ धि॒यंधाः॑ । स्व॒दन्तु॑ दे॒वा उ॒भया॑नि ह॒व्या ।
 आ॒जु॒ह्वान॑ ई॒ड्यो॑ व॒न्द्यश्च॑ । आ॒या॒ह्य॒ग्ने व॑सु॒भिः स॒जोषाः॑ ।
 त्वं दे॒वाना॑म॒सि य॒ह्व होता॑ । स ए॒नान् य॑क्षी॒षितो॑ य॒जीयान्॑ । प्रा॒चीनं॑
 ब॒र्हिः प्र॒दिशा॑ पृ॒थिव्याः॑ । व॒स्तोर॑स्या वृ॒ज्यते॑ अ॒ग्रे अ॒ह्नाम् ।
 व्यु॒ प्रथ॑ते वि॒तरं व॑री॒यः । दे॒वेभ्यो॑ अ॒दितये॑ स्यो॒नम् । 8 (10)

T.B.3.6.3.3

व्य॒च॒स्वती॑रु॒र्विया॑ वि॒श्रय॑न्ताम् । प॒तिभ्यो॑ न॒जनयः॑ शु॒म्भमा॑नाः ।
 दे॒वीर्द्वा॒रो बृ॒हती॑रु॒र्वि॒श्वमि॑न्वाः । दे॒वेभ्यो॑ भव॒थ सु॒प्राय॑णाः । आ
 सु॒ष्वय॑न्ती य॒जते॑ उ॒पाके॑ । उ॒षा॒सान॑क्ता स॒दतां॑ नि यो॒नौ । दि॒व्ये
 योष॑णे बृ॒हती॑ सु॒रुक्मे॑ । अ॒धि श्रि॒यश् शु॒क्रपि॑शं द॒धाने॑ । दै॒व्या
 हो॒तारा॑ प्रथ॒मा सु॒वाचा॑ । मि॒माना॑ य॒ज्ञं म॒नुषो॑ य॒जध्यै॑ । 9 (10)

T.B.3.6.3.4

प्र॒चो॒दय॑न्ता वि॒दथे॑षु का॒रू । प्रा॒चीनं॑ ज्यो॒तिः प्र॒दिशा॑ दि॒शन्ता॑ ।
 आ॒नो य॒ज्ञं भा॑रती॒ तूय॑मेतु । इ॒डा म॒नुष्व॑दि॒ह चे॒तय॑न्ती ।
 ति॒स्रो दे॒वीरु॑रु॒र्हिरे॑द॒ स्यो॒नम् । स॒रस्व॑ती स्व॒पसः॑ स॒दन्तु॑ ।

य इ॒मे द्या॒वापृ॒थिवी॑ ज॒नित्री॑ । रू॒पैर॒पि॒शद्-भु॒वनानि॑ वि॒श्वा । तम॒द्य
हो॒तरि॒षितो॑ यजी॒यान् । दे॒वं त्वष्टा॑रमि॒ह यक्षि॑ वि॒द्वान् () । 10 (10)

T.B.3.6.3.5

उपा॒वसृ॒जत्-त॒मन्या॑ स॒मञ्ज॑न् । दे॒वानां॑ पाथ॒ ऋतु॑था ह॒वी॒षि ।
व॒नस्प॑तिः श॒मिता॑ दे॒वो अ॒ग्निः । स्व॒दन्तु॑ ह॒व्यं म॒धुना॑ घृ॒तेन॑ । स॒द्यो
जा॒तो व्य॑मिमीत य॒ज्ञम् । अ॒ग्निर्-दे॒वाना॑-म॒भवत्-पु॒रोगाः॑ । अ॒स्य
हो॒तुः प्र॒दिश्य॑तस्य॒ वाचि॑ । स्वा॒हाकृ॑तं ह॒विर॑दन्तु दे॒वाः । 11 (8)

(य॒ज्ञैः - स्यो॒नं - यँज॑ध्यै - वि॒द्वान् - +ष्टौ च॑) (A3)

3.6.4 अनुवाकं 4 – पर्यग्निकरणीया ऋचः

T.B.3.6.4.1

अ॒ग्निर्. हो॒ता नो॑ अ॒ध्वरे॑ । वा॒जी सन्-प॑रिणीयते । दे॒वो दे॒वेषु॑
य॒ज्ञियः॑ । प॒रि त्रि॑वि॒ष्ट्यध्व॑रम् । या॒त्यग्नी॑ र॒थीरि॑व । आ दे॒वेषु॑
प्र॒यो द॑धत् । प॒रि वा॒जप॑तिः क॒विः । अ॒ग्निर्. ह॒व्या न्य॑क्रमीत् ।
द॒धद्-र॒त्नानि॑ दा॒शुषे॑ । 12 (9) (अ॒ग्निर् हो॒ता नो॑ न॒व) (A4)

3.6.5 अनुवाकं 5 – मैत्रावरुणप्रैषः

T.B.3.6.5.1

अ॒जै॒द॒ग्निः॑ । अ॒स॒न॒द्वा॒जं॑ नि । दे॒वो दे॒वेभ्यो॑ ह॒व्याऽवा॑ट् ।
प्रा॒ज्जो॒भिर् हि॒न्वा॒नः॑ । धे॒नाभिः॑ क॒ल्प॒मा॒नः॑ । य॒ज्ञ॒स्यायुः॑ प्र॒ति॒र॒न् ।
उ॒प प्रे॒ष्य हो॒तः॑ । ह॒व्या दे॒वेभ्यः॑ । 13 (8) (अ॒जै॒द॒ष्टौ) (A5)

3.6.6 अनुवाकं 6 – होतुरधिगुप्रैषः

T.B.3.6.6.1

दै॒व्याः श॒मि॒ता॒र उ॒त म॑नु॒ष्या आ॒र॒भ॒ध्वम् । उ॒प न॑य॒त मे॒ध्या दु॑रः ।
आ॒शा॒सा॒ना मे॒ध॒प॒ति॒भ्यां मे॒धम् । प्रा॒स्मा अ॒ग्निं भ॑र॒त । स्तृ॒णी॒त
ब॒र्हिः । अ॒न्वे॒नं मा॒ता म॑न्य॒ताम् । अ॒नु पि॒ता । अ॒नु भ्रा॒ता स॒ग॒र्भ्यः॑ ।
अ॒नु स॒खा स॒यू॒थ्यः॑ । उ॒दी॒ची॒ना॒ अ॒स्य प॒दो नि॑ध॒त्तात् । 14 (10)

T.B.3.6.6.2

सू॒र्यं च॑क्षु॒र्ग॒म॒य॒तात् । वा॒तं प्रा॒ण॒म॒न्व॒व॒सृ॒ज॒तात् । दि॒शः श्रो॑त्रम् ।
अ॒न्त॒रि॒क्ष॒म॒सुम् । पृ॒थि॒वी॒ शरी॑रम् । ए॒क॒धाऽस्य॑ त्व॒च॒मा॒च्छ॒य॒तात् ।
पु॒रा ना॒भ्या अ॒पि॒श॒सो व॑पा॒मु॒त्खि॑द॒तात् । अ॒न्त॒रे॒वोष्मा॑णं वा॒र॒य॒तात् ।
श्ये॒न॒म॒स्य व॑क्षः कृ॒णु॒तात् । प्र॒श॒सा बा॒हू । 15 (10)

T.B.3.6.6.3

श॒ला दो॒षणी॑ । क॒श्यपे॒वा॒ऽसा॑ । अ॒च्छि॒द्रे श्रो॒णी॑ ।
 क॒व॒षोरू॑ स्रे॒कपर्णा॑ऽष्टी॒वन्ता॑ । षड्वि॒ऽश॒तिर॒स्य वड्क॑रयः ।
 ता अनु॒ष्ट्यो॒च्च्या॑वयतात् । गा॒त्रं गा॒त्रम॒स्यानू॑नं कृणुतात् ।
 ऊ॒व॒ध्यगो॑हं पा॒र्थिवं॑ खनतात् । अ॒स्ना रक्षः॑ स॒ऽसृ॑जतात् ।
 व॒नि॒ष्ठुम॒स्य मा रा॑विष्ट । 16 (10)

T.B.3.6.6.4

उ॒रूकं॑ म॒न्यमा॑नाः । ने॒द्वस्तो॑के त॒नये॑ । र॒विता॑ र॒वच्छ॑मितारः । अ॒धिगो॑
 श॒मीध्व॑म् । सु॒शमि॑ श॒मीध्व॑म् । श॒मीध्व॑-म॒धिगो॑ । अ॒धिगु॑श्चापापश्च ।
 उ॒भौ दे॒वाना॑ऽश॒मितारौ॑ । ता॒विमं॑ प॒शुं श्र॑पयतां प्र॒विद्वा॑ऽसौ ।
 यथा॑ यथा॑ऽस्य श्र॒पणं॑ तथा॑तथा () । 17 (10)

[ध॒त्ताद् - बा॒हू - मा रा॑विष्ट - तथा॑तथा ()] (A6)

3.6.7 अनुवाकं 7 – स्तोकविषयं मैत्रावरुणानुवचनम्

T.B.3.6.7.1

जुष॒स्व स॒प्रथ॑स्तमम् । व॒चो दे॒वप्सर॑स्तमम् । ह॒व्या जु॒ह्वान॑ आ॒सनि॑ ।
 इ॒मं नो॑ य॒ज्ञम॒मृते॑षु धेहि । इ॒मा ह॒व्या जा॑तवेदो जुषस्व ।

स्तो॒काना॑म॒ग्ने मे॒दसो॑ घृ॒तस्य॑ । हो॒तः प्रा॑शान प्रथ॒मो नि॒षद्य॑ ।

घृ॒तव॑न्तः पाव॒क ते । स्तो॒काः श्रो॑तन्ति मे॒दसः॑ ।

स्व॒धर्मं॑ दे॒ववी॑तये । 18 (10)

T.B.3.6.7.2

श्रेष्ठं॑ नो धेहि॑ वा॒र्यम्॑ । तुभ्य॑ऽ स्तो॒का घृ॒तश्चु॑तः ।

अ॒ग्ने वि॒प्राय॑ सन्त्य । ऋ॒षिः श्रेष्ठः॑ समि॒ध्यसे॑ । य॒ज्ञस्य॑ प्रा॒विता॑ भव ।

तुभ्य॑ऽ श्रो॒तन्त्य॑धि॒गो श॑चीवः । स्तो॒कासो॑ अ॒ग्ने मे॒दसो॑ घृ॒तस्य॑ ।

क॒वि॒शस्तो॑ बृ॒हता॑ भा॒नुनाऽऽगाः॑ । ह॒व्या जु॑षस्व मे॒धिर । ओ॒जिष्ठं॑ ते

म॒ध्यतो॑ मे॒द उद्भृ॑तम् () । प्र॒ते व॒यं द॑दामहे । श्रो॒तन्ति॑ ते व॒सो

स्तो॒का अ॒धि त्व॑चि । प्र॒ति तान्दे॑व॒शो वि॑हि । 19 (13)

(दे॒ववी॑तय – उद्भृ॑तं त्रीणि॑ च) (A7)

3.6.8 अनुवाकं 8 – वपा पुरोडाशस्विष्टकृतां पुरोनुवाक्याः प्रैषाश्च

T.B.3.6.8.1

आ वृ॒त्रह॑णा वृ॒त्रह॑भिः शु॒ष्मैः॑ । इन्द्र॑ या॒तं नमो॑भिर॒ग्ने अ॒र्वाक् ।

यु॒वः रा॒धोभि॑र॒कवे॑भिरिन्द्र । अ॒ग्ने अ॒स्मो भ॑वतमु॒त्तमे॑भिः ।

हो॒ता य॒क्षदि॒न्द्राग्नी॑ । छा॒गस्य॑ व॒पाया॑ मे॒दसः॑ । जु॒षेता॑ ह॒विः ।
हो॒तर्य॑ज । वि ह्य॒ख्यन्-म॑न॒सा व॒स्य इ॒च्छन् ।
इ॒न्द्राग्नी॑ ज्ञा॒स उ॒त वा॑ स॒जाता॑न् । 20 (10)

T.B.3.6.8.2

ना॒न्या यु॒वत्प्र॑मतिर॒स्ति म॒ह्यम् । स वां धि॒यं वा॑ज॒यन्ती॑म॒तक्ष॑म् । हो॒ता
य॒क्षदि॒न्द्राग्नी॑ । पु॒रोडा॑शस्य जु॒षेता॑ ह॒विः । हो॒तर्य॑ज । त्वा॒मीड॑ते
अ॒जिरं॑ दू॒त्याय॑ । ह॒विष्म॑न्तः स॒दमिन्-मा॑नु॒षासः॑ । य॒स्य दे॒वैरा॑स॒दो
ब॒र्हि॒रग्ने॑ । अ॒हान्य॑स्मै सु॒दिना॑ भ॒वन्तु॑ । हो॒ता य॒क्षद॑ग्निम् () ।
पु॒रोडा॑शस्य जु॒षेता॑ ह॒विः । हो॒तर्य॑ज । 21 (12)

(स॒जाता - न॒ग्निं द्वे॑ च) (A8)

3.6.9 अनुवाकं 9 – तेषामेव याज्याः

T.B.3.6.9.1

गी॒र्भिर्वि॑प्रः प्र॒मति॑मिच्छ॒मानः॑ । ई॒ष्टे र॒यिं य॑श॒सं पू॒र्वभा॑जम् ।
इ॒न्द्राग्नी॑ वृ॒त्रह॑णा सु॒वज्रा॑ । प्र॒णो न॒व्येभि॑स्ति॒रतं॑ दे॒ष्णैः ।
मा॒च्छेद्वा॑ र॒श्मीरि॑ति ना॒धमा॑नाः । पि॒तृणा॑ श॒क्तीर॑नु॒ यच्छ॑मानाः ।

इन्द्रा॑ग्नि॒भ्यां कं॑ वृ॒षणो॑ मदन्ति । ता ह्य॒ग्नी धि॒षणा॑या उप॒स्थे ।
 अ॒ग्निं सु॒दीतिं॑ सु॒दृशं॑ गृणन्तः । नम॑स्यामस्त्वे॒ड्यं
 जा॒तवे॑दः () । त्वां दू॒तम॑रतिं ह॒व्यवा॑हम् । दे॒वा अ॑कृ॒ण्वन्-
 नमृ॑तस्य नाभिम् । 22 (12) (जा॒तवे॑दो द्वे च) (A9)

3.6.10 अनुवाकं 10 – मनोतासूक्तम्

T.B.3.6.10.1

त्वञ् ह्य॒ग्ने प्र॑थमो॒ मनो॑ता । अ॒स्या धि॒यो अ॑भवो॒ दस्म॑ होता ।
 त्वञ् सीं॑ वृ॒षन्-न॑कृ॒णोर्-दु॒ष्टरी॑तु । स॒हो वि॒श्वस्मै॑ स॒हसे॑ स॒हध्वै॑ ।
 अ॒था होता॑ न्यसीदो॒ यजी॑यान् । इ॒डस्प॑द इ॒षय॑न्नी॒ड्यः स॒न् । तं त्वा॑
 नरः॑ प्र॒थमं॑ दे॒वय॑न्तः । म॒हो रा॒ये चि॒तय॑न्तो॒ अनु॑ ग्मन् । वृ॒तेव॑ यन्तं
 ब॒हुभिर्-व॑स॒व्यैः । त्वे र॒यिं जा॑गृ॒वाँसो॑ अनु॑ ग्मन् । 23 (10)

T.B.3.6.10.2

रु॒शन्त॑म॒ग्निं द॑र्श॒तं बृ॑हन्तम् । व॒पाव॑न्तं वि॒श्वहा॑ दी॒दिवाँ॑सम् ।
 प॒दं दे॒वस्य॑ नम॒सा वि॑यन्तः । श्र॒वस्य॑वः श्र॒व आ॑पन्नमृ॒क्तम् ।
 ना॒मानि॑ चिद्-दधि॑रे॒ यज्ञि॑यानि । भ॒द्रायां॑ ते रण॑यन्त स॒न्दृष्टौ॑ ।

त्वां॑ व॒र्धन्ति॑ क्षि॒तयः॑ पृ॒थि॒व्याम् । त्व॑ र॒ाय उ॒भया॑सो॒ जनाना॑म् ।
 त्वं॑ त्रा॒ता तर॑णे॒ चेत्यो॑ भूः । पि॒ता मा॒ता स॒दमिन्-
 मा॒नु॒षाणा॑म् । 24 (10)

T.B.3.6.10.3

स॒ पर्ये॑ण्यः स॒ प्रि॒यो वि॒क्ष्वग्निः॑ । हो॒ता म॒न्द्रो नि॒षसा॑दा॒ यजी॑यान् ।
 तं॑ त्वा॒ वयं॑ द॒म आ॑ दी॒दिवा॑स्सम् । उ॒प॒जु॒बाधो॑ न॒मसा॑ स॒देम॑ । तं
 त्वा॒ वय॑ सु॒धियो॑ न॒व्यम॑ग्ने । सु॒म्नाय॑व ई॒महे॑ दे॒वय॑न्तः । त्वं॑ वि॒शो
 अ॒नयो॑ दी॒द्यानः॑ । दि॒वो अ॒ग्ने बृ॒हता॑ रो॒चने॑न । वि॒शां क॒विं
 वि॒श॒पति॑ र॒श्मती॑नाम् । नि॒तो॒शनं॑ वृ॒षभं॑ च॒र्षणी॑नाम् । 25 (10)

T.B.3.6.10.4

प्रे॒तीष॑णिमिषयन्तं पा॒वक॑म् । रा॒जन्त॑म॒ग्निं य॑ज॒त र॑यी॒णाम् ।
 सो॑ अ॒ग्न ई॒जे श॒शमे॑ च॒ मर्तः॑ । यस्त॑ आ॒नट्थ॑-स॒मिधा॑ ह॒व्यदा॑तिम् ।
 य॒ आ॒हुतिं॑ परि॒ वेदा॑ न॒मोभिः॑ । वि॒श्वेत्स॑ वा॒मा द॑ध॒ते त्वो॑तः ।
 अ॒स्मा उ॑ ते॒ महि॑ म॒हे वि॑धेम । न॒मोभि॑र॒ग्ने स॒मिधो॑त ह॒व्यैः । वे॒दी
 सू॒नो स॒हसो॑ गी॒र्भिरु॑क्थैः । आ॒ ते भ॑द्रा॒या सु॑म॒तौ य॑तेम । 26 (10)

T.B.3.6.10.5

आ यस्त॑तन्थ॒ रोद॑सी वि॒ भासा॑ । श्रवो॑भिश्च॒ श्रव॑स्यस्त॒रुत्रः॑ ।
 बृ॒ह॒द्भिर्-वा॒जैः स्थ॑वि॒रेभि॒रस्मो॑ । रेव॑द्भि॒रग्ने॑ वि॒तरं॑ वि॒भाहि॑ । नृ॒व॒द्वसो॑
 सद॑मि॒द्वेह्य॑स्मो । भूरि॑ तो॒काय॑ तन॒याय॑ प॒र्श्वः । पूर्वी॑रिषो॒ बृह॑ती॒रा॒रे
 अ॒घाः । अ॒स्मो भ॒द्रा सौ॑श्रव॒सानि॑ सन्तु । पु॒रू॒ण्यग्ने॑ पु॒रु॒धा त्वा॒या ।
 व॒सूनि॑ रा॒जन्-व॒सुता॑ते अ॒श्याम् () । पु॒रू॒णि हि त्वे॑ पु॒रु॒वार
 सन्ति॑ । अ॒ग्ने व॒सु वि॒धते॑ रा॒जनि॑ त्वे । 27 (12)

(जा॒गृ॒वाꣳसो॑ अनु॑ ग॒मन् - मा॒नु॒षाणां॑ - च॒र॒षणी॑नां - य॒ते -
 मा॒श्यां॑ द्वे च) (A10)

3.6.11 अनुवाकं 11 – हविर्वनस्पतिस्विष्टकृतां पुरोनुवाक्याः प्रैषाश्च
T.B.3.6.11.1

आ भ॒रतꣳ शि॒क्षतं॑ व॒ज्रबा॑हू । अ॒स्माꣳ इ॒न्द्रा॒ग्नी अ॒वतꣳ
 श॒ची॒भिः । इ॒मे नु॑ ते र॒श्मयः॑ सूर्य॑स्य । ये॒भिः स॒पित्वं॑ पि॒तरो॑
 न आ॒यन् । हो॒ता य॒क्षदि॒न्द्रा॒ग्नी । छा॒गस्य॑ ह॒विष॑ आ॒त्ताम॑द्य ।
 म॒ध्यतो॑ मे॒द उद्भू॑तम् । पु॒रा द्वे॒षोभ्यः॑ । पु॒रा पौ॒रुषे॑य्या गृ॒भः ।

॥
घस्तान्नू॒नम् । 28 (10)

T.B.3.6.11.2

घा॒से अ॒ज्राणां॑ य॒वस॑प्रथमानाम् । सु॒मत्क्ष॑राणां॒ श॒तरु॑द्रियाणाम् ।
अ॒ग्निष्वा॒त्तानां॑ पी॒वोप॑वसनानाम् । पा॒र्श्वतः॑ श्रो॒णितः॑ शि॒ताम॑त
उ॒त्साद॑तः । अ॒ङ्गाद॑ङ्गादव॒त्ताना॑म् । क॒रत॑ ए॒वेन्द्रा॑ग्नी । जु॒षेता॑
ह॒विः । हो॒तर्य॑ज । दे॒वेभ्यो॑ वनस्प॒ते ह॒वीषि॑ ।
हि॒रण्य॑पर्ण॒ प्रदि॑वस्ते॒ अर्थ॑म् । 29 (10)

T.B.3.6.11.3

प्र॒दक्षि॑णिद्-र॒शन॑या॒ नियू॑य । ऋ॒तस्य॑ वक्षि॒ पथि॑भी रजिष्ठैः । हो॒ता
यक्ष॑द्-व॒नस्प॑तिम॒भि हि॑ । पि॒ष्टत॑मया र॒भिष्ठ॑या र॒शन॑याऽऽधि॒त ।
यत्रे॑न्द्रा॒ग्नियोः॑ छा॒गस्य॑ ह॒विषः॑ प्रि॒या धा॑मानि । यत्र॑ व॒नस्प॑तेः प्रि॒या
पा॒थासि॑ । यत्र॑ दे॒वाना॑माज्य॒पानां॑ प्रि॒या धा॑मानि । यत्रा॑ग्नेर् ह॒ोतुः॑
प्रि॒या धा॑मानि । तत्रै॒तं प्र॑स्तु-त्ये॒वो-प॑स्तुत्ये॒वोपा॑वस्रक्षत् ।
र॒भीया॑ समि॒व कृ॑त्वी । 30 (10)

T.B.3.6.11.4

कर॑दे॒वं दे॒वो व॒नस्प॑तिः । जु॒षता॑ ह॒विः । हो॒तर्य॑ज । पि॒प्री॒हि दे॒वा
उ॒शतो॑ य॒विष्ठ॑ । वि॒द्वान् ऋ॒तूँर् ऋ॒तुप॑ते यजे॒ह ।

ये दै॒व्या ऋ॒त्विज॑स्तेभि॒रग्ने॑ । त्वँ हो॒तृणा॑म॒स्याय॑जिष्ठः । हो॒ता
यक्ष॑द॒ग्निं स्वि॑ष्ट॒कृत॑म् । अ॒याड॑ग्नि-रि॒न्द्राग्नि॑योः छा॒गस्य॑ ह॒विषः
प्रि॒या धा॑मानि । अ॒याड्व॑नस्प॒तेः प्रि॒या पा॑थाँ॒सि () ।
अ॒याड्दे॒वाना॑-मा॒ज्यपा॑नां प्रि॒या धा॑मानि । यक्ष॑द॒ग्नेर् हो॒तुः प्रि॒या
धा॑मानि । यक्ष॑त् स्वं म॒हिमा॑नम् । आ॒यज॑तामे॒ज्या इ॑षः । कृ॒णोतु॑ सो
अ॒ध्वरा॑ जा॒तवे॑दाः । जु॒षता॑ ह॒विः । हो॒तर्य॑ज । 31 (17)

(नून - मर्थ - कृत्वी - पाथाँसि सप्त च) (A11)

3.6.12 अनुवाकं 12 – तेषामेव याज्याः

T.B.3.6.12.1

उपो॑ह यद्वि॒दथं॑ वा॒जिनो॑ गूः । गी॒र्भिर्-वि॑प्राः प्र॒मति॑-मि॒च्छमा॑नाः ।
अ॒र्वन्तो॑ न का॒ष्ठां नक्ष॑माणाः । इ॒न्द्राग्नी॑ जो॒हुव॑तो न॒रस्ते॑ । व॒नस्प॑ते
र॒श॒नया॑भि॒धाय॑ । पि॒ष्टत॑मया व॒युना॑नि वि॒द्वान् ।

वह देवत्रा दिधिषो हवींषि । प्र च दातारममृतेषु वोचः ।

अग्निं स्विष्टकृतम् । अयाङ्ग्नि-रिन्द्राग्नियोः छागस्य हविषः

प्रिया धामानि । 32 (10)

T.B.3.6.12.2

अयाङ्वनस्पतेः प्रिया पाथांसि । अयाङ्देवाना-माज्यपानां प्रिया
धामानि । यक्षदग्नेर् होतुः प्रिया धामानि । यक्षथ् स्वं महिमानम् ।

आयजतामेज्या इषः । कृणोतु सो अध्वरा जातवेदाः । जुषतां
हविः । अग्ने यदद्य विशो अध्वरस्य होतः । पावक शोचे वेष्ट्वं

हि यज्वा । ऋता यजासि महिना वि यद्-भूः () । हव्या वह यविष्ठ
या ते अद्य । 33 (11) (धामानि – भुरेकं च) (A12)

3.6.13 अनुवाकं 13 – अनूयाजप्रैषाः

T.B.3.6.13.1

देवं बर्हिः सुदेवं देवैः स्याथ् सुवीरं वीरैर्वस्तोर्-वृज्येताक्तोः

प्रभ्रि-येतात्यन्यान्-राया बर्हिष्मतो मदेम वसुवने वसुधेयस्य वेतु

यज । देवीर्-द्वारः संघाते विड्वीर्यामञ्छिथिरा ध्रुवा देवहूतौ वत्स

ई॒मे॒ना॒स्तरु॒ण आ॒मिमी॒यात्-कु॒मारो॒ वा न॒वजा॒तो मै॒ना अ॒र्वा
 रे॒णुक॒काटः॒ पृ॒ण॒ग्वसु॒वने॒ वसु॒धेय॒स्य वि॒यन्तु॒ यज॑ । दे॒वी उ॒षा॒सा
 न॒क्ताऽघा॒स्मिन्. य॒ज्ञे प्र॒यत्य॑ह्ने॒ताम॒पि नू॒नं दै॒वीर्वि॒शः प्रा॒यासि॒ष्टाञ्
 सु॒प्री॒ते सु॒धिते॒ वसु॒वने॒ वसु॒धेय॒स्य वी॒तां य॑ज । दे॒वी जो॒ष्ट्री
 वसु॒धिती॒ ययो॒रन्याऽघा॒ द्वे॒षाञ्सि॒ यु॒यव॒दाऽन्या॒ वक्ष॒द्-वसु॒ वा॒र्याणि॒
 यज॑मा॒नाय॒ वसु॒वने॒ वसु॒धेय॒स्य वी॒तां य॑ज । दे॒वी ऊ॒र्जाहु॒ती
 इ॒षमूर्ज॑म॒न्या वक्ष॑त्स॒ग्धिञ् स॒पीति॑म॒न्या न॒वेन॒ पूर्वं॒ दय॑मा॒नाः स्या॑म
 पु॒रा॒णेन॒ नवं॒ तामूर्ज॑मूर्जाहु॒ती ऊ॒र्जय॑माने॒ अधा॒तां वसु॒वने॒ वसु॒धेय॒स्य
 वी॒तां य॑ज । दे॒वा दै॒व्या हो॒तारा॒ ने॒ष्टारा॒ पो॒तारा॒ ह॒ताघ॑शञ्सा-
 वाभ॑र॒द्वसू॒ वसु॒वने॒ वसु॒धेय॒स्य वी॒तां य॑ज । दे॒वीस्ति॒स्रस्ति॒स्रो
 दे॒वीरि॒डा सर॑स्वती॒ भार॒ती द्वां भार॑त्यादि॒त्यै-र॒स्पृक्ष॑त्-सर॒स्वतीम॑ञ्
 रु॒द्रैर् य॒ज्ञमा॒वी-दि॒हैवै॒डया॒ वसु॑म॒त्या स॒धमा॑दं म॒देम॒ वसु॒वने॒
 वसु॒धेय॒स्य वि॒यन्तु॒ यज॑ । दे॒वो न॒राशञ्स॑-स्त्रि॒शीर्षा॒ षड॑क्षः
 श॒तमि॑दे॒नञ् शि॒तिपृ॑ष्ठा आ॒दध॑ति स॒हस्र॑मीं प्र॒वह॑न्ति मि॒त्राव॑रु॒णेद॑स्य

हो॒त्रम॒र्ह॒तो बृ॒ह॒स्प॒तिः स्तो॒त्रम॒श्वि॒ना ऽऽध्व॒र्य॒वं व॑सु॒वने॑ वसु॒धेय॑स्य
वे॒तु य॑ज । दे॒वो व॒न॒स्प॒तिर् व॒र्ष॒प्रा॒वा घृ॒तनि॑र्णिग्-द्या-
म॒ग्रेणा॑स्पृक्ष॒दाऽन्त॑रि॒क्षं म॒ध्ये॒नाप्राः पृ॒थि॒वी-मु॒प॒रेणा॑द्हीद्-वसु॒वने॑
वसु॒धेय॑स्य वे॒तु य॑ज । दे॒वं ब॒र्हि॒र्वारि॑तीनां नि॒धे धा॑सि प्र॒च्यु॒तीना॑म-
प्र॒च्यु॒तं नि॒काम॑धरणं पु॒रु॒स्पार्हं य॑श॒स्वदे॑ना ब॒र्हिषा॑ऽन्या
ब॒र्ही॒ष्यभि॑ष्याम वसु॒वने॑ वसु॒धेय॑स्य वे॒तु य॑ज () । दे॒वो अ॒ग्निः
स्वि॑ष्ट॒कृ॒त् सु॒द्र॒वि॒णा म॒न्द्रः क॒विः स॒त्यम॑न्माऽऽय॒जी हो॒ता हो॒तुर्
हो॒तु॒राय॑जीया॒न॒ग्ने या॒न्-दे॒वान॑या॒ड्या॒ अपि॑प्रे॒र्ये ते हो॒त्रे अ॒म॒थ्स॒त
ता॒ स॒स॒नु॒षी॒ हो॒त्रां दे॒वं ग॒मां दि॒वि दे॒वेषु॑ य॒ज्ञमे॑रयेम
स्वि॑ष्ट॒कृ॒च्चा॒ग्ने हो॒ताऽभू॑र्वसु॒वने॑ वसु॒धेय॑स्य नमो॒वा॒के
वी॒हि य॑ज । 34 (11) (य॒ज्ञैकं॑ च) (A13)

3.6.14 अनुवाकं 14 – अनुयाजयाज्याः

T.B.3.6.14.1

दे॒वं ब॒र्हिः । व॒सु॒वने॑ व॒सु॒धेय॑स्य वे॒तु । दे॒वीर्द्वारः॑ । व॒सु॒वने॑
व॒सु॒धेय॑स्य वि॒यन्तु॑ । दे॒वी उ॒षा॒सा न॒क्ता । व॒सु॒वने॑ व॒सु॒धेय॑स्य वी॒ताम् ।
दे॒वी जो॒ष्ट्री । व॒सु॒वने॑ व॒सु॒धेय॑स्य वी॒ताम् । दे॒वी ऊ॒र्जाहु॑ती ।
व॒सु॒वने॑ व॒सु॒धेय॑स्य वी॒ताम् । 35 (10)

T.B.3.6.14.2

दे॒वा दै॒व्या हो॑तारा । व॒सु॒वने॑ व॒सु॒धेय॑स्य वी॒ताम् । दे॒वीस्ति॑स्र-स्ति॒स्रो
दे॒वीः । व॒सु॒वने॑ व॒सु॒धेय॑स्य वि॒यन्तु॑ । दे॒वो न॒राश॑ꣳसः । व॒सु॒वने॑
व॒सु॒धेय॑स्य वे॒तु । दे॒वो व॒नस्प॑तिः । व॒सु॒वने॑ व॒सु॒धेय॑स्य वे॒तु ।
दे॒वं ब॒र्हि॒र्वारि॑तीनाम् । व॒सु॒वने॑ व॒सु॒धेय॑स्य वे॒तु । 36 (10)

T.B.3.6.14.3

दे॒वो अ॒ग्निः स्वि॑ष्टकृत् । सु॒द्रवि॑णा म॒न्द्रः क॒विः । स॒त्यम॑न्माऽऽय॒जी
हो॒ता । हो॒तुर् हो॒तुरा॑य॒जीयान्॑ । अ॒ग्ने या॒न्दे॒वान॑याट् । याꣳ अ॒पिप्रेः॑ ।
ये ते हो॒त्रे अ॒मथ्स॑त । ताꣳ स॒स॒नुषीꣳ हो॒त्रां दे॒वं ग॒माम् ।

दिवि॑ दे॒वेषु॑ य॒ज्ञमे॑रये॒मम् । स्वि॑ष्ट॒कृच्चा॒ग्ने होता॑ऽभूः () ।

वसु॑वने॒ वसु॑धेयस्य॒ नमो॑वाके॒ वीहि॑ । 37 (11)

(वी॒तां – वै॒त्व – भू॒रेकं॑ च) (A14)

3.6.15 अनुवाकं 15 – सूक्तवाकप्रैषाः

T.B.3.6.15.1

अ॒ग्निम॑द्य॒ होतार॑मवृणीतायं॒ यँज॑मानः॒ पच॑न् प॒क्तीः पच॑न् पु॒रोडा॑शं
ब॒ध्नन्-नि॑न्द्रा॒ग्निभ्यां॑ छाग॑ः सूप॒स्था अद्य॑ दे॒वो वन॑स्पति-र॒भव-
दि॑न्द्रा॒ग्निभ्यां॑ छागे॒नाघ॑स्तां॒ तं मे॑दस्तः॒ प्रति॑ पच॒ताऽग्र॑भीष्टामवीवृ॒धेतां॑
पु॒रोडा॑शेन॒ त्वाम॑द्य॒र्ष आ॒र्षेय॑र्षीणां॒ नपा॑दवृणीतायं॒ यँज॑मानो
ब॒हुभ्य॑ आ॒ संग॑तेभ्य॒ एष॑ मे॒ देवेषु॑ वसु॒ वार्या॑ यक्ष्यत॒ इति॑ ता या
दे॒वा दे॒व-दा॑नान्यदु॒स्तान्य॑स्मा॒ आ च॑ शा॒स्वा च॑ गुर॒स्वेषि॑तश्च
हो॒तर॑सि॒ भद्र॑वाच्याय॒ प्रेषि॑तो॒ मानु॑षः सू॒क्तवा॑काय॒
सू॒क्ता ब्रू॑हि । 38 (1) (अ॒ग्निम॑द्यैकम्) (A15)

Prapaataka Korvai with starting Padams of 1 to 15 Anuvaakams :-

(अ॒ञ्जन्ति॑ – हो॒ता य॑क्ष॒त् – समि॑द्वो अ॒द्या – ग्नि॑ – रजै॒द् –
दै॒व्या – जु॒षस् – वा वृ॑त्र॒हणा॑ – गी॒र्भि – स्त्व॑ ह्या – भ॒रत॑ –
मु॒पो॒ह यद् – दे॒वं ब॒र्हिः सु॒दे॒वं – दे॒वं ब॒र्हि – र॒ग्निम॑द्य
पञ्च॑दश)

Korvai with starting Padams of 1, 11, 21 Series of Dasinis :-

(अ॒ञ्जन् – त्यु॒पाव॑सृ॒जन् – ना॒न्या यु॒वत् – कर॑दे॒व म॒ष्टात्रि॑ंशत्)

First and Last Padam 3rd Ashtakam 6th Prapaatakam :-

(अ॒ञ्जन्ति॑ – सू॒क्ता ब्रू॑हि)

हरिः॑ ओम्

। कृष्ण यजुर्वेदीय तैत्तिरीय ब्राह्मणे तृतीयाष्टके षष्ठः प्रपाठकः समाप्तः ।

=====

**Details of Dasini & Vaakyams for Ashtakam 3 –
Prapaatakam 6 – (TB 3.6)**

	Dasini	Vaakyams
Anuvakam 1	4	38
Anuvakam 2	2	24
Anuvakam 3	5	48
Anuvakam 4	1	9
Anuvakam 5	1	8
Anuvakam 6	4	40
Anuvakam 7	2	23
Anuvakam 8	2	22
Anuvakam 9	1	12
Anuvakam 10	5	52
Anuvakam 11	4	47
Anuvakam 12	2	21
Anuvakam 13	1	11
Anuvakam 14	3	31
Anuvakam 15	1	1
Total →	38	387